

OF STATES









शीराजा

डोगरी


A.B.S. Sadan (Regil)

(लोक-साहित्य खण्ड)



प्रमुख सम्पादक : ग्रस्तर मोहिउद्दीन

सम्पादक : ग्रोम गोस्वामी



शीराजा

डोगरी

A.B.S. Sadan (Regal)

(लोक-साहित्य खण्ड)



प्रमुखं सम्पादक : ग्रस्तरं मोहिउदीन

सम्पादक: ग्रोम गोस्वामी



SHEERAZA: a Quarterly Publication of J & K Academy of Art, Culture & Languages, Canal Road, Jammu.

शीराजा डोगरी

अंक: 3

दिसम्बर 1975

बरा: 12

सम्पादकी खत-पत्तर : जोमा गोस्वामी सम्पादक डोगरी कल्चरल अकंडमी, कैनाल रोड, जम्मू ।

फोन नं 5040

सैकेटरी नै कल्चरल अकैडमी गित भारती प्रैस जम्मू थमां छपवाया

इस अंके च

लेख

डुग्गर दा फोक-लोर	1	राम नाथ शास्त्री
	45 T	35, कर्ण नगर, जम्मू
कश्मीरी कहावतां	9	गोपी नाथ कौशिक
		108, मोहल्ला पठानां, जम्मू
जीवन-दर्पण साढ़े लोक गीत	13	विश्वनाथ खजूरिया
		140, पंजतीर्थी, जम्मू तवी
ब्याह च सिठनियां	24	शिव दोवलिया 'ज़ख्मी'
		(वसोहली) कठूआ
जन-जीवन ते ओदी घोख	32	संसार चन्द शर्मा
		आदिस्ट, पक्का डंगा, जम्मू
डुडू बसन्त गढ़ दे दीं तेहार	36	परस राम पूर्वा
		रामनगर (जम्मू ते कश्मीर)
साढ़ा सांस्कृतक तेहार—लोहड़ी	40	ओम शर्मा
		रामनगर (जम्मू ते कश्मीर)
डोगरी लोक गीतें च रुत्तां व्हारां	54	ुडॉ० चम्पा शर्मा
		क्वार्टर-170, मोहल्ला अफगानां जम्मू
कविता / गीत / गजल		
गीत	39	प्रद्युम्न सिंह जिन्द्राहिया
		जम्मू
अपनी बेह्न	66	डॉ० अरविन्द
	-	पक्की ढक्की, जम्मू
मेरा चन्न	67	राम लाल शर्मा
		रानी तला, जम्मू

जिन्दगी ते मौत	68	m) ~
पीलिए दा रोगी	70	मोहन सिह 124, डोगरा हाल, जम्मू कुलभूषण कायस्थ गवर्नमेंट एजूकेशन कालेज, धर्मशाला
नमां जमाना वहानी	72	्हि० प्र०) शिव राम प्रेमी सरवाल, जम्मू
भयानक दण्ड	41	विजय समन
स्तंभ निमयां मिजरां		न्यू मार्कीट पक्का डंगा, जम्मू
गुरु नानक	48	दर्शन कौर
हस्स रस		द्वारा / सरदार रघुबीर सिंह 'गुलशन' जुलाहका मुहल्ला, जम्मू
बाज आया लेखक बनने कछा	51	विहारी लाल
औंकर (गीत)	74	(अन्ध विद्यालय) जम्मू बृजमोहन दीवान इस्टेट, मुबारक मण्डी, जम्मू
अकैडमी डायरी कताबां	75 76	पापाग २८८८, मुवारक मण्डा, जम्मू
	, 0	

Ø

श्रम्पादकी

अउजे दे संदर्भ ते छोक साहित्य दी परख : लोक-साहित्य दी परिभाशा दा मोह जां इसदी व्याख्या दी जिह छोड़िये जेकर बचार कीता जा ता ए शब्द मेला उस अर्थ गी सुझाने दी पूरी समर्थ रखदा ऐ, विद्वानें जिसी 'लोक संस्कृति', 'लोक ज्ञान', 'लोक यान', लोक वार्ता, 'जन परंपरा' आदि नां देने दे जतन कीते न। लोक साहित्य ते आधुनिक साहित्य च जेड़ा मुट्टा फर्क कीता जाई सकदा हा, ओ हा- पैहले दी परंपरा मुंहों-मुंह चलदी ऐ, जेड़ी क जन-मानस च इक गूंज आंगर रची दी रौहन्दी ऐ ते दूई दी लिखत परंपरा ऐ। पर लोक साहित्य गी साम्बने ते छापने दे प्रबन्ध होने बाद ए फर्क बी वे-दलील सावत होआ। इत्थें इक मुआल ए ऐ जे साहित्य गी साम्बने दी लोड़ की पौन्दी ऐ ते के के खतरे नमें जमाने च उदे सामने न ? इक खतरा पर्दे दे 'ग्लेमर' कोला ऐ ता दूआ कला दे उत्कर्षवादी रूप कोला, इनें दौनें सामन लोक कलां अपने गी हीना ते हासोहानी दा मूजब मसूस करिदयां न । लोक परंपरा च सैहज बश्वासें राएं कला पलदी ऐ-उस च लोक दी सादगी दी अभिव्यिति दे अलावा दूए अर्थे दी व्विन देने आले लोक प्रतीक होन्दे न-जिन्दा सरवन्ध मानु दे कदीमी भावें डर-त्राह, खुशी-गमी ते बैंस-बेल वधने जनेई तांगें कन्ने होन्दा ऐ। पर अज्जै दी कला जेदा उत्कर्ष शैहरें ते माया नगरें च होआ ऐ अपनी गुंजलें भरी ते 'सपैस्लाइज्ड' स्थितिएं कारण लोक कला गी नीठा मसूस कराई दिन्दी ऐ - जेदा असर लोक जीवन दे हर पैहलू पर ए होआ करदा ऐ जे 'भलेयां शुद्धता' ते 'भलेयां अशुद्धता' बिच्चा दी कुसै बिगड़ी दी स्थिति पर ओ त्रिशंकू आंगर लमका करदा ऐ। लोक गीतें पासेया लकाई दा ध्यान खिच्चिय फिल्मी ढोल-ढमक्के आले गीतें उन्दा थार लैना लाया ऐ। इसी विडम्बना गै आखर्च जे लोक धुनें ते गीतें दे बोल लेइयै रचे गेदे फिल्मी गीतें अपने मूल मम्बे दी संगी घोटना लाई ऐ। दूआ खतरा लोक साहित्य गी अज्जै-कल्लै दे सस्ते ते घटिया साहित्य कोला ऐ, की जे ग्राएं दे अट्ठ दस (जां घट्ट)

जमातां पढ़े दे लोकें गी इये किछ पढ़ने-सनाने आस्तै दस्तयाब ऐ। जिस समें च लोक गीतें दी मैहफल भखी सकदी ही उसी बे-लगाम साहित्य दी बकरी चरी जन्दी ऐ। तेजी कन्ने बदलै करदा समां ते इसदी बदौलत लोक साहित्य गी दरपेश केई खतरे इक होर गल्ल सुभांदे न जे उद्योगी संस्कृति ते लोक संस्कृति च कोई आपसी बरोध ते नईं ? एदी तैह तकर जाने थमां पैहले असें गी मनै च रक्खना पौग जे परंपरा नित्त नमीं होन्दी रौहन्दी ऐ, नमां जमाना बी गुनगुनाने आस्तै लोक मानस गो नमां किज न किज देशा करदा ऐ। 'विजली, 'बिजली दा खूहा', 'ट्रैवटर', 'रेडियो' जनेई निमयें नयामतें लोक मानस च थार बनाना शुरू करी उड़ेया ए। इब्बी चेतै रखना पौग जे दांदें दी जोड़ी कन्ने बाई ते बैल गड्डी कन्ने ढोआई इस उपमहाद्वीप च इक्कीमी सदी दियें मुण्डलियें दहाइयें तकर चलने दी पूरी संभावना ऐ। दिव्खने गी बदलने दी ए चाल खाझी मद्धम पर असली च बड़ी त्रिवस्ती ऐ। बड़ी तेजिया कन्ने पराना सब किछ म्हिसै करदा ऐ। मशीनी संस्कृति दा निर्माण लोक साहित्य दी लोथा पर होग। इब्बी इक विडम्बना ऐ जे तुस एस हास गी रोकी नई सकदे। उद्योगें दे बधने कन्ने करसान लकाई मजूर बनै करदी ऐ। इदे कन्ने ग्रांएं दा रुख शैहरै बनखी होना लाजमी ऐ। ग्राई लकाई शहरी सुख-सुवधा दी चका-चौंध च खेतर-खुम्बे छोड़िये कस्बें बक्खो उलटोन लगी पेई ऐ। लोक साहित्य गी इस थमां उस्सै चाली दा खतरा ऐ जनेया 'एजटक' ते 'माया' सभ्यताएं गी निषयां भूमियां तुष्पन आए दे स्पेनियें थमां पेश होआ हा की जे ओ इनेंगी जांगली लोकें दियां असम्यतां आखदे हे। इस्सै चाली सरमायादार सस्ती मजूरी आस्तै ग्रांएं-पिण्डें अल भांकदा ऐ ते अपने सम्याना गितै उस दियां मण्डियां बी इये खेतर बनदे न। ओ उन्ना गै नुक्सान करदा ऐ जिन्ना स्पेनियं मैक्सिको दी तबाई ते बरवादी करिये कीता हा। दुनिया दे विद्या-विशारद गै अज्ज इस लोप होए दे प्राचीन गौरव लेई नई तरसदे सगुआं लोभी सरमायादार ते पत्थर दिल उपनिवेशवादी बी सौ-सौ अत्थर केरदे न। 'के कारण ऐ जे इक पूरी संस्कृति आदमी दे दिखदे-दिखदे भुरी जन्दी ऐ ते ओ किश नई करी सकदा। इस गल्लै गी मसूस करिये गै लोक साहित्य दी साम्ब सम्हाल जरूरी समभी गेई ही इस चर्चा थमां इक गल्ल निजम दे रूपे च सामने आई जे वजूद दी दृष्टि कन्ने आधुनिक बकास ते लोक परंपरा इक दूये दे 'इनवर्सली प्रोपोर्शनल' न।

हजगार दे साधन बधने ते आओ-जाई दे सरिस्ते फलने कन्ने इक गल्ल ए होई जे लोकें दी लोक गीतें ते लोक कत्थें परा हिन परें हटी ऐ। अज्ज करसान बाई-राई दे दिनें च जिन्द मारदा ऐ तां आड़ी पर उग्गे दे बूटे दी डाली पर लमके दा ट्रांजिस्टर उसदे कन्नें च चासनी घोला करदा होन्दा ऐ। लम्मी भाखा परा जां आप-मुहारे फुटने आले बोलें परा उसदा घ्यान हटी जन्दा ऐ। इक होर टाकरा दिक्खो, अज्ज समाज कल्याण आस्तै वकास योजना खानदानी मनसूबाबन्दी दी लोड़ मसूस करदी ऐ तां लोक विश्वास इस कोला उल्ट संस्कारें दी भलक
दिन्दा ऐ। कुसै पूजने जोग बुड्डो गी अपने पैर बन्दने आली नमीं ब्याहता पर
शीरवादें दी छोट करांदे तुसें वी सुने दा होग—'बुड्ड सुहागन हो...दुहें नमें ते पुत्तरें
फलें वच्चा...परमात्मा सौ पुत्तर देयें...बाग-ज्हान हरे-भरे रौहन!' कौहएं जिन्नी
सन्तित गी जरम देने आली मां लोक बश्वास च देवो तुल्ल ऐ। असें दिक्खेया जे
लोक जीवन कन्ने तल्लक रखने आला हर कोई बश्वास हर जुगै च, हर समें च,
हर संदर्भें च सेई होना जरूरी नई। खबरें इस्सै करी नागर संस्कार लोकबश्वास (जां परंपरा) दा समर्थन नई करदे, उल्टे उनें गी एदी सादगी पर खिज
ते नफरत होन्दी ऐ, पर लोक परंपरा सद्भाव ते हमदर्दी दी हकदार ऐ हार किसै
दी नई । सौ गल्लें दी इक गल्ल ए जे जेकर असें कुसै इलाके दे जीवन ते इतहास
गी जानना ऐ तां उसदे लोक साहित्य दा अध्ययन करचै —राजनीतक ब्यौरे आले
इतिहासै दा नई की जे उसी बचारक लोक 'जित्तने आलें दा प्रापेगण्डा' आखदे न।

इस अंके वारे चा: इस वारी डुगर दे लोक साहित्य दा परिचयात्मक ब्यौरा पेश ऐ। साढ़े लोक साहित्य दी परंपरा किन्नी सग्गोसार ऐ ते ओदे अध्ययन दियां किन्नियां बेसम्ब सम्भावनां न - जेकर इस तत्थै गी ए संकलन मसूस कराई सकै तां अस अपने जतनै गी सुफल समभगे। श्री रामनाथ शास्त्री दे लेख च लोक साहित्य दी इस्सै उपजाऊ धरती दा महत्तव वखानेया गेदा ऐ। इस दिएं किनें सेधें च कम्म करने दी गुंजैश ऐ – इस बक्खी ए लेख विद्वानें दी तवज्जो खिचदा ऐ। इस बारै कम्म करने दे सुभाव इतियात समेत उने सामने रक्खेन। असें गीपूरी मेद ऐ जेकर इने घासें पर कम्म कीता जागतां लोक-साहित्य दे खलाड़े थमां अस मते सारे असर आले तत्त बाहर आनी सकगे। गोपी नाथ कौशिक होन्दा लेख कश्मीरी कहावतें ते उन्दी लाक्षणिकता बारै पनछान कराइयै उत्थूं दी तहजीब दी भलक देने च उन्दो समर्थता बारै बचार करदा ऐ। ए गल्ल सवनें भाखी ऐ जे कुसै भाशा दे गीत-खुआन, क्हावतां-क्हानियां उत्थूं दी भौगोलक, आर्थक, सांस्कृतक ते इतहासक इकाइएं दे पनछान पत्तर होन्दे न। डोगरी खुआनें च साढ़े राह-रीत, सोच-बचार भलकगन तां कश्मीरीदे खुआनें पर उत्थ दिएं पिरतें दा उत्थू दे संदर्भ च जिकर होग। डोगरी ते कश्मीरी दे खुआन्नें, मुहावरें दा तुलनात्मक अध्ययन इक उज्ज्वलपूर्ण सम्भावना ऐ। श्री विश्वनाथ खजूरिया होर अपने ले च डुग्गर देखें संदर्भ च लोकगीतें दा जेड़ा महत्तव ऐ इसदी चर्चा करदे न ते इस बवेचन च उनें इनें लोकगीतें गी नमीं अर्थ संगति दित्ती ऐ। इस्सै चाली लोहड़ी दे बनखो-बनख पनखें पर ओम शर्मा नै बचार कीता ऐ। परस राम पूर्वा होरें डुडू बमन्तगढ़ अंचल दे दौं तेहारें दा

रोवक ब्यौरा दित्ता ऐ। डॉं० चम्पा शर्मा दा लेख विवरणात्मक शैली दा लेख ऐ। असें गी सेई ऐ जे लोक साहित्य दे खुल्ले-चौड़े खेतरैं दा बवेचन इनें अट्ठ-नौ लेखें च मुमकन नईं, इस करी ए संकलन लोक साहित्य दे सिर्फ गिने-मिथे दे पक्खें पर गें समग्री देई सकेया ऐ। लोक साहित्य दी डवर बड़ी डूंगी ऐ, उसदी सतह पर गें अजें अस तरैं करने आं पर कोशश करगे जे अग्यूं आस्तै इसदे अन्दरा दी खबर देने आले लेख बी तुन्दे तगर पुज्जन।

इस अनै दी त्रौं कवताएं - अपनी बेहन (डॉ. अरिवन्द), जिन्दगी ते मौत (मोहन सिह), पीलिए दा रोगी (प्रो. कुलभूषण चन्द्र कायस्थ) बक्खी डोगरी पाठक इस आशा कन्ने दिक्खग जे डोगरी कवता नमें मोड़ पा करदी ऐ—भामें एदे आस्तै कोई आंदोलन नई चलाया गेया...न कोई ढोल-ढमक्का होआ...अज्जै दी मन: स्थिति दा ब्यान ते अपने चबक्खी दी फरोल इनें कवताएं दा मुक्ख सुर ऐ। ए इस गल्लै दी नशानी ऐ जे डोगरी कवता अपने समें ते समाज कन्ने मूण्डा मेलियै चलने गी बचनें बदी ऐ।

(MIEZINGALKE

डुग्गर दा फोक-लोर

बंजर पेदी इक महत्वपूर्ण उपजाऊ धरत

अंग्रेजी शब्द 'फोक-लोर', लोक-संस्कृति बारै रुचि रखने आले पढ़े-लिखे दे लोकें आस्तै, उन्ना ओपरा शब्द नईं, जिन्ना ओदा हिन्दी रूप 'लोक-वार्ता' जां पंजाबी रूप 'लोक यान' ओपरा सेई होन्दा ऐ। अंग्रेज़ी समास-गब्द फोक-लोर च 'फोक' दा अर्थ ऐ लोक ते लोर दा अर्थ ऐ 'ज्ञान-परम्परा'। पर हिन्दी जां पंजावी च फोक-लोर आस्तै 'लोक-ज्ञान शब्द नई' बरतेआ गेआ। दर असल 'ज्ञान' शब्द गी पढ़े लिखे दे लोकें जिस अर्थ च वन्नी दिला ऐ ओदे करी 'लोक ज्ञान' वी फोक लोर दा समानार्थक बदल नई होई सकदा। की जे इक अमरीकी विद्वान रिचर्ड एम. डॉर्सन (Richard M. Dorsan) मुजब फोक-लोर दे घेरे च समूलचा ग्राईं जीवन आई जन्दा ऐ। म समूलचा ग्राईं जीवन 'ज्ञान' शब्द दे घेरे च नई औन्दा । वया 'लोक-संस्कृति' शब्द फोक-लोर दा बदल होई सकदा ऐ ? की जे किज विद्वानें मूजव ''फोक-लोर च ओ सब किज आई जन्दा ऐ जिसी अस लोक संस्कृति आखने आं जेदा विस्तार प्राचीन काल कोला अज्जै तगर ऐ।"2 'लोक-संस्कृति' ए शब्द भाएं लोक-ज्ञान कोला बदीक व्यापक ऐ, पर 'फोक-लोर' च लोक संस्कृति दे प्रधान तत्वें दे अलावा लोक-जोवन दे होर दूए तत्व बी आई जन्दे न जियां उन्दे रोति रवाज, आस्था विश्वास, देवी-देवते, जादूं-टूना इत्यादि । जोनस वेलो (Jones Balys) नां दे विद्वान ने इस्सै गल्लै पर जोर दिन्दे होई आखेया ऐ जे 'फोक-लोर च लोकें दी परम्परा थमां चलदे औने आली कला-कारीगरी दे अलावा उन्दे आस्था-विश्वास जां जिनें गी अन्ध-विश्वास आखेया जन्दा ऐ-ओ सब बी आई जन्दे न।"3 इनसाइकलोपीडिया ब्रिटानिका (Encyclopaedia Britanica) मूजब 'फोक लोर' दा अर्थ ऐ:

"आम लोकें दे, परम्परा थमां चलदे औने आले विश्वास, अन्ध विश्वास, उन्दे तौर-तरीके, रीति-रवाज, जेहड़े प्राचीन काल थमां चलदे आए न ते जेहड़े 'थोड़े-मते बदलिये बी, पर मते किछ बिना बदले गै, अज्जै तोड़ी चलदे आवें करदे न।

इन्दा सरूप, आम मानता आले 'धर्म' ते 'ज्ञान' कोला टकोदे तौरा पर बक्खरा गै हुन्दा ऐ।" 4

'फोक-लोर' दो इस व्याख्या च बेरोक चलदी औने आली 'परम्परा' पर बी टकोदा जोर ऐ ते कन्ने गै 'फोक-लोर' दे धमँ (आस्था-विश्वास) ते ज्ञान (कला-कौशल) दे आम धारणा आले 'धमें' ते 'ज्ञान' कोला बक्खरा होने दी गल्लै गी बी चेचा जोर देइये आखेया गेया ऐ। इस दुई गल्लै करी गै 'फोक लोर' दा अर्थ नां 'लोक-ज्ञान' होई सकदा ऐ ते नां गै 'लोक संस्कृति'। इस करी इस सिलसिले च डोगरी दे बचारकें अग्गें पैहली जिज्ञासा ए रक्खें करनां जे 'फोक-लोर' गी डोगरी च के आखचै ?

'फोक-लोर' च 'परम्परा' दा महत्व

फोक लोर दी व्याख्या दे सिलसिले च असें जिनें विद्वानें दे हवाले दित्ते न. उनें सबनें 'फोक लोर' च परम्परा (Tradition) दे तत्व गी बुनियादी महत्व दित्ता ऐ। अंग्रेज़ी पत्रका 'फोक लोर' दे सम्पादक श्री शंकरसेन दा आखना ऐ जे-परम्परा दा तागा नई होयै तां फोक-लोर दी सत्ता गै नई रेई सकदी-Without traditional link folk lore can not exist. फोकलोर दी परम्परा, लगातार इक मनुक्लै कोला दूए गी थोन्दी चलदी ऐ। कुसै बी लाके दे फोक-लोर दा अध्ययन करने आलें आस्तै पैहली जरूरत ए ऐ जे ओ परम्परा (Tradition) दे स्वरूप ते महत्व गी समझन । ए परम्परा इक सहज Process ऐ, इक सहज व्यवहार ऐ जेदा सरवन्ध लोकें दे समाजी जीवन दी धारा कन्ने ऐ। ए जीवन-धारा समें कोला प्रभावत होन्दी रौहन्दी ऐ। फोक लोर दी परम्परा वी समे दे प्रभावें कोला बची नई सकदी पर ओ अञ्बल ते इनें प्रभावें कोला बचने दा जतन करदी ऐ, नई बची सकै तां उस प्रभाव गी आंशिक रूप च स्वीकार करिये, अपने मूल स्वातम गी ज्यादा कोला ज्यादा बचाने दा जतन करदी ऐ। इस्सै करी 'फोक लोर' दा विद्यार्थी 'परम्परा' ते 'परिवर्तन' दे इस संघर्ष बारै चौकस रौहन्दा ऐ। फोक लोर गी 'अनपढ़ लोकें दी असम्यता' दा प्रदर्शन आखिये, ओदे पर नक्क मुंह चाढ़ने आलें कोला डरने-त्राहने दी लोड़ ते बनी दी गै ही पर हुन बदलोन्दे समे दियें उने हवाएं कोला डर-त्राह वधै करदा, जिंद्यां इस विज्ञानी युगै च खासे जोरै कन्नै चलै करिंदयां न ते ग्राएं-पिंडें-धारें-प्हाड़ें दे नकेबलें तगर पुज्जियै उत्थों दे लोक-जीवन गी अपनी उस परम्परा बारै उदासीन करने दियां प्रेरणा देयै करदियां न । इनें धारें दे लोक-जीवन दे, जिस सहज सरल भलोकपुने च ओ 'परम्परा' फलदी-फुलदी रेई ऐ, उस मलो नेपुने गी गैए परिवर्तन दियां हवामां डांबाडोल करें करिदयां न।
मतलब आखने दाए जे 'फोक लोर' दी परोश करने आली परम्परा गी शैहरी
जीवनै च व्यापने आली उस सो फिस्टी नेशन (Sophistication) कोला डर बदें
करदा ऐ जड़ी मनुक्खी जीवन दी सहज एकता दियें नी हें गी गै पुट्टै करदी ऐ।
'फोक- लोर', लोक-जीवन दी जिस एकता दे स्हारें अपना सरूप बनाई रखदा ऐ,
शैहरी जीवन दी ए सो फिस्टी नेशन उस इकता गी खतम करदी जन्दी ऐ।
श्री शंकरसेन दे शब्दें च:—

"It is easier to obtain pure tradition from unlettered or unsophisticated set than from sophisticated group. It is to be found where ever there are superstitions about good and bad luck and beliefs, often more implicit than explicit, about fate and fortune."

अर्थात् अनपढ़ लोकें कोला सहज परम्परा दी झलक मिलना जिन्ना सरल ऐ उन्ना सम्य जां पढ़े-लिखे दे लोकें कोला सरल नई। ए परम्परा उत्थें गैं पलदी-मठोंदी ऐ जित्थें चंगे जा माड़े भागें बारें लोक-विश्वास कम्म करदा ऐ, जां जित्थें मत्थें दे लेखें दी आस्था जीवन च रची-पची गेदी हुन्दी ऐ। इस करी 'फोक-लोर' दा अध्ययन करने आलें गित्तें, सुवधा मूजब समे दी निहालप करना, मौके गी खुं जाई देने आली गल्ल बी होई सकदा ऐ। ते डोगरी फोकलोर दे अध्ययन दे बारे च अजें कुतै मनासब तरीके दा सोच बचार बी नईं कीता गेया ऐ। पिच्छें जिनें खतरें दी गल्ल असें कीतो ऐ, उन्दे कारण इस खेतर च कम्म करने दी जरूरत होर बी बधी जन्दी ऐ। डोगरी फोक-लोर दी बंजर पेदी ए उपजाऊ धरत, महता विधि सिह दी जगीर नईं ऐ जे एदे च करसानी करने आले दा खलाड़ा लटोई जाग। पर एदेच कोई शक नई जे इस बंजर पेदी धरती दी अप्फलता गी मेसने आस्तै मनै च जित्तो आली हुब्बै दा होना ते बुनियादी गल्ल ऐ गैं।

इस खेतरै च जो थोड़ा-मता कम्म होआ ऐ ओदी चर्चा करने कोला पैहलें असेंगी 'फोक-लोर' दे खेतरै दे पूरे विस्तार पर, इक सरसरी गै, सेई नजर मारी लैनी लोड़दी ऐ।

'फोक-लोर' दी परम्परा गी टकोदे तौर पर दौं हिस्सें च बंडेया जन्दा ऐ इक 'शब्द' पर आधारित परम्परा ते दुई गति (action) पर आधारित परम्परा।

शब्द पर आधारित परम्परा गी 'शब्द-प्रधान परम्परा' वी आखी सकने आं। इयां गै दुई गी गित-प्रधान परम्परा आखी सकने आं। शब्द-प्रधान परम्परा च 'फोक-लोर' दे जेड़े अंग शामल कीते जाई सकदे न उन्दे च प्रधान ए न।

जन भाशा जां जन-बोली जां बोलियां। इनें भाशाएं दा इतिहासक विकास,
 इन्दा Phonological ते Morphological विश्लेषण । अर्थात् बोली जाने
 आली जन-भाशा दा भाशा विज्ञानी अध्ययन । जेदे च इक माशायी खेतरे च

- बोली जाने अ। लियें बोलियें दा तुलनात्मक बिवेचन कीता जाते उन्दे खेतर-बन्ने दी नशानदेई होये।
- 2 फोक लोर दो शब्द प्रधान परम्परां च 'ख्वानें', 'मुहावरें', 'बुझारतें' 'नोति ते ज्ञान सम्बन्धो टोटकें', 'मैंत्रें' आदि दा संग्रह ते उन्दे राहें लोक-जीवन दे बौद्धक ते मानसक रुचि-रुझानें दा अध्ययन।
- 3 इस्सै परम्परा च लोक-गीत ते लोक-कत्थें दा संग्रह, उन्दी साम्ब-सम्हाल ते उन्दे च अंकत लोक जीवन दे बक्खरे-बक्खरे पैहलुएं दा अध्ययन । लोक-गीतें दे, लोक-कत्थें दे, ते इयां गै ख्वानें, मुहावरें आदि दे अध्ययन च इक बड़ा महत्वपूर्ण पैहलू ए ऐ जे उन्दा मूल-सरवन्ध उस लोक-जीवन दे व्यापक घेरे च जिस खास वर्गं कन्ने, जिस खास परिस्थिति कन्ने ऐ, उसदी जानकारी प्राप्त कीती जा। अर्थात् गीतें, कत्थें ते मुहावरें ख्वानें गी सिर्फ उन्दे साधारण विशें दे मताबक बंडना, मसले गी बड़ा सरल समफने आली गल्ल ऐ, कुसै थारै दे एक स्कूलैं च पढ़ने आले जागतें बारै क्या ए Common factor (साधारण तत्व) गै काफी ऐ जे ओ इक्कै स्कूला च पढ़दे न। उनें जागतें दे बारे च जियां होर मितयां गल्लां बी जानने जोग न, इयें गल्ल लोक-गीतें,लोक-कत्थें ते ख्वानें-मुहावरें बारें वी आखी जाई सकदी ऐ। फोक-लोर दे अध्ययन दा मनशा पूरा नई होन्दा जिन्ने चिर इनें अंगें (तत्वें) दे मूल दा, उन्दे रूप-विकास दा, उन्दी यात्रा दा, उन्दी बुनियादी खासीयतें दा अध्ययन नई कीता जा। 'फोक-लोर' दे बारे च सिर्फ उत्साह कन्ने कम्म नई चलदा। 'फोक-लोर दी परख-पड़ताल करने आले जिज्ञासु गी अपने 'फोक-लोर दे खेतर (स्थान) दी, जिनें उस फोक लोर गी जन्म दित्ता ऐ, उनें लोकें दी, ते इस कम्मै वारै अपनी समर्थे दी जानकारी होनी बड़ी लाजमी ऐ। सचाई दी खीज इनें त्रौं यथार्थें दी मददी कन्ने गै होई सकदी ऐ।

× × ×

असें डोगरी फोकलोर दे बारे च अजें मसां िकज फुटकल जतन मातर गै कीते न जिन्दे च लगभग 1000 लोक-गीतें दे ते लगभग 500 लोक-कत्थें दे संग्रह दा कम्म सिरमौर ऐ। 5-6 हजार मुहावरे ते 1000-1200 ख्वानां बी किट्ठियां किर्ये पुस्तक रूपै च छपी गेदियां न। इस्सै चाली हिमाचल च बी प्हाड़ी लोक-साहित्य दी साम्ब-सम्हाल बक्खी रुचि जागो पेई ऐ। उत्थें बी गीतें-कत्थें ते लोकोिक्तयें दे किज संग्रह छपी गे न। मेद ऐ जे ए कम्म होर तेजी कन्ने अगों बदग । पर अपने इस लाके च इस किट्ठी कीती दी समग्री पर कम्म करने दी किसै सोची-वचारी दी योजना दी रूप-रेखा अजें अस नई वनाई सके। इस बेले तगर इस समग्री गो लेइयें कोई 30-32 फटकर लेख लिखे गे न जिन्दे चा 20-22

दा सरबन्ध सिर्फ लोक-गीतें कन्ने ऐ। इन्दे चा मते सारे लेखें दी वुनियादी approach इक्कें जनेई ऐ—अर्थात् कुसै इक विशे कन्ने सम्बन्ध रखने आले 5-10 गीत किट्ठे करिये उन्दी मददी कन्ने उस विशे दी साधारण जनेही चर्चा करना। इस रुचि च विशे दी डवरी च डूंगी चलोबी मारने दी नां हिम्मत होंदी ऐ, नां समर्थ। दर असल फोकलोर दी बुनियादी जानकारी दी कमी होने करी इस खेतरे च इस्सै चाली दा कम्म करने दो गुंजैश होई सकदी ऐ। इस बारे च श्री शंकरसेन दी ए राए वड़ी महत्वपूर्ण ऐ जे:

"The terms and basic methods of folk lore analysis should come from linguistics, anthropology, literary criticism, psychology and sociology."

अर्थात् फोकलोर दी परख-पड़ताल करने दी रूप-रेखा ते बुनियादी तरीकें दा निर्देश भाशा-विज्ञान, नृविज्ञान, साहित्यिक समालोचना, मनोविज्ञान ते समाजशास्त्र दे जानकारें कोला औने लोड़दे न। इस दृष्टि कन्ने आखेया जाई सकदा ऐ जे डोगरी फोकलोर दे खेतरै च इस समे तक, इनें बुनियादी गल्लें बारै सोच विचार करने दा वी श्री गणेश अर्जे नई होई सकेया।

- अस कुसै लाके दी भाशा-बोलो दा भाशा विज्ञान दे सिद्धान्तें मूजब विश्लेषण भाएं नई करी सकदे, पर उस भाशा-बोली दे नमूने ते किट्ठे करी सकने आं। वक्खरे बक्खरे लोकें द्वारा बोले जाने आली इक्कै भाशा च मजूद बक्खरियां वक्खरियां रंगतां ते बनिगयां किट्ठा करने दा जतन करी सकने आं। एदे आस्तै मनासब तरीके बरते जाई सकदे न।
- 2 कम्म करने आस्तै ग्रां-पिंड जां लाके बंडियै उन्दे च खल्ल दित्ती दियें गल्लें मूजब (Survey) करी सकने आ:
 - i) लोकें दियां जातियां-बरादरियां ते उन्दे अवान्तर भेद ।
 - ii) लोकें दे धार्मक आस्था-विश्वास, पूजा-पाठ दे तौर-तरीके
 - iii) Superstitions (अन्ध विश्वास)
 - iv) लोकें दी कार-किरत, पेशे, पैदावार,
 - v) शिक्षा-तालीम दा स्तर
 - vi) उस ग्रां-पिंडै दा इतिहास ते भूगोल
 - vii) उस ग्रां दी Personality दे चेचे तत्व
 - viii) उस ग्रां दी सांस्कृतक सम्पत्ति
 - ix) लोकें च हुनर, दस्तकारी, कला-कौशल
 - x) ग्रां दे पर्व-मेले
 - xi) गां दी भाशा-बोली
 - xii) मैंत्र, टूना, जादूं-जड़ियें दा उस ग्रां दे जीवनै च थार

- xiii) उस ग्रांदे कोई चेचे मुनस-मानु
 xiv) ग्रांदी पंचैती दी कारकरदगी। (इत्यादि)
- 3 लोक-साहित्य दे बक्खरे अंगें दी खोज ते संग्रह दा कम्म लगातार होन्दा रौहना चाहिदा, पर एदे कन्ने गै
 - अ) लोक-गीतें. लोक-कत्थें, मुहावरें-ख्वानें आदि दा प्राप्ति स्थान, जेदे कोला थोआ ओ मर्द-जनानी ते जित्थों तगर होई सकै स्थान-भेद ते पुरुष-भेद कन्ने इन्दे मौलिक रूप-स्वातम दी परख-पड़ताल।
 - आ) इनें संग्रह कोते दे गोतें, कत्थें, मुहाबरें, ख्वानें दा, विशेय दी दृष्टि कन्ने, भाशायी दृष्टि कन्ने ते इतिहासिक दृष्टि कन्ने, वर्गी-करण।
 - इस लोक-साहित्य चा, इस घरती दे ते इत्थें दे लोकें दे जीवन-इतिहास दियां किंद्यां बनी सकने आली समग्री गी तालना ते ओदा विक्लेषण करना।
 - ई) अपनी घरती दे लोक साहित्य दे बक्खरे लक्खरे अंगें दा दूइयें भाशाएं खास करी हिमाचली (पहाड़ो) दे लोक-साहित्य दे बक्खरे-वक्खरे अंगें कन्ने मुआजना करना।
 - उ) साहित्यिक दृष्टि कन्ने इस समग्री दा मुल्ल आंकना ।
 - क) उस समगी चा विशेष शब्दें गी बक्खरा करियै उन्दे पर अर्थ दी दृष्टि कन्ने बचार करना ते शब्द-कोश त्यार करना।
 - ए) इस लोकसाहित्य दे बक्खरे-बक्खरे अंगें पर दूरै-पारै दियें भाशाएं ते संस्कृतियें दे प्रभाव दा ब्योरा त्यार करना।

अउज हिमाचल दे बचारक ते साधक बी साढ़े कन्ने इस विचार-गोव्ठी च शामल न, ए खुशी दी गल्ल ऐ। डोगरा-पहाड़ी 'फोकलोर' दे बारे च साढ़ी ए सांझ कुसै बैहस दी मुहताज नई । साढ़े दौनें लाकें च इस खेतरै च कम्म करने आले साधकें दा आपसो ताल-मेल ते लैन-देन बनी सकै तां बड़ी मनासब गल्ल होग। पर असें, रावी दे रुआरा-पारा दे अपने-अपने खेतरें च अपने तौर पर योजना मताबक कम्म करने दा श्रोगणेश 'शुभस्य शोध्रम्' आली वाखा मूजब, करी देना लोड़चदा ऐ।

इस्सै गल्लै गी पंजाबी दे इक विद्वान डॉ. अतर सिंह ने अपने इक लेख (Problems of Punjabi Floklore studies) च इस चाली स्पष्ट कीता ऐ: फोकलोर, वृतियादी तौर पर इक दुए कन्ने जुड़े दे प्रयत्नें दा सांझा खेतर ऐ। ते एदे कोला पैहलें जे फोकलोर दी कुसै इक शाखा गी कुसै विशेष ज्ञान (विज्ञान) दे इतिहासै दा, जां किसै रचनात्मक आर्टं दा अंग बनाइये दस्सेया जा, ए जरूरी ऐ जे फोकलोर दे बक्खरे-वक्खरे अंगें दे इक दुए कन्ने जां फोकलोर ते उस संपूर्ण समाजी स्वातम कन्ने (जिसने उस फोकलोर गी जन्म दित्ता ते रूप-शक्ल दित्ती) पूरा तालमेल समझी-समझाई लैता जा।

इस करी नवेदन ऐ जे इस बारे च खास बचार-गोष्ठी जां गोष्ठियां कीतियां जान जिन्दे च डोगरी फोक-लोर सरबन्धी कम्म करने बारै कोई जोजना जां जोजनें पर बचार कीता जाई सकै।

फोक-लोर बारै कम्म करने दे प्रमुख केन्द्र, की जे शैहरी जीवनै कोला बाहर, ग्राएं-पिंडें च गै होई सकदे न इस करी मुफस्सलात च कम्म करने आलियां सभां- संस्थां इस कम्मै च बड़ा महत्वपूर्ण जोगदान देई सकदियां न। पर एदे आस्तै जरूरी ऐ इनें सभा-संस्थाएं दे साथियें गी, इस कम्मै बारै टकोदे दिशा-निर्देश प्राप्त होन ते कम्म करने दे तौर-तरोकें (methodology) दी बाकफी होयै।

इस करी मेरा सुझाव ऐ जे डोगरी रिसर्च इन्स्टीच्यूट जम्मू जां डोगरी संस्था इस दिशा च कम्म करने आस्तै तालमेल रखने आली संस्था दा कम्म करै। अन्जै तगर असें 'फोक-लोर' दे बारे च जिस रोमांचकारी (Romantic) दृष्टिकोण गी लेइयै, कम्म करने दा जतन कीता ऐ ओदी पौंहच गैहरी होई नई सकदी। ए कमजोरी सिर्फ डोगरी फोकलोर दे सरबन्धै च गै दिक्खने च नई आई, पंजाबी जनेह खेतरै च बो जित्थें इस बारै यूनिवरसिटियें दे स्तर पर बी कम्म होआ करदा ऐ, इस्सै गल्लै दी शकैत बनो दी ऐ जे:

... 'ते फोकलोर दे बारे च जेड़ा थोड़ा-मता कम्म कीता बो गेया ऐ ओदे च बी रोमांटिक ढंग-तरीका बरते जाने करी बड़ियां लामियां रेई गेदियां न। ए (रोमांटिक) ढंग-तरोका गै अर्ज्ज तगर इनें समस्याएं दे हल सोचने दा प्रधान रस्ता रेया ऐ। इस ढंग-तरीके च टकोदियां लामियां न। एदे च जतन लोक-गीतें दे भावें गी लोक-नृत्य गी ते लोक-कत्थें गो बधाइयें चित्रने ते उन्दो सराहना करने दा होंन्दा। इस चाली दे आदर्शवादी ढंग दा स्वभावक नतीजा, उस निराधार विश्वास दो परम्परा गो जनम दिन्दा ऐ, जिन्दे करी मनासब तर्क-दलोलें दे थार इक जजबाती बढ़प्पन दा प्रचार करने आले वे बुनियाद मापदंड दा समर्थन कीता जन्दा ऐ।

जिस बेलै लोक जीवन दी समझ विज्ञान, दर्शन ते टेकनालोजी जनेह पेचीदा ज्ञान-खेतरें दा थार लंने दा दावा करदी ऐ तां भाशा दे

रचनात्मक विकास आस्तै बी इक दुर्भाग्य-पूर्ण रोक-रकावट सिद्ध होन्दी ऐ।

में ए खासा लम्मा उद्धरण दित्ता ऐ, पर में समभनां जे फोकलोर दे खेतर च कम्म करने बारै इस चेतावनी गी घोखने, समभने ते चेतै रखने दी लोड़ ऐ। अज्जै तगर असे चेतावनी गी आम तौर पर नजर-अन्दाज कीता ऐ।

पिछले बरै गुरुनानक यूनिवरिसटी अमृतसर च Folk Lore सेमिनार च हिस्सा लैने दे बाद, ते इस सरबन्धे च थोड़ा-मता अध्ययन करने वाद, जित्थें फोकलोर दी महत्ता बारै मेरी धारणा पक्की होई ऐ। उत्थें गै ए जिज्ञासा बी जागी ऐ, जे जिस चाली दे हालात साढ़े इस बेल्ले हैन—उन्दे च अस इस खेतरै च क्या किज कम्म करी बी सकने आं जां नई ? इस सरबन्धे च मेरा नम्न नवेदन ऐ जे ? 'फोकलोर' दे सरबन्धे च जिनें परख-पड़तालें दा सरबन्ध Linguistics, anthropology ते sociology कन्ने ऐ, उन्दे बारे च कम्म करने दी समर्थ इनें खेतरे दी चेची जानकारो रखने आले मनीषी विद्वानें वी गै होई सकदी ऐ, पर फोकलोर दे खेतर दा विस्तार इतना बड़ा ऐ जे इनें विशेष जानकारियों दे विना बी वास्तिविक रुचि ते जिज्ञासा रखने आले आस्तै बी कम्म करने दी गुंजैश होई सकदी ऐ।

I Folk Lore embraces total country life.

² Folk Lore refers to all that forms part of the culture of man from the remote past to the present -- Marius Barbeans

Folk Lore comprises traditional creations of people - premitive and civilized
 and it includes also folk-beliefs or superstitions —Jones Balys

⁴ Folk-Lore is the generic name used to denote those traditional beliefs, superstitions, manners, customs and observances of ordinary people which have persisted form earlier into later periods and which, in fregmentary modified and comparatively unchanged form have continued to exist outside the accepted pattern of contemporary knowledge and religion, in some cases down to modern times.

⁻Encyclopeadia Britanica.

कशमीरी कहावतां

इतिहासै दी पगडंडी पर जिनें गी टुरने दा सुअवसर प्राप्त होंदा ऐ, ओ कुसै देसै दे राजें ते रानियें दियां क्हानियां गै नई पढ़दे, उन्दियें लड़ाइयें, हारें ते जित्तें दा गै हाल जानने दा प्रयत्न नई करदे, पर उस देसै दी भाशा ते संस्कृति दा ज्ञान प्राप्त करने दा बी जतन करदे न।

इतिहास शब्दा दा अर्थ (हिन्दी च) ए ऐ—इति ह आस, अर्थात् यह ऐसा हुआ, ए इयां होओ। इतिहास अर्सेई ए दसदा ऐ जे एई गल्ल इयां होई, एह घटना इयां घटी ते उसदा कारण एह हा। इयां गै जे कर अस कुसै भाशां ते संस्कृति दो जानकारी प्राप्त करने दा प्रयतन करचै तां असेंई उस भागा दियां कहावतां तें मुहाबरें जाननें दा बी अवसर प्राप्त होन्दा ऐ।

ख्वान हर भाशां च होन्दे न ते उन्दे चा ओ भाशा बोलने वाली जाति दा इतिहास ते उसदी संस्कृति दी जानकारी असेंई प्राप्त होन्दी ऐ।

खोआन बनदे कियां न, इन्दां अपना इतिहास के ऐ, ए दसना कठन गै नई कदें-वदें असम्भव बी होन्दा ऐ। नेइयां गल्लां जिन्दे च लोक कल्याण दी भावना छपी दी होयै, कदें-कदें कहावतां बनी जिन्द्यां न। जेकर कोई नेयी घटना घटी जा जेदे चा लोकें गी कोई सबक थोन्दा होयै, कोई नसीत मिलदी होये तां ओ गल्ल झट खोआन बनी जन्दी ऐ।

कोकड़ी कहावत बने दे किन्ना चिर होआ ऐ, एह दसना सम्भव नई होई संकदा, पर फी वी किछ कहावतां नेइयां बी होन्दियां ने जिन्दा थोड़ा मता इतिहास उपलब्ध होन्दा ऐ।

कश्मीरी भाशा च बिड्यां सुन्दर ते दिलचस्प कहावतां न जिन्दे चा कश्मीरै दी संस्कृति दी झलकं लबदी ऐ। डीगरी च आखदें न--गल्ला दा गलयानं, इस्सै दा कश्मीरी च तर्जमा ऐ 'अलः कुलिस तुलः कुल'' अर्थात् ''घिंग्ये कद्दूं दा बूटा तूत्तें दा बूटा होई गेय।"। कद्दूं दा बूटा ते होन्दा नईं, लौकी नेयी बेल होन्दी ऐ धरती पर, भला बेल बो कदें तूत्तें दा बूटा बनी सकदी ऐ १ इसदा उत्तर इयें ऐ 'जे कदें बो नईं।" इस्सै दा अर्थ होआ 'गल्ला दा गलयान।'

कद्दूं दी वेल ते तूत्तें दे बूटे गी दिविखयै कुन्नै कदूं एह शब्द आखे ते कियां ए गल्ल खोआन बनी गेई, एह कोई पता नईं।

दूई कश्मीरी कहावत ऐ-एिक चट सुम तः सास गव क्वालः, एवक ने पुल त्रोड़िया ते हजार दरया च डुब्बी गे। इस कहावत दी कहानी बड़ी गै पुरानी ऐ। बड़े गै चिर दी गलन ऐ जे मते सारे लोक एवक बारी किट्ठ सफर करार दे से। लोकें दें उस किट्ठा च एक अक्लमन्द नेया बी सा, जिसी शरारतें दे बगैर होर कोई बी गल्ल नई सो सुझदी। ओ आदमी झटपट अग्गें होआ ते पुलै पर दौड़न लगा। पार पुज्जियै उसने अपने कुआड़ू कन्ने पुलै दे एक्क रस्से गी बड्डो सुट्टेया जिसदा परिणाम एह होआ जे ओ सारे दा सारा पुल दरया च डिग्गिय रुढ़ी गेया। हन बाकी दे लोक के करदे ? कियां पार जन्दे ? वड़ा गै मुक्कल होआ, पर हारने आले ओ नई से। जाना बी जरूर सा, अन्त च दो त्रै जवान सामने आये वामां कुंजियै, डौलें पर नजर मारी, 'ओ केड़ा कम्म ऐ जेड़ा अस नई करी सकदे, ओ केड़ा तफान ऐ, ओ केड़ा दरया ऐ, जिस्सी अस नई बन्नी सकदे ?' मनै च धारणा जाग्रत होई, निश्चा दृढ़ होआ ते उनें त्रौनें कन्ने सारे लोकें दरया च छालां मारी ओड़ियां। लैहरां आखन असें गै लंगना ऐ, पर मानु आखें मेरी शक्ति दे सामने कुन खड़ोई सकदा ऐ ? ...पर अद्द बश्कार पुजिनमें दरेया दना डूंगा सा, पानी दी तेज़ो बो बदी गेई। 'होनी' दना भर हस्सिय लोप होई गेई . ते ..सारे दे सारे लोक पानी दे कन्ने गै रुढ़ी गे। एह ऐ इस कहावत दी क्रानी। तुस कोई रवाज गै बदाई लौ ते पी दिक्लो कियां गरीवें दियां तकलीफां बदी जन्दियां न ।

व्याह च कुड़ियें गी दाज देने दी प्रथा मते चिरै दी ऐ, अमीर निमयां निमयां गल्लां कडदे रौहन्दे न, ते गरीबें दा गल घटोन्दा रौहन्दा । ऐ कगमीर च नेयी गल्ल लग्गी दी होये, नेया प्रसंग छिड़े दा होये, ते चानक गै खोई जन्दा ऐ—एक चट सुम तः सांस गव क्वलिः।

एवक खोआन ऐ "अल कशमीर मोरदः पसन्द", एदे च कश्मीरियें दी उस प्रकृति दा जिकर कीता गेदा ऐ जिसदे सहारे कन्ने अज्ज कश्मीर बड़े गर्वा कन्ने सिर उच्चा करियें खड़ोत्ता दा ऐ। ओ प्रकृति, ओ आदत ऐ सारें कन्ने प्रेम करना, सारें दा आदर करना, कुसै कन्ने नफरत नई करनी, इस कहावत दा अर्थ ऐ जे कश्मीर मुदें गी बी पितन्द करदा ऐ, ते जेड़ा मुदेंई बी पितन्द करदा होयें, ओ भला जीन्देंई की नई प्रेम करें ? कश्मीर च मुदें दा कदें बी

अपमान नई होन्दा, मुर्दे दा गै नई, कुसै दा वी अपमान नई होन्दा। इनें सिफ्तें दे मूजब गैराष्ट्रिपता बापू गान्धी जी गी आशा दी सच्ची ते सुच्ची किरन कश्मीरा च गैलब्बी सी।

हस्सने ते खुश रौहने दा महत्तव इनें किछ शब्दें च किन्ने सुन्दर ढंग कन्ने दस्सया दा ऐ। आखदे न "अस्सः नय तः लस्सः कियः पुठि" — "हस्सां नईं ते जियां कियां।" मानु दा जीवन वास्तव च अजीरन होई जा, जेकर ओ कदें बी हस्सै नईं। ए परतीत होन्दा ऐ जे ए कहावत बनाने आला मता सारा दुखें दा मारया दा हा, नानक दुखिया सब संसारै आली गल्ल उसी चेत्तै उठी आई होग ते उनें लोक कल्याण आस्तै सारी मानवता गी जीने दा सबक सखालने आस्तै ए शब्द आखे।

असः नय तः लस्सः किथः शुठि १ हस्सां नई ते जीआं कियां १ हस्सने गी किन्ना महत्तव दित्ता गेया दा ऐ, इस खोआनै च, एदे पर बचार करना लोड़चदा ऐ।

मनुक्ख जेकर अपनियें त्रुटियें पर आपूंगै हस्सने दा जतन करै, उनेंई आपूंगै आलोचनात्मक दृष्टि कन्ने दिक्खै ते ओ मुनुक्ख छोड़ियै देवता नई वनी जा १ इस आस्ते सफल जीवन बिताने आस्तै हस्सना ते खुश रौहना बड़ा गै जरूरी ऐ।

इक खोआन होर प्रस्तुत ऐ। "हर मोखुक गोसोंई", अर्थात् हरमुख दा गसाई (साध्) हरमुख कश्मीरै दे उत्तर पासै एक्क पहाड़ ऐ जिसदी ऊंचाई सतह समुन्दर कोला 16905 फुट ऐ। इस कहावत दा अर्थ ऐ—'नेया मुनुक्ख जेड़ा मता गैं मन्द बुद्धि होये। जिस्सी पढ़ी-पढ़ियै बी कक्ख समझ नई आवै, मेहनत करी-करियै बी कक्ख पिड़-पल्लै नई पवै। जेड़ा सदा इक्कै नेया रवै, कदें कोई उन्नति नई करै, उस्सी आखदे न "हर मोखुक गोसोंई।" इस खोआन्वै कन्ने इक कत्थ बी जुड़ी गेदी ऐ। कत्थ एह ऐ:

मते चिरै दी गल्ल ऐ जे कश्मीरै च एक्क साधू सा जेड़ा रोज सवेरै उिट्ठये हरमुख पहाड़ पर चढ़ने दा जतन करदा सा, पर दिन भर जिन्ना उप्पर चढ़दा सा रातीं उन्ना गै पैंडा उदा घटी जन्दा हा। ओ सवेरै उत्थें गै पुज्जा होन्दा सा जित्थूं ओ टुरदा हा, पर उस जवान्नां ने बी हिम्मत नई गै हारी। ओ नित्त चढ़दा गै रेया।

इस गल्लै गी बारां वरे बीती गे पर ओ उप्पर नई गै पुज्जा। आखर समां बदले आ, उदे दिन फिरे। एक दिन उन्नै एक बकरवाल प्हाड़ै परा उतरदे दिक्खेया साधू ने उस्सी पुच्छेया, "तूं इस प्हाड़ै पर चढ़ी सकनां एं। तूं हरमुख प्हाड़ै दे शिखरै पर बी कदें पुज्जा ऐं ? उत्थें तूं के दिक्खेया हा ?"

बकरवाल ने जवाब दित्ता, "में प्हाड़ा दे उप्परा होई आयां, चोटी परा। उत्थें में एकक चरजें आली गलल दिक्खी ऐ।"

''भला के'', साधू ने हरानगी कन्ने पुच्छेया। बकरवाल बोलेया, 'उत्थें एक खसम-त्रीमत से। आदमी एक नेह जानवरा दा दुइ चोयै दा सा, जिसदा सिर मुनुवलै दा सा। उन्ने मी दुइ पोने वास्तै आखेया हा, पर में ओ दुइ जूठा होने दे कारण नई पीत्ता।

साधू बोलेया, "जूठा होने दे कारण तूं दुद नई पीता? भला आदमी एं तूं? खैर, पी के होआ ?"

बकरवाल ने जवाव दित्ता, "पी के होना हा, उने बदो वदी उस दुहा दा टिक्का मेरे मत्थे पर लाई ओड़ेया", साधू समझी गेया ओ शिवजी पारवती से। उसने बकरवालें गी दना कोल जाइये आखेया, "भला दस्स हां कुत्थै ऐ ओ टिक्का ?"

बकरवाल कोल आया ते साधू ने झट जीब्बा कन्ने उदे मत्थे परा ओ टिक्का चट्टी लेया। पर ए के होआ १ टिक्का चटदे सार गै साधू बकरवालै दे दिखदे-दिखदे गै उप्पर उडि्ड्यै गासै पर लोप होई गेया। साधू अपनी मंजला पर पुज्जी गेया हा। बारें बरें दी तपस्या सफल होई गेई। ए ऐ इस खोआने दी कत्थ।

जदूं बी कश्मीरै च कुतै नेह मुनुक्त दी गल्ल लग्गी दी होयै जेड़ा कोई उन्नित नई करी सकै, जेड़ा मन्द वृद्धित मन्द गित होयै, उस बेल्लै इयै आखदे न "सु छु हरमुखुक गोसोंई" अर्थात् ओ ते हरमुखै दा साधू ऐ।

जेकर संसार च मातूं संभितय नई चले ते सारा जीवन गै व्यर्थ होई जन्दा ऐ। उस्सै आस्तै मातूं गी संसार च समभाव कन्ने, इक्कै नेया रौहना चाहीदा ऐ। तां गै ओ सुली रेई सकदा ऐ। रातीं न्हेरे च चलने आस्तै साढ़े कोल प्रकाश दी एक किरण कन्ने जरूर लोड़चदी ऐ, अर्थात् दुखें च समां गुजारने आस्तै साढ़े कोल चार पैसे होने चाहीदे न, सुख दा साह् लैने आस्तै साढ़ कोल शारीरिक मानसिक जां मानसिक शिवत जरूर कन्ने लोड़चदी ऐ। इस्सै वास्तै कश्मीरी च इक्क कहावत ऐ—होद गव जि कुनुई म्योंड, अर्थात् भत्ता दा आखरी ग्राह सुक्का थोआ ते समझो सारा भत्त गै सुक्का खाद्दा । सारी उमरी जेकर सुख गै भोगेया होयै ते अन्त च दुख मिलै ते समझो सारा जीवन गै दुखी रेह।

करमीर च लोक भत्त खान लगन ते पहले भत्ता दा ग्राह मुं आं च पाइये ते फिरी साग जां न्यौड़ा खन्दे न । इस्सै आस्ते ए कहावत असेंगी इये सखान्दी ऐ जे सब चीजां कन्ने-कन्ने गै थोड़ियां-थोड़ियां खानियां लोड़चिंदयां न ।

जीवन द्र्पण—साढ़े लोक गीत

मध्यप्रदेश दे आदिवासिएं दा इक लोक गीत ऐ, जिसदा भाव इस चाली दा ऐ:

'…जेवर तुसेंगी मेरे जीवन दी सच्ची-सच्ची क्हानी सुनने दी तांग होयें तां तुस मेरे लोकगीत सुनो ं '' आदिवासिएं दो करमा जाति दा ओ लोकगायक अनपढ़ गै होना ऐ, पर लोक संस्कृति दा उस गी किन्ना ज्ञान हा। इस करी लोकें दी ए धारणा ठीक गै जे लोक गीत जन-जीवन दा दर्पण होंदे न।

इंदा जनम मनुक्ख जाति दे इतिहासै कशा दूर पैहलें होआ हा। लोक अदूं लिखना-पढ़ना नेहे जानदे जदूं उनें अपने हिरख ते बसोस अपनी कार-किरत ते रैत-बैत दे बारे च अपने लोक गीतें राहें बोहासरना शुरू कीता हा। इस्सै करी शायद इंदे च इन्नी सादगी ते मसूमी भरोची दी ऐ। ए हवाऊ दे फनाके आला लेखा हौले फुल्ल ते करीरी दे फुल्लें बांगर कोमल होंदे न, जिंदी हल्की हल्की रंगत ते मद्दम-मद्दम खुशबोई लोकें गी मोही-मोही लंदी ऐ। ते पनखरुएं दे गोतें वांगर हर चाली दे वंधनें थमा अजाद होंदे न। पर इसदा ए मतलब नईं जे इंदा कोई सुरताल नेई होंदा। इंदे सुर मिसरी कशा मिट्ठे होंदे न, ते इंदे ताल इच निंदएं दे पानी आली रवानी होंदी ऐ। एह मन्नी दी गल्ल ऐ जे मनै दी मौज औने पर जेड़े बोल मने दा बित्थें अंदरा निकलदे न ओ शास्त्र जां व्याकरण दे बंधनें च नई वज्झी सकदे। इनें गीतें गी कुसै तानपूरे, तबले जां हारमोनियम दी मुथाजी नई होन्दी। मोर जिस वेलै अपने फंग खलारियै पाहल पांदा ऐ तां जंगल-जाड़ै च वी गुलजार खिड़ी उठदी ऐ, इयां गं जिस बेलें कोई ज्यूड़ा कन्नें औंगली देइये लोक गीतै दी भाख चुकदा ऐ तां ओ रंग बझदा ऐ, ओ रंग बझदा ऐ जे गल्ल नई पुच्छो। थक्के-हुट्टे दे लोके दा हुट्टन हटी जन्दा। जीवन थमां नरास होए दे दुःखी लोकेंगी नमीं आस-मेद बझदी ऐ। जीने दी

हुट्य जागदी ऐ। इये जनेई इक भाख मता चिर होआ सुनने दा मौका लग्गा हा— किछ मजदूर घ्याड़ी भर हड्ड-तरोड़ मेहनत करिये इक छप्पड़ी पर बैठे दे ते कन्नें औंगली देइये गा करदे हे:

> "माहें दिआ दाली कन्ने होंदी रसवादी, हेड़मां दा साग बनायां बरागनुआं, चिट्टे-चिट्टे दंद तेरे बनी-बनी पौंदे, मस्सी दी धार सुटायां वरागनुआं ॥ "

कुसै गरीव प्हाड़ी घरिस्ती दा कैसा जानदार चित्र खिच्चे दा ऐ कुसै लोक किन । माहें दी दाली कन्ने बादी होई जा तां गंढी दा पैसे खर्चने दी लोड़ नई। अनमुल्ली ते आपसरी वे-हसाब जम्मी दी हेड़मां दा साग गै वादी दी कारी ऐ। ते फी "बरागनु" शब्द दो तरकीव कैसी अछूतो ते ला-जवाब ऐ।

अपने डोगरो लोक गीतें च मोह-ममता वी सुद्दी भरोचो दी ऐ। इन्दे इक-इक बोलें च कोमल कालजे दियां धडकनां भरोची दियां न। साढ़े सुखें-दुखें दी, बराहग-बजोगें दी इक उज्जवल झलकी लबदी ऐ इनें गीतें च। इन्दे च नर-नारी दे गै नई पशु-पक्खहएं दे सुभा-सुआत्मै दा पता लगदा ऐ।

कोई गवरू खट्टी-कमाई करन वांहडै जन्दा ऐ ते कलापी लाड़ी दो रोहली मूजब पिच्छे छोड़ी जन्दा ऐ इक छिल्लू, पर ओ वेजवान पशु बी अपने मालकै दा इन्ना मंदा बुभदा जे घा दो इक त्रिम्व जात नई पांदा, फी जनाना जात दा के हाल होग, जिसदा कालजा फुल्लें कछा वी कोमल होंदा ऐ:

> ''तेरा लगदा मंदा वो गद्दिया, तेरा लगदा मंदा। निक्का नेआ छिल्लड़ू, पिच्छें छोड़ी गेआ तूं, घा-पत्तर नई खंदा—ओ गद्दिया, तेरा लगदा मंदा...।''

इनें लोक गीतें दी एबी बड़ेआई ऐ जे इस बड्डे भारे देसे दे उत्तर थमां दक्खन, ते पूरव थमां पच्छम तोड़ी दे कुसै बी प्रदेश दे गीत होन, उन्दी भाशा चाहे कोई बो होये, पर उन्दो आत्मा, ते आत्मा दी पीड़ इक जनेई होंदी ऐ। पंजाव दे जन-जीवन दे बारे च लखोई दी कताव, "The Scented Dust" इच आँदा ऐ जे पंजाब दे मशहूर लोक गीत 'माहिया' कन्ने रलदा-मिलदा इक लोक गीत इटली दे गद्दी लोक भिड्डां चारदे होई गांदे न। दौनें गीतें दे क्षेत्रें वशकार भाएं कोएं दा छिंडा ऐ वो दौनें दी विरहों-बेहन इक जनेई ऐ। ते चबातें आली गल्ल एह ऐ, जे इटली दे उस लोक गीतें दा ते पंजाब दे माहिया ते डोगरी लोक-गीत 'चन्न दा मीटर (छन्द) इक्कें घाटै दा ऐ। ते बिरहा दी पीड़ इनें त्रौनें लोक-गीतें च इक जनेई ऐ।

डोगरी लोक-गीतें च डोगरें दे सुमा-सुआतमें दी, उन्दो राह-रीत दी, उन्दे गरीबड़े सादा-सिंद्दे जीवनै दो पूरी तारी तस्वीर उतरी दी ऐ, जियां आक्खो उस जीवन अग्गें कोई दर्पण टिके दा होयै। डोगरें दे मेहनता जीवन दे परसे दो सुन्धी-सुन्धी वाशना, ते उन्दे क्षातराने जीवन दे जोश दियां धुड़कनां उनें गीतें च साफ स क्षात् सेई होंदियाँ न। इनें गीतें दी भाशा अति सरल ते मिसरी-मिट्ठी ऐ। अपने सोहाग-घड़ियें ते विरहा गीतें ते बिसनपतें दे बोल सुनियें जित्थें रोम-रोम खिड़ी पौंदा ऐ, उत्थें वीर-रस भरियां 'बारां' सुनिये सीतल हड़्डें च वी गरमैश आई जन्दी ऐ। इक विसनपते दे बोल न:

" में चाएं चाएं मांजनियां थालियां— मेरे शाम गोरे ते में काली आं । मेरे हत्य माए छापां ते ङूठियां— मेरे शाम सच्चे, ते में भूठी आं—शाम जी...।"

डोगरी लोक गीतें दियाँ केई ढानियां न:

वारां, कारकां, सोहाग, घोड़ियां, वेहाइयां, भाखां, विसनपते, सिठनियां, लोआनियां।

इतें गीतें च, भगित भावना बीररस, शंगार, हास्य रस ते करुणा आदि सब्बै रस मजूद न। इनें गीतें गी अपने जीवन दे सुखै-दुखै दे साथी गलाचै तां जथार्थ गै होग, की जे साढ़े जन्म कशा वी पैहलें भर्मां लेइये एन्तिऐ तोड़ी ए साथें-साथें चलदे न।

प्रसूता होने च दौं-क महीने बाकी रौहन्दे न, होने आली माता दा (पैहली प्रसूता बारी) 'ठोआं' दा संस्कार होन्दा ऐ। मेदबार जनानी छैल शनान-ध्यान करिये रत्ते पीड़े बेइये सिर गुन्दांदी ऐ। अपनी कुला रीत अनसार अपने कुल दे ते दूए देवी देवतें गी मत्था टेकदी ऐ (जे सुखें-सुखें ते सम्मे-सीले प्रसूता होये) सोहागनां बेहाइयां गांदियां न;

"...नन्द घर जम्मे कृष्ण मुरार, बधावां मेरे राम जो, चंदन ड्योडी हाली भूम्मे, नोवत बजै दरबार । नंद घर जरमे कृष्ण मुरार, बधावा मेरे राम जी...।"

लोक किव देसे च जरम लैने आले हर बालके दे बारे च तबक्का रखदा ऐ जे उस विच श्री राम ते श्री कृष्ण जी बाले किश न किश गुण जरूर होंगन।

ते फी जागत दे जन्म उपर जेकड़ी खुशी होंदी ऐ, ओ घरै दी तंगी-तुरशी दे सौ-सौ अड़बन्ध त्रोड़िय बी बाहर आई जन्दी ऐ। इयां सेई होंदा ऐ जे उस खुशी ने घरै दी सारी लचारियें ते लोड़ें-थोड़ें गी थोड़े चिरै लेई अपनी बुक्क ली च

लेई लेआ ऐ। ते जेकर खरे बसदे-रसदे घर जागत जम्मै तां उत्थोआं दी खुशी दा ते ठकाना गै नई होंदा। कुड़ियें-चिड़ियें दे ढोलको गीतें इलावा बेहाइयें ते बधावें कन्ने घर गूंजी उठदा ऐ। इस मौके दी इक बेहाई दे वोल नः

"गोरी दे अंगन फुल्ल जे खिड़ेया, खिड़ेया असल गुलाब।
गोदां हरियां होइयां...
भावो ननतें गल्लां लाइयां. बेड्यै करन हसाव.

भाबो ननदैं गल्लां लाइयां, बेइयै करन हसाव, गोदां हरियां होइयां...

बच्चे दी खिड़े दे असली गुलाबै कन्ने कैसी अछूती उपमा दित्ती ऐ,

जागत सुखै कन्ने गवरू होआ तां उसदे व्याह दियां तेआरियां होन लगदियां न। जागते दे व्याह दे मौक जेकड़े लोक गोत गाये जन्दे न, उन्दे च होर गल्लें दे इलावा उस घोड़ी दी बड़ी मैहमा ते सराहना होंदी ऐ, जिस उपर चिंह्यै लाड़े ने लाड़ी व्याहन जाना होंदा ऐ। इस करी उनें गीतें दा नां गै घोड़ो पेई गेदा ऐ। भला जी घोड़ी दी इस कशा मती मैहमा होर केह होना ऐ जे ओ कृष्ण जी दे विन्दावन थमां मंगाई गेई ऐ:

> "ए घोड़ी मेरे लाल दी, विन्द्रावना मंगाई ऐ । मुल्लें मंगाई लाड़े दे बाबलें, हर हर बज्जी बधाई ऐ...।"

इक होर 'घोड़ी' दा एक बन्द ऐ:

"घोड़ी ते तेरी बीरा लैहरी, कि राम जी ने चढ़ के। बरनी ऐ सीता रानी, कि जाना शैहर जनक पुरी॥"

इनें 'घोड़ी' गीतें च कुतै-कुतै टिकचर-टचकौली दी चास वी हुन्दी ऐ: "...वा - वा क फुल्ल झमीरी दा, वा - वा क नखरा भीरी दा। वा - वा क फुल्ल जोआनी दा, वा - वा क नखरा न्यानी दा॥".

इनें गीतें च गै सेहरे दी वी बड़ी मैहमा होई दी ऐ:

"ओ पुछदी-पुछांदी मालन, नगरी जे आई, कुत घर शादी वाला ऐ। आमेयां तूं मालनी, वौंमेयां पसारुये, गुन्देयां वीरे दा सेहरा ए। कित लक्ख सेहरा तां मालन, कित लक्ख लरजां,

किन्ना सेहरे दा मुल्ल ऐ ?

मालनी गी बड़ा मान ऐ जे उसदे गुन्दे दे सेहरे गी बन्ने वाभु लाड़ा लाड़ी नई ब्याही बींदा, इस करी पसोई दी ओह सेहरे दा मुल्ल पांदी ऐ—त्रै लक्ख डब्बल ! "...जी इक लक्ख चम्बा, मालन, दो लक्ख कलियां त्रै लक्ख सेहरे दा मुल्ल ऐ।"

मराजै दी मां परता दिन्दी ऐ;

"जी इक लक्ख लेई लै मालन, दो लक्ख लेई लै, त्रै लक्ख कुसै नइयों देना ऐ।"

इनें गीतें च लाड़े दी माऊ गी, चाचिएं, मामिएं कन्ने हासा मखोल

बी चलदा ऐ:

"लाड़ा मंगदा तमोल, लाड़ा मंगदा तमोल । माऊ पल्लुआ दा खोल,लाड़ा मंगदा तमोल ।। मामी पल्लुआ दा खोल, नई ता वासनी फरोल— लाड़ा मंगदा...।"

दूई वक्खी कन्या वाले घर जेकड़े दर्द-बेदन भरे गीत गोआ करदे होंदे न उनेई 'सोहाग' गलांदे न, की जे कन्या दे अटल सोहाग दी सुच्ची कामना इन्दे च भरोची दी हुन्दी ऐ। इनें गीतें गी सुनिय, कोई बड़ा गै कठोर हिरदा होग, जेड़ा सिमकी नई पौग। कन्या पक्ष दा सारा वातावरण इनें गीतें करी दोआस-दोआस वभोंदा ऐ, की जे धी रानी वछोड़े पाइयै जा करदी होंदी ऐ। ते उद्दर कन्या बचैरी बछूरे पा करदी होंदी ऐ जे अपनी अम्बड़ी, वावल, सहेलड़िएं कशा विछड़ियै ओ दूर जा करदी ऐ:

''अज परौनी होई मेरे बाबल, तेरी परौनी होई तेरे घरें दी परौनी होई।

माता रोंदियां सिज्जी जन्दा बेहड़ा, बाबल रोंदा गल लाई। मेरे बाबल तेरी परौनी होई...।"

राम गी बरियै सीता जी ने जेकड़े दुख कसाले-भोगे. उनेंई दरगुजर करियै अज वी श्री रामचन्द्र जी गी गै कन्या वास्तै आदर्श वर मन्नेया गेआ दा ऐ:

"...बाबल एक मेरा कहना कीजिये। 'मिगी राम रत्न वर दीजिये।"

कन्या दे पिता पासेया खोआए दा ऐ:

"जाइये वर आंदा में टोल के, जियां केसर कसुम्बा घोल के...।" इक होर थार कन्या अपने मनै दी घुंडी खोली दसदी ऐ: "बाबल इक मिगी पच्छो-ता बड़ा, औं ते आं गोरी वर सांवला।"

आखर कन्या गी विदेशा करने दा ओ दर्दनाक बेला आई पुजदा ऐ।

कालर कन्या गा विदेया करदे वेले कलपदे होई गलाया हा "धी कछा

बिछड़दे होई जे मेरे जनेह तपस्वियें दा ए हाल होआ करदा ऐ ता घरिस्ती लोकें दा के हाल होंदा होग।"

कन्या दियां घमाइयां ते बछूरे सुनियं कालजं पच्छ-जन लगदे न । इस सोहाग गीतं च कन्या ते उस दे साक-नातें दियां बेदनां सिसकियां सनोचदियां न :

"बोल निं मेरिये बागें दिए कोयले, बाग छोड़ी वन को चलिएं ? बाबल मेरे बचन जे कीता, वचनै दी बही दी में चली आं...।"

इस्सै मीके दा इक होर दर्द भरेया सोहाग ऐ:

"इनां गलियां दे विच बिच बे, बाबल डोला नई लंगदा, दौ इट्टां पुटा सुट्टां गे, धिये घर जा अपने...।"

"सिटनियां", ए बी व्याह दे मौके दे गीत न। इन्देच कन्या पक्ख वालियां जनानियां लाड़े गी ते जन्यारें गी मखौल करदियां न। औन्दे लाड़े दी खातर हौदी ऐ:

"आयां एं वे तूं आया एं, मा क़ुत्यें छोड़ी आयां एं? मां छोड़ी सन्यारें दें ते नूठी लेई आयां एं...।" इक होर सिटनी दे बोल न:

"आ जा आ जा जीजा साढ़ कारखाने, तुगी लोहे दा कम्म सखा देइये। तेरी मांदी वन जाये रेल गड्डी, तेरे बापूदा इंजन वना देइये। तेरी भैनूंदी बनी जा लाल झण्डी, उसी दिल्ली दी सैर करा देइये...।"

डोगरे मानु मुंढा गै धर्मी सुभा दे हुन्दे न । अपने 'कुल दे' ते वाकी देवी देवतें उपर उनेंई पुट्ठ-पुट्ठ श्रद्धा होंदी ऐ, जेकड़ी डोगरी भजनें ते विसनपतें च भरोची दो लबदी ऐ। इनें विसनपतें दे बोल इन्ने मिट्ठे होन्दे न, जे सुनियै मन गद-गद होई जन्दा ऐ:

"...मास सै सेइयो सैंसे सुखाए, पिजरैं रेई गेइयां हिंड्डयां, मेरे राम विना, मेरे हिर विना, दिन निक्के रातां बिंड्डयां...।" इक होर बिसनपते च इक भगतन अति निमतो होइयै गांदी ऐ:

"...मेरे हत्य माए छापां ते तूठियां, मेरे शाम सच्चे औं भूठी आं, शाम जी...।"

अपने भगती भाव दे इलावा डोगरे अपनी दलेरी ते वहादरी लेई बी मशहूर न । इस करी 'बारें ते कारकें दा डोगरा जन-जीवन कन्ने बड़ा नेड़मा साथ ऐ। 'वारां' ओ लम्मे-लम्मे गीत न, जिन्दे च कुसै सूरमे दी वहादरी दा वखान होयं। इनें गीतें दे बोलें च बीर रस इस चाली भरोचा दा होंदा ऐ, जियां संगतरे दी तुरिएं च खट-मिठा रस भरोचा दा होंदा ऐ। सरंगी ते चिमटे दे तत्ते ताल उपर जिस बेलें द्रेस लोक कोई बार लांदे न, तां हारे हुट्टे दे लोकें अन्दर नमा जोश उम्बलन लगी पौंदा ऐ। इस्सै करी लड़ाइये पर जन्दे सूरमे गी दरेस लोक बारां गाई सुनांदे होंदे हे। जरनेल वाज सिंहै दी वारें दे किश वन्द इस चाली न:

"वड्डी सरकारा दा लिखेया आया, आया जरनैलें दे कच्छ लोको। मियां बेठा भटोलिया चक्क लोको, भाईचारा बी वेठा दा कच्छ लोको। चिट्ठी दित्ती हलकारे ने हत्थ लोको, तुसें जम्मुआ पुज्जना अञ्ज लोको। तुसें जाना चतरालें गी पक्क लोको, जित्थें दुइमनें दी पेदी दस्स लोको। तलवार सोभदी मियें दे हत्थ लोको, मुच्छें पर पौदे न त्रै-त्रैं बट्ट लोको। जाई सुट्टने फट्टो-फट्ट लोको, बाज सिंह नां जरनैलें दा...।" (डुग्गर दा जीवन दर्शन)

इयां गैं 'कारकें' च देवी देवतें, शहीदें ते कणी वाले लोकें दी मैहमा गाई दी होन्दी ऐ। बारें ते कारकें दा तवारीखी तौर उपर बी काफी मुल्ल पौन्दा ऐ। इन्दी दौलत केई भुल्ली विसरी दियां घटनां इतिहास च जोवादान पांदियां न। कारकें दा धार्मिक महातम बी मता ऐ। बावा कौड़ा, बावा सिद्ध गोरिया, बावा जित्तमल, मई मल्ल आदि सिद्धें ते शहीदें दियें समाधिये पर मेले लगदे न ते कारकें दियां चौकियां लगदियां न। गारड़ी ते जोगी लोक बारां ते कारकां लोकें दे घरें जाई वी सुनांदे न। वावा जित्तो दे शहोद होंदे बेले दे बोल न:

"...छालीं मारें जितमल बावा, विच खलाड़े दै आई।
रोह चढ़े दे बावे जित्तो नें पैहलें भन्नी ऐ पाई...।
...अवलीं गैहरियां, गल्लां लैहरियां, विरसिंह गल्ल गलाई।
दिनें वड्डना, रातीं गाहना, तुद छोड़ी ग्हार पुजाई...।"
"रुढ़ी गेआ धर्म थोआड़ा मैहतेया, त्रुट्टो मित्राचारी।
रुक्खी कनक नि खायां मैहतेया, दिन्नां मास रलाई।
रामो सम ध्यांदा बावा ते पेट कटारा लाई।

साढ़े डोगरा प्हाड़ी जीवनैं च भूत, डैनीं, मसान ते जड़िएं गी अर्जे बी दखल ऐ। किश कनीति लोक अपने स्वार्थें लेई, भोले-भाले छोकें गी जड़ियां खलांदे न, उन्दे उपर मसानें दे बोआन सुटदे न, ते ए आम मानता ऐ जे इनें जड़िएं मसानें दे शकार लोक बड़ा दुख भोगदे न । जड़ियां खाने वाले गी

वोहले दे विच तड़फै बावा कामें रौली पाई...।"

कुसँ 'थान्नै' पर रस्सै चिढ़ियँ 'जिड़ियां' खडांदे न, ते जोगी-गारड़ी लोक ढोल-थाली दे तालै पर 'जिड़ियां' नां दे गीत गांदे न:

"डरदे मारे सम्हेलें जोगी, माता कोल बठाई। उल्लू निलयां, सिंहै दियां तिलयां नौलें दी मरगाई। चौं चूकें दी मिट्टी लैंदा, घुम्बरुएं दा पानी। जुगती दस्स हुन तुएं नाथा, गोली कियां खलानी। बिच कन्नै दे सम्हेलें जोगी, जुगती सब समझाई।"

इनें अटपटे बोलें च ओ सिरस्ता ब्यान कीता गेदा ऐ जिस राहें गोली बनाइयें जिड़यां खलाइयां गेइयां होंगन। गीतंं दे ताल उपर जिड़यां खाने वाला रस्सा पकड़ियें भोआंटिनयां लैंदा ऐ ते फी फामां होइयें पेई जन्दा ऐ। उनें लोकें गी यकीन होई जन्दा ऐ जे जिड़यां नच्चने कन्ने सारा खुट्ट--खुटाला हटो जन्दा ऐ।

इन्दे इलावा साढ़े जीवन कन्ने सरवन्ध रखने वाले हर भाव दे, हर मौके दे लोक गीत हैन, जिन्दे च संजोग-बजोग, तंगी-तुरंशी, मेहनत-मुशक्कत दी तस्वीर दे इलावा कुसै-कुसै तस्वीर दी घटना दा चित्र बी जोरदार शब्दें च खिच्चे दा होंदा ऐ । साढ़े देसै च "चौत्रिएं दा काल" नां दा बड्डा काल पेआ हा। उसदा कँसा दर्दनाक ते जानदार हाल कुसै लोक किव ने लिखेया हा:

लोको चौत्रिएं दा साल, कन्ने पैंत्रिएं दा साल। असे बुरा बिन्देआ।। ओ विको गे बालू ते बरलाक, असे बुरा बिन्देआ। होरनें बेचे बन्देह गैहने, लोहारिये बेचे फाल, लोको चौत्रिएं दा साल...।"

इक होर गोतं च इक बजोगन इस चाली बोहासरदी ऐ:

"सलियां घारां पौन फोहारां, मेरा रेशमी चीरा सिज्जेआ ओ,
चीरे गी घोन्नियां छम्-छम रोन्नियां,
सज्जन परदेसें टोरेआ ओ...सेलियां घारां...।"

विरहा-वेदन डोगरी लोक गीत 'चन्न', 'रोला' ते कुंजू चंचलो' नां दें गीतें च मती उभरी दी ऐ। 'रोला दे बोल न:

> "...तेरे सिरं पर बनदी टोपी रोला, असें सारी बसोहली तोपी रोला, कियां मिलगे ओ ? कुत्थें मिलगे ओ ?"

"चन्न" नां दे विरहा-गीत च अपने प्रीतम जां प्यारी गी चन्नै कन्ने उपमादित्ती गेदी ऐ:

"चिट्टी चन्ना चादरी, फुल्ल पामां धागें दा, इक बारी मिल चन्ना, फिरी मेला भागें दा।"

इक होर भान्ति दे चन्नै दे बोलें च विरहा-बेदन होर बी मती डूंगी ते पैनी बझोंदी ऐ:

"चन्न माहड़ा चढ़ेआ ते लगा पारें केरिया, बलगदो जोआनी चन्ना, बैठी बत्ता तेरिया, कियां मेला होग मेरी जान हो । मिलना जरूर मेरी जान ओ...।"

इस लोक गीत व इक प्हाड़ी घरिस्ती दी गरीबी दा इक सरोखड़ पर दर्दनाक चित्र खिच्चेआ गेदा ऐ:

''खल्ल मदानै पौंदी वरखा, धारें पौंदा पाला। अग्ग तिष्पयै सिर मुंह होआ काला। डंगर सुक्की सम्बी गे, थोंदी नई पत्तर टाली ओ। कोहलिया आटा मुक्की गेआ, ते चाचू दिन्दा गाली ओ...।''

इक होर लोक गीतै च इक वाल विघवा दी दर्द भरी क्हानी थोड़े जनेह शब्दें च गै मुकाई दी ऐ:

"निवकी हुन्दिए दे कैन्त मरी गे,
के गुजारा रंडियें दा ?
अखें देरें जेठें बस जे पेइयां,
घा बढांदे दंदियें दा !
जी तरसाई जान जे कढदे,
टुगड़ा दिन्दे तंगियें दा !"

डोगरी लोक गीतें च रुतें दा ते रुतें च जन-जीवन दा बड़ा सुन्दर चित्रण होए दा ऐ। साढ़ें कंडी दे रक्कड़ इलाके च बरखा दी मुथाजी गैरौंहदी ऐ, इस करी उत्थें चेचे तौर पर बरखा दा स्वागत होन्दा ऐ। अपने कैंते दी बजोगन नारै गी ते बरखा रुत उआं गैं बौरी करी छोड़दी ऐ। अम्बरै पर छाये दे काले डिग्गल दिक्खियें बजोगन नार खिझी उठदीं ऐ:

"...काले बद्दल चढ़े शोमाना, भूठे कौल कीते बेईमाना मिल दगेबाजिआ भौरा, तुद बिन बांवरी होई...।"

इक होर गीतै दे बोल न:

"बरखा बरदी कणी कणी, सुरमा पांदी जनी खनी...।"

बरखा दी बरीक फड़ी दिक्खिय कुसै लोक किव ने कैसी सुन्दर बन्दश बन्नी ही:

"...निक्किएं फुइएं इन्दर बरसै ते कणिएं रुण-भुण लाई।"

इयां गै गासा उपर विजली दा मलाका दिविखयै कुसै गी कैसी उपमा सुझी ही:

"बिजलो मिलकी अम्बरै दा, ते गोरी निकली अन्दरा दा...।"

गरमी दे मोसमै दा बी अपने लोक गीतें च छैल चाली वर्णन होए दा ऐ। इस लोक गीतें च गरमो दे कोप ते बरखा नई उतरने करी हाहाकार मची दी ऐ:

...भाई तिजयां भैनां, जोग नि चलै मेरा बल्द हो, खसम भुलाई दित्ते नारियां, गमां नि देन बिंद दुइ हो, धारा धारा पर सोकड़ा. गरमी मचाया कैसा जुदद् हो, बर मेघड़ा राजा मेरेया!"

स्याल बी गरीबें आस्तै घटट् दुख-दायी नई होंदा :

"...गज गज पाला साढ़ै कोठे पर पेया दा, ते रपटी देया दा आले में इक्कली ने कियां कियां चुक्कने न, ए पालें दे ठाले तेरे सोह...।"

ते बांदी ब्हार (बसंत रितु) दा बखान बी डोगरी लोक-गीतें च घट्ट जोरदार नई:-

> "॰हारां परतोई आइयां, रितां बलदोई आइयां फुल्लियां बागें करीरां-भौरा देसै आई जाना । अम्बर चिलकन छोड़े—धारें मुक्के वछोड़े । पौगर, पौगरी ऐ——भौरा देसें आई जानां ।

डोगरी दे बारां माहें च बी जन-जीवन दी छैल भलकी लबदी ऐ। इक बारां मांह दे किश बंद इस चाली न:

> "...कत्तं दयाली माही जी घर करो, मघर नि जायो घर लेफ पुराने, पोह दे पाले कंता डाढे फुलदे, माघ माही जी घर लोहड़ी आई। फौगन नि जायो काहन जी, होली दी ब्हार, गोपियें संग खेडडो होली प्यारे..."

डोगरी लोक गीतें च भंभोटिएं दी बी वड़ी मैहमा ऐ। इस भंभोटी इच जेड़ो जनाना गोतें च खास करी गाई जंदी ऐ, इक नमीं-नमीं बोही दो जोआंटड़ी दे मनै दी पीड़ फरोली दी ऐ। पीड़ अनमेल ब्याह दी ऐ। गीत बड़ी मिट्ठी रेहा कन्ने जनानियां रिलयें गांदियां न:

> ''खुए पर खड़ोतिये बांकिए गोरिये, कैत होइएं दिलगीर वे। जां तेरी सस्स लड़ाकड़ी मोइए, जां तेरे मापे न दूर वे। आप बड्डी बर छोटड़ा मापेयां दित्ता लड़ लाइ वे...''।

साढ़े देसै च सबै परती अस्सी लोक राही-बाही जां मेहनत मजूरी करियं गुजारा करदे न । उदे जीवन संगी किश 'किरती गीत'' जां सोहाडियां बी लोक गीतकारें गंडी दियां न । मक्के दी गोड्डी करदे होई करसान लोक किट्ठे रिलयें गांदे न :

> "मक्कें दी गोड्डिया—से—ऊ आ, दम्में दी गोड्डिया—से—ऊ—आ, लद्दे दी धारा—से—ऊ—आ, पौन फोआरां— से—ऊ—आ,

इयां गै प्हाड़ै पर बाढ मुक्कने पर मजूर लोक दयारै दे बड्डे-बड्डे गल्लर धरीकदे होई ए सहगान गांदे न:

> "भाई सरोरे—होई सा। दाल भठोरे —होई सा, गल्लर भारा—होई सा। गरिया ज्हारा —होई सा, भाई जवाना —होई सा। पेई मदाना —होई सा, ओ मेरे भाई —होई सा। करो कमाई —होई सा, दयारै दा लट्ठा—होई सा। जोर व। कट्ठा होई सा।

सै इस चाली अस दिक्खने आं जे डोगरी लोक गीत डोगरा जन-जीवन दे साथें — साथें चलदे न।

ब्याह च सिठनियां

हर मुल्खा च ओदे अपने रीति-रवाज, अपनी भाशा हुन्दी ऐ, ते ओदे च ओदियां अपनियां भाखां, कवितां, क्हानियां, चुटकले, लेख, महावरे, फलोनियां, गजलां, गीत हुन्दे न ।

पैहलो-पैहल जदूं इस धरती पर मनुक्खा दी कोई भाशा नई ही ओ अपनी गल्ला गी दुए तगर पजाने लेई जरूर (इ) शारें ने गै कम्म लेंदा होना ऐ, जदू बल्लें-बल्लें भाशा बनी होग तां अपना दुक्ख-सुक्ख बीती दियां गल्लां बोली बोलिये अपनी छाती हौली करन लगा। पर बीती दियें गल्लें गी ओ बठोरी-बठोरी सम्हाली नई हा सकदा। जिन्नां चिर चेता रौहन्दी, चेतै रौहन्दी ते फी भुल्ली जन्दी। उनें दिनें थमां कत्थां, क्हानियां वनियां होनियां न, उनें दिनें थमां गै मनुक्ख ने अपने दुखें-सुखें गी कत्थें क्हानिएं ते कविताएं च चित्रियै मनै गी सन्दोख बुज्भेया। पर इनें कत्थें, क्हानियें, कविताएं ते गीतें दी उमर वड़ी थोड़ी हुन्दी हीं, जिन्ना चिर ए कत्थां, क्हानियां, गीत कवितां मुंहे-मुंह फिरदियां रेइयां, निमयां नकोर गैरेइयां ते जेल थोड़ी वी रोक आई तां उत्थें गै ओदी मौत होई जन्दी। भूल्ली भल्ली जन्दियां। परे जेलै भाशा ने अवखरें दा रूप अपनाई लेया तां मनुष्पसं अपनी कोती दियें पुरानियं गल्लें गी लिखी-लिखी साम्बेया होता ऐ। जमाने दे बदलने दे कन्ने-कन्ने इन्दी सम्हाल करनी बी औवखी होई गेई होनी ऐ । इन्दा कोई नां-नशान नई रेया, पर लोक गीत, कविता, भाखां जेड़ियां इक दिलै थमां दुए दिलै तकर, इक होठै परा दुए होठें तकर पुजिंदयां रेइयां । इक बरासत-जन बनी गेई, जेकी जिस गी वी उये सम्हाली रखदा ते औने आली पीढ़ी गी सौंपी ओड़दा, इस इस वरास्त गी असें बी सम्हालना लोड़चदा, तां जे अगली पीढ़ी हासल करी सकै।

जित्थें मनुक्खा ने दुखें च विरहा दे गीत गाए, उत्थें उन समें समें पर मिली दी खुशी च बी गीत गाए, इनें खुशी दे गीतें गी गांदे-गांदे उन्न नच्चना-त्रप्पना वी सिक्खी लैता।

किवयें ते लखारियें गी उआं वी चन्ते थमां दुआ थाहर थोए दा ऐ। ए लखारी किव समे दी चाल गी दिवली अपनी कान्नी ते स्याई दे सहारें काकलें पर तस्वीर खिच्ची टकांदे न। ए बड़े दूर-दर्शी हुन्दे न इस लेई ए बेचले थाहरें बी छपी दी चीजा गी सौहगे होई तुप्पी लैन्दे न। इन्दी त्रिक्खी नजरें कोला कोई वी छप्पा-गुज्जा नई रेई सकदा।ए मनै दी पींगा पर वेइयें कदें-कदें चन्न सूरजै थमां बी अगों दा चक्कर कट्टी लैन्दे न। ते कदें-कदें समुन्दर इच चलोबी लाई औंदे। अन्दरा बी फरोलो-फरोली करी लैन्दे न। इक थाहरा वेइयें ओ सारें वक्खी नजर रखी सकदे न।

साढ़े डुगगर देश इच बी केइयें नेह किवयें जनम लैता जिन्दियां रचनां अज्जें तकर साढ़े कोल मजूद न पर उन्हें किवयें दे नाएं दा कोई थौह पता नेई ऐ। इन्हें गीतें इच बडडें-बडडें दी वहादरी ते धार्मिक श्रद्धा प्यार दा बडे सोहने ढंग कन्ने चित्रण कीते दा ऐ। ए लोक-गीत, जिन्दे च भाखां पवंगीत टोलरूए, बिहाइयां, घोडियां, सुहाग, सिटनियां सब्वे साढ़े डुगगर धरती दे गैहने न, दुख च विरह दे गीत ते खुशी च नच्चने-त्रपने आले गीत गोन्दे न—वेलै-वेलैं सिर मौके गी पनछानदे। आपूं-बिचें मखील-मशकरियां वी करदे ब्या कारजें इच लाड़े गी सौहरिये सिठनियां दिन्दे नं। लाड़ी गी लाड़ी दे सौहरिये इनें सिठनियें कन्ने त्रुम्बी खन्दे। पर सौहरिये गैं जरूरी नईं। अपने घर आपूं बिच्चें वी ए मशकरियां चलदियां न।

ब्या सांती कोला गै शुरू हुन्दा ऐ। जिस बेलै पन्त होर सांत करान्दे न ते जनानियां पन्तै गी सिटनी इस चाली दिन्दियां न :

> पन्त जी तुस सांत कराई दियो पन्त जी, पन्त जो तुस बब्बरू छपाई लयो पन्त जी, पन्त जी किश उरें-परें किश अगों-पिच्छें, किश बोभे इच पाई लयो पन्त जो ।

ते जेलै हबन करान्दा ऐ तां इस चाली दी सिटनी दिन्दिया न ः

सा ती दी पोथी पन्ता रसी-रसी पढेयां, हवन बत्थेरा पन्ता सरफा नि करयाँ ।

हवन करने परैन्त जे पन्त होर थोड़ा बी घ्यो बचाई देन तां इस चाली जनानियां उसी भड़िदयां न।

25

पन्त जी इयो थुल्ला कुत्त पाना—स्वाहा। ओलिया पायो मौलिया पायो, किश बाहरा दे बाहने घर पजाओ ।

हवन करने परैन्त बाहरा दे आए दे साक-सरबन्धी, नन्द्रोड़ जागता दे सिर तेल पान्दे न, नायन ने तेत आला भांडा लैते दा हुन्दा ऐ ते बारी-बारी सारे ओदे इच पैसा-पैसा पान्दे न । जनानियां आपूं बिच इक दुए गी सिटनी दिन्दियां न :

छनक कटोरडिये, कुन्न पाया तेल वे, होरनां पाया पैसा-पैसा माऊ पाया रपेया वे, पैसा घेला मुक्की गेया ते माऊ दा मुंह सुक्की गेया।

ते जेलैं तेल पाने दी बारी बापू हुन्दी आई तां:

हाए बो मेरेया पैसेया, में औक्खी घड़ी दा जोड़ेया, जाऊं-जाऊं पैसा लग्गन लगा, लाड़े दा बब्ब आखन लगा। हाए बो मेरेया पैसेया! में औक्खी घड़ी दा जोड़ेया।

बुटने दे परेंत बारे भरदे होई त्रीमतीं मामी गी आखदियां न जे मामा ते कोई राजे दा बेटा सेई हुन्दा ऐ पर मामी बड़ी तेरोतालन ऐ, बड़ी खचरी ऐ, चलाक ऐ:

भली की ती जिन जागतै दे मामे दर विच खुआ लुआया ऐ। जां

वारे भरदा मामा, बारे भरदा मामा, सुई तेरी पगडी मामा, जोरू तेरी खचरी मामा।

सिठनी बनाने आले ने बड़ी सोचा समका कन्ने मौके-मौके गी किस चाली चित्तरी टकाए दाए। मौके गी दिखदे होई किन्नी बरीकी ने कम्म लैता दा ऐ हर बेले गी गीतें च समझाई उड़े दा ऐ। सेहरा बन्नदे मौके दे चित्र गी दिक्खों, सिठनी इस चाली ऐ—

भला जी मुगट सेहरा लाड़ा आपूं जे बनदा ते

पैंचा गी सरम नई आई।
भला जी छिनकी छिनकी तिनयां लाड़ा आपूं जे कसदा ते

नाइये गी सरम नि आई।
भला जी दुइ कटोरा लाड़ा आपूं जे ल्योंदा ते

माऊ गी सरम नि आई।
भला जी सुरमा सलाई लाड़ा आपूं जे पांदा ते

भावियों गी सरम नि आई।

सेहरा पैंच गै बनान्दे न, बड्डे वर्जुर्ग गै बनान्दे न, ते तिनयां नाई कसदा ऐ, मां दही पलान्दी ऐ, भावियां सुरमां पान्दियां न, भैनां आंचल झोलिदयां न ते भ्रा स्हारा देइये घोड़ी'र बाहलदे न। घोड़ी चिढ़िये लाड़ा सौहरें घर जन्दा ऐ। उत्थें पुजने'र सौहरियें वक्खी दियां जनानियां लाड़े गी पुछिदयां न जे ओ आपूं ते आया पर माऊ गी कुत्थें छोड़ी आया ऐ:

> आइयो वे तूं आइयो वे, मां कुत्थें छोड़ी आइयो वे औन्दी ऐ वेई औन्दी ऐ, चवच्चे वेई के नौहन्दी ऐ।

लाड़े गी जनानियां सबनें बक्खी दा घेरी लैता दा हुन्दा ऐ। इस बक्खी जनानियां सिठनियां गारदियां न—

जे तुसें आन्दियां पित्तल परातां अग्गें ते साढ़ियां उच्चियां जातां । साढ़ा बेहड़ा टप्प वे, टप्प वे डारी पटवारी देया पुत्तरा, साढ़ा बेहड़ा टप्प वे।

दूई वक्खी दियां जनानियां लाड़े गी आखदियां न—
असी नेइयों भुलदे असेंई रवारे भलाया,
मुण्डा ते साढ़िया परसिन्दा नई आया,
ए गलल बनदी नई ।

लाड़ा इनें गी इस लेई परिसन्द नई आया की जे— साढ़ी कुड़ी छैल वे, तूं चफड़ियां दी मेल वे, साड़ी कुड़ी दारा वे, तूं चफड़ियां दा गारा वे।

अपनी चीजा गी कुन नई सराहन्दा, कम्हार बी अपने घड़े गी सराहन्दा ऐ। लाड़े गी उच्चा-लम्मा दिक्खी जनानियां आखदियां न—

वे तूं लम्मा-लम्मा, लम्मा कोठे देया थम्मा डारी दे केत गुने। मेरी मां गेई वांसा हेठ म्हीना सी जेठ में माऊ दे पेट लम्मा ऐत गुने।

लग्ना च बैठे दे लाड़े कन्ने आए दा बरा-सुई दे ट्रैंक गी खोलने लेई जनानियां ते कुड़ियां आखदियां न —

> बरा सुई, बरा सुई बिच डोडा खोलो बरा सुई, बरा सुई जागतें दा बब्ब रोडा खोलो बरा सुई। बरा सुई बरा सुई बिच मंजी खोलो बरा सुई, बरा सुई जागतें दी मां गंजी खोलो बरा सुई।

बब्बै गी रोडा ते माऊ गी गंजी बनाने दे परेंत गैहने दिक्खी लाड़े गी सिठनी दिन्दियां न —

उरड़ी लाड़िया उरड़ी वे, तेरी खाखा पेई गेई भुरड़ो वे उल्लू लाड़िया उल्लू वे, तूं पराने आन्दे फुल्लु वे अतरी लाड़िया अतरी वे, तूं दाढ़ी की नई कतरी वे लौंग लाड़ेया लौंग वे, तूं पराना आन्दा चौंक वे।

लाड़ी दे कपड़े-गैहनें गी दिक्खी कुड़ियां जनानियां अन्दरो-अन्दर खुश ते हुन्दियां न पर बाहरो-बाहर सिठनी च गांदियां न—

सस्सू दे गैहने साढ़िया कुड़िया गी आये, कुड़िया ते साढ़िया दे पसन्द नि आये, नमें बनवाने पे, नखट्टुओ लज्ज तुआनू नई ।

व्या दे दुए रोज जान्नी लेई रूट्टी हुन्दी ऐ। लाड़ा खान जान्नी दे बशकार बौन्दा ऐ। आले-दुआले लाड़े गी दिनखने आलें दा तान्ता-जन लग्गी जन्दा ऐ। जनानियां लाड़े गी सिठनी इस चाली दिन्दियां नः

> लाड़िया खान दी के पई, तेरी मां कुत्थें गेई ? जन्दो ऐ तां जान दियो, टिड्ड भरी खान देयो, टिड्ड भरी खागे, फी मां तुष्पन जागे ।

किश जनानियां लाड़े गी सिठनी च इस चाली आखदियां न :

लाड़े दा टिड्ड बड़ा चरकुना, खन्दा सारेयां तो दूना इसी होर देयो जी, इसी होर देयो जी ए अज्जा दा वी भुक्खा ऐ कल्लै दा वी भुक्खा तार सवारे दा बी भुक्खा मंगलवारै दा बी भुक्खा इसी होर देयो जी । इसी होर देयो जी

रुट्टी खन्दी जान्नी पर जे कुसै दी नजर मामें पर जाई पेई तां नां लेइयें (फर्ज करो मामें दा नां प्रकाश ऐ) इस चाली सिठनी दिन्दियां न—

आ जा - आ जा प्रकाश साढ़े कारखाने,
तैनूं लोहे दा कम्म सिखा देइये।
तेरी माऊ दी बन जाये रेल गड्डो,
तेरे बापूदा इंजन बना देइये॥
तेरी भैनां दी ला लेइये लाल भण्डी,
तैनूं जम्मूदी सैर करा देइयै।

ते जे नजर लाड़े दे भा पर जाई अटकी तां इयां सिठनी दिन्दियां (फर्ज करो भादा नां सरूप है) तां—

असें इको कड़छी रिद्दी माह-छोलेयां दी दाल सरूप लेई पतीला नस्सा माह-छोलेयां दी दाल जन्दा रस्ते च ढट्ठा माह-छोलेयां दी दाल उत्थे लम्मा पेई-पेई चट्टे माह-छोलेयां दी दाल आखै बड़ा स्वाद लग्गा माह-छोलेयां दी दाल।

फी जे लाड़े दा चाचा लब्बी जा तां इस चाली भण्डदे न (चाचे दा नां परस राम ऐ)—

परसो जुड़ जा वैस्का दे नाल वैस्क तेरी के लगदी ? अखें कियां जुड़ां एदे नाल ए मेरी मां लगदी।

ते फी ओ लाड़े आली बबखी परतोंदियां न। सिठनी इस चाली ऐ—

लाड़ेया रिन्न सरेयां दा साग मसाला में दिन्नियां, कर भैनूं दा दान, भनोइया में दिन्नियां ।

सिठनी देने आलियें जनानियें, कुड़ियें दी त्रिक्खी नजरें कोला जागतै (लाड़े) दा मसेइया नई बची सकेया —

वे मकोड़ेया वे तेरी जात बुरी, खसमखानेयां वे तेरी जात बुरी, लाड़े दें मसेइये लाई फतुई, मकोड़ें खादा थुई, मकोड़ेंया वे तेरी जात बुरी।

सिठनी गी सुनदे जागते दे दादे ने मुच्छें गी बट्ट दित्ता, खबरै इस लेई जे जनानियां-कुड़ियां उसी दिवलै दियां गै नईं, पर मुच्छें गी बट्ट दिव्दे गी त्रीमतीं ते कुड़ियें दिवली गै लैता—

कुन कुन चलेया हरिद्वार, हर गंगे पेई हर गंगे। लाड़े दा दादा चलेया हरिद्वार, हर गंगे पेई हर गंगे। पैहली चलोबी गेया पताल, हर गंगे पेई हर गंगे। मच्छी ने फड़ेया मुच्छैं दा बाल, हर गंगे पेई हर गंगे। मुड़ी नई औन्दा हरिद्वार, हर गंगे पेई हर गंगे।

दादे गी गंगा दी चलोबी लोआइयै जनानियें सारें पासँ इक नजर कराई ते दिक्खेया जे कोई बचेया ते नईं। दूर कोने च बैठे दे बोइये पासे नजर जाई अटकी—

खिन्तूं मेरा लीर दा नि मैनो रैंहन दे। शामसुन्दर पुत्तर झीर दा नि भैनो रैहन दे। खिन्तूं मेरा लीर दा नि भैनौ रैहन दे। उत्तम पुत्तर गुज्जर दा नि भैनो रैहन दे।

रुट्टी खाने परैंत लाड़े गी तमोला लेई, लेई जन्दे न। जनानियां सिठनी गान्दियां न, सिठनी च पुछिदयां न जे इन्नी देर की लाई ऐ—

अन चट्टी देया तूं इन्नी देर की लाई, वे अन चट्टी देया। अन चट्टी देया हुन मां देने आई, वे अन चट्टी देया।

ढोल टमाके ते बजदे बाजें कन्ने लाड़ी गी लेइये जान्नी घरा गी परतोन्दी ऐ। घर पुज्जने पर अजें बाहर गैं डोला हुन्दा ऐ ते वेसरियां जनानियां कुड़ियां होले दा मुंह खोलने लेई कहारा गी इस चाली आखदियां न—

डोले दा मुंह खोलो वे बेईमानो क्हारो डोले उप्पर लाची वे वेईमानो क्हारो देई जाएओ अपनो चाचो वे वेईमानो क्हारो।

होले विचा निकलदी लाड़ी गी दिक्खी जनानियां आखदियां न-

लाड़ी लम्मी ऐ, लम्मी ऐ, लम्मी ऐ, असां शुकर कीता माऊ जम्मी ऐ।

अन्दर बौन्दे-खड़ोन्दे जे लाड़ी दी बाई च पेदा लाल चूड़ा, सुन्ने दियां बंडां ते कलीरे छनकी पे तां इस चाली सिठनी दिन्दियां न—

लाड़ी कड़ियां न छनका, साढ़ा लिंगर न डरा।
लाड़ी थाल पेई मठेयाई, लाड़ी गल्लां करदी आई।
पर किश जनानियां लाड़ी गी ओदी माऊ लेई पुछिदयां न—
लाड़ी तूं कियां आई तेरी मां की नई आई,
साढ़े अज्जा दी घडी।

उन्न कियां औना हा उन्न जम्मनी कुड़ी, उन्न साढ़े औना हा दिन्दे लौंग दी पुड़ी।

लाड़ी दे प्योके बक्खी दा न्यान ते झीरी बी आई दियां हुन्दियां न। न्यान गी लाड़ी दे कोल-कोल बौन्दे दिक्खी जनानियें सिठनी दी त्रुम्व कराई गै दित्ती ते इदे कन्ने भीरो गी बी जाई पलचाया—

असां के करने पत्तरां बाज करेले न्यान इयां दिक्खदी जियां चाम-चिड़क दे ढेले, असां के करने पत्तरां बाज मूली झीरी साढ़े आई से मुण्डे दी गजुली।

इस चाली दियां सिठिनयां व्याह च चलदियां न। इनें सिठिनयें दा चस्तार इन्ना गैं नईं, इन्दा वस्तार वड़ा लम्मा-चौड़ा ऐ। इयै नेइयां सिठिनियां बड़ियां सारियां ते कल्चरल अकैडमी ने बड़े जतना कन्ने किट्ठियां कीती दियां न, पर अजें होर बी बड़ियां खिल्लरी दियां न, जिनें गी चुनी-चुनी साम्बना साढ़ा सारें दा कम्म ऐ, फर्ज ऐ, की जे इयै साढ़े देसा दे गैहने न जेके अस ब्याह-कारजें च लान्ने आं।

 \Diamond

साढ़े किज नमें प्रकाशन

- ! इक चादर मैली जनेई
- 2 गृह दाह
- 3 कलमकार चरण सिंह
- 4 सोमदेव भट्ट कृत कथा सरित सागर
- 5 डा० इक्वाल ते उन्दी कवता (शीराजा दा चेचा अंक)

सम्पादक/अनुवादक
श्री विश्व नाथ खजूरिया
श्री० मदन मोहन शर्मा
श्री राम नाथ शास्त्री

थी केदार नाथ शास्त्री

जन-जीवन ते ओदी घोख

परंपरा ते नमें समें दा भक्खड़

जित्थें गैहरी जोवन बनौटी, उपराला, बदरंग ते नकली हन्दा ऐ, उत्थें जनजीवन भलोका, सादा, सच्चा-सुच्चा समफेया गेया ऐ। जनजीवन दे विचार विश्वासें च पले दे, अनच्पड़े मनोक्ति श्रद्धा कन्ने लवड़ोये दे आस्था दो लीहा पर चले आवा दे न । जनता ने उनें गी बड़ी सांवा कन्ने पाले दा ते सुरक्षित रखे दा हन्दा ऐ। दूर पासे समे दी चक्की, जिस गी लोक काल चक्कर वी आखदे न, बड़ी तेज गति कन्ने उनें गी पीहन्दी जा करदी ऐ। केइयें गल्लें दा फक्का गै नई रेया। विश्वासें परम्परा गी बतेरा पूंजी बांजी तौकडे पर सजाइये रखेया। पर सच्व पुच्छो तां समां बड़ा बलवान ऐ। जियां कुसै आखेया-'समां सनां स्म्रथ, ओई अर्जन, ओई धनखवान, ओई अर्जन दे हत्था ' नेया बेला बी इक बारी औन्दा ऐ। अर्जन दा धनखवान कुसै कम्म नई औन्दा। जेदी टनकोर त्राह कडदी हो ओ बेकार होई गेया। अर्जन बेबस होई गेया, ओदा बाहुवल जन्दे नई लब्बा। हुन दी गल्ल गै नई लाओ। समा मता विवली गेदा ऐ। जिस पुरानी घासियें सनासन लीह ते पट्टी भलेयां पूंजी देनी ऐ। समां बांदरा आंगर उनें चीजें गी पुट्टी-पट्टी, थूई-थाई, मली-मुली, बन्ने सुट्टग। अज्ज केइयें गल्लें साथ छोड़ी दित्ता ऐ। ते पुरख-पुरखी चलदियां गल्लां अन्नी अन्धी च सतोई गेइयां न। केई चीजां थोआ दियां, केई छुड़का दियां न, केई चीज़ें दा चित्त-चेता गै नई रेया। जेड़ी जनता सांवदी ऐ ओ छोड़दी बो ऐ, जिस वेलै ओ छोड़ै फिर कुन सांबै। इक पासे ओ परम्परा ते संस्कृति दी रखवाली करै करदी ऐ दूये पासै ओ नमें असरात जजब बी करदी जादी ऐ, इयै इस कल्चर दी सिक्स ऐ।

कोई बुड्डा जिस बेलें उस बीते दे समें गी अपनी स्मरण शक्ति राएं मुड़ी परखदा ऐ, तां ओ उस पुराने जमाने ते हुना ते जमाने च लक्खें हत्थें दा फरक दिखदा ऐ। उस गी मलूम हुन्दा ऐ जे उस अपनी बत्ता च के किज लंघया, के किज छोड़ेया ते के किज लैना पेया। किन्नियां रस्मां ते रवाज समें ने निगले।

चेते परानी रस्में दे ते बदलदा समां

होलियां औनियां, स्वांग बनाने, झांकियां निकलनियां, पतंगी वनने, अलते-कुमकुमे चलने, कुड़ियें कनाकतियां रखनियां, मुंह-न्हेरे सेज पूजनी, फुल्लें कन्ने वरखा करनी। ते फी लोहड़ी पर म्हीना पैहले जागत एरनी मंगदे हे (एरनी ग्रब्द अरनी कोला निकलेया ऐ) । तरकालें जागतें दे भूढ़ घर प-घरी लकड़ियां मंगने गी ट्री पौन्दे ते हरन बनिये समां बन्नी दिन्दे । शैहरा दे जागतें बाश पाई छज्जे बनाने उनें छज्जें दी नुमायश इक चलदा-फिरदा नजारा होंदा। कुस केड़ी टोली दा छज्जा चंगा हा-छज्जे दे नमें थमां नमें डिजायन, अद्भुत कारीगिरी, चमक-धमक ते नवीनता लेई कोशश होंदी। टोलियें शादी आले घर जित्थें जागत जम्मे दा होयै जाना। घरा आलें खुशी-खुशी रपे देने। छज्जा बनाने आलें दा घर-दर पूरा होई जाना, मेहनत सुकरत होनी, ते अग्गों आस्तै पैहलें कोला वद्द कला दस्सने दी प्रेरणा मिलनी। पर हुन किज बरेंदा छज्जेंदा रवाज दिनो-दिन घटदा जादा ऐ। तबदीली दा के आखना। दूर कुत्थें जाना, ग्राएं च ग्वालें दियां खेडां विसरा दियां न । तलाएं दी बीठना पर बोढ़ी दी झौंगरी छाईं हेठ बारांगाट, गड़चालां नईं रेइयां। लोकें घरें च जागतें भी ठड़ेकने गी 'तम्बु तारु' मामे दुद्ध प्यारे ते लटपई, भुलाई दित्ती। ए भलोकियां गहलां औघड़ लब्बन लगियां न । दुनिया दिनो दिन अकलमन्द बनदी जा करदी ऐ। भलोका दे मैने न Simplton वेवकूफ। सधारन आदमी 'लाफिंग स्टाक' वनदा ऐ, की जे उस च सहज भाव ऐ। ओ लसेट नई जानदा। कुसै दा मौजु नई डुआंदा।

साढ़ी जन-कला दे म्हिसदे नशान

कुड़ियें दे गीट्टे-खिन्नूं आम खेडां हियां... पर हून मितयां घट्ट दिक्खने च औदियां न। आपूं विच्नें भुल्ल भलोके, खिन्नूं खेडने, थाल चाढ़ने। कुड़ियं दा गुड़िडी-गुड़िड दा ब्याह आम मशहूर ऐ। लीरें दे टल्लु-थिगड़् बनाना, दाज जोड़ना, पालकी बौंगुले दा सिरस्ता करना। ते जद कदें निम्बलें वदला गी हार दित्ती तां गुड़िडा फूकना कुड़ियें। फूकदे मौके शैल लुआनी दिन्दे पिट्टना ते हस्सी-हस्सी दोहरे होना। ए आम विश्वास हा—गुड़िडा फकोआ ते वरखा उतरी। कुसैं सुरत-परत नई रौहनी। ए खेडां लोप होई गेइयां। इन्दे पर अज्जै दे जागत कुड़ियां नक्क-मुंह चाढ़दे न।

33

रस्मां-रवाज ते पुरानी जनकला अपना बिस्तरा गोल करा दी ऐ। समें दा जाल बड़ा मोकला ऐ ओदा कोई आद-अन्त नई ओ सब किज ग्रसदा जा दा ऐ। समां विसतार ग नई रखदा। ओ चमत्कारी बी उन्ना गै ऐ। ते चमत्कार च बड़ी ताकत ऐ। इक पास टऊ बनांदा ऐ दूए अपने लशकारें करने अक्खीं मटाई दिन्दा ऐ। इसदा बसीकरण जवरदस्त ऐ। तुस अपने घरें गो दिक्खो किन्ने सफली वनी गेन । उनें पुराने कोठें पसारे ते दलानें दा थां बैठकें लेई लेया । मारतें च सीमेंट बरतोन लगा । जनानियें दा गोआ पट्टा छुड़केया। उस गोये च गै किन्नी कला हो - गोआ फेरदे गुडि्डयां बनानियां, पसारें ते कन्दे-कोहलें ताकुड़ें पर भिट्टी च बेल-बूटे, तित्तर-मोर बनाने, चप्पन गेगड़ू ते देवी-देवतें दे थाना गी सजाना। उस Bas-relief च करमीगी दा नमूना हुन कुसै पुराने घरै च गै लब्बै तां लब्बै। जनानियें दी सजौट इक निकेवला गुण हा। जनानियें च सैहल-संघेत ते सजौट कुदरती मादा ऐ। ओ इस्त करी गृह-लक्ष्मी खुआन्दी ऐ। जनानी दा सज्जा हत्थ कला दा पता दिन्दा ऐ। ते कला अकलो कन्ने औन्दी ऐ। उनें त्रीमतें घरा गी थोड़े बिच कियां स्वर्ग बनाये दा ऐ। ग्राएं दियां जनानियां जिनें गी शैहरू दिक्लिये हसदे हे - अपने घरें कोठें गी कियां लेपी पोची सुन्दर बनांदियां हियां, ताज्जुब लगदा ऐ । पुरानी जन-कला दी कवरी पर साढ़े आधुनिक समाज दे महल्ल खड़ोआ करदेन। उनकरने तराशने च कला दी खूबसूरती दस्सने आले कारीगिर तरखानें दो कला बी मुक्की गेई। सत्थरी-तेसे दा कमाल, लवड़ी दे थम्म, सिरी, पैंट, परछत्ती, भित्त सब सज्जी जन्दे हे। ओ कला दे अद्भुत नमूने सुखना होई गे। अज्ज जेड़ा कोई मंगदा पद्धरा कम्म मंगदा ऐ। इस पद्धरे ने Carving दी कला गी पद्धरा करी दिता। ए डोगरा कला अज्ज खत्म होआ दो ऐ। पंजाब खेत्तर दे डोगरें स्त्री दी जनकला सांवी दी ऐ। ते गुरदासपुरा च अज्ज बी कुसै-कुसै कोठे पर एदे दर्शन जरूर होई जांगन। पर ए समें दे जाता कोला वाहर थोड़ियां न। होई लिखनी, तुलसी दा कुण्ड सजाना, राड़ें दे दिनें बिलें दे दुआले रंगें बनिगयां ठुआलिनयां, रीझा कन्ने चित्र मरारे वनाने, नाग पंजेयां गी नाग लीकने । ओ केड़ी गल्ल ही, ओ केड़ा घ्यार हा, जिस च जनानी अपनी कला दा प्रदर्शन नई ही करदी। जिया कुड़ी ने जन्म लेया माऊ गी ओदे ब्याह दा फिकर पेई गेया। दाजा आस्ते सालू ते चोलड़ियां कड़ुनियां, बटुये खलीयड़ियां वनानियां। लीरें दे खिन्तूं, गुड्डे-गुड्डी, घोड़े हाथी सव बनाने । चरखे आस्ते मालां ते सीने आस्ते धागे बट्टने ते रंगने । जोड़ें गी कनारी, गोटा, किंगरी, चंपा लाना, ए सब उस गृहणी दा कम्म हा। खरादियें दी कला बी खतम होई गेई। केई किस्में दे रंगील पावे ते पीढ़े। उनें पीढ़ें गी जनानियें कौडियें कन्ने सजाना, उस पर बुड्डी सस्सू ने बौना हुन्दा हा। मंजे दी सूत्री रंगिये उस च 'चकोर कड्डियां'

वनानियां। सव चीजां कला कन्ने उग्गड़ित्यां हियां। अज्ज ते दरयासा आस्तै गुड़िडा-गुड़िडी नईं लवदे। अज्ज विजली दे पक्खे आई गेन। नाड़ा दे पक्खे कट्ठे होने आले ते चौरस रौहने आले केई वुनतरें च बनने ते अबरका ते फुमने कन्ने सज्जने। हर चीजा गी सुआरने दो कोशिश कीती जन्दी ही। नाड़ा दे विन्ने हुन फिर बदोई पेन। किन्नी कारीगिरी ऐ – उनें जनाने हत्थें दी। खजूरा दियां पिनख्यां ते पंघां बुनिनयां। रसोई च घियूर बनाना ते चरोलियां कड़िडिनयां। 'मुकन्द बड़ी' दा नां-थेह गै नईं रेया, 'सिरोपला' दा रवाज बी गेया। नमीं लाड़ी ने दुफेरे औना होयै, जां फिर कोई तीरथें गेदा परतोआ दा ऐ, दरवाजे च चौंक पूरना, उस पर पूनियां रखनियां। किन्ना कामल सत्कार ऐ! गोलियां ते टोकरू पत्थने ते उन्दे उप्पर रंगामेजी छिक्के विन्ने तगर सजौटा कोला नईं हे बचदे। जागत जम्मेया धुड्वा बधाई लेई आया। इक कागद लीरें ते बरकें दा झाड़-जन हुन्दा हा, जिस च वेलां, चिड़ियां, तोते पता नईं होर के-के बने दा हुन्दा ऐ। इस गी दलाना च सजौटा लेई टंगी दिन्दे। जागतें जरा पछान आई, ओ उस रग-बरंगी चीजा कन्ने गल्लां करदा पकड़ने गी हुशकनियां मारदा ते कसूतिड़यां भरदा हा।

कला तकर पुज्जने गी कला पारिखयें तै स्टेजां दस्सी दियां न । पैहली स्टेज ऐ—जिस बेलैं जरूरत पौंदी ऐ, दूई स्टेजा च शकल बनदी ऐ जेड़ी उस जरूरता गी पूरा करें। त्री स्टेज ऐ उस चीजा गी आकर्शक बनाना. सजाना, सफाई दस्सनी—जिस बेलैं कोईं पुरानी तरजा दे घरा च बड़दा ऐ—तां पैहलें उस गी सफाई मिलदी ऐ। अन्दर जन्दे-जन्दे कला हांबी-हांबी दिखदी ऐ जे औन आला कला पारखी ऐ जां निबड़ अनजान ऐ—उस कला च डोगरा गृहणी बोलदी ऐ—'ए आऊं जे।' जिस गी तुस अनाडी, अनपढ़, सूध ते भलोकी आखदे ओ। फिरी उपै गल्ल समां दंद कीचदा सब किज निगलदा जा दा ऐ। शैहर ग्रां दा बन्ना त्रुटदा जा दा ऐ। ते कल्च दें ए नशान म्हिसदे जा दे न। ते फी इक कहानी—इक कत्थ रेई जानी ऐ।

डुडू बसन्त गढ़ दे दों तेहार

डुडू-वसैन्त दी गल्ल लगदे सार गै सैली-सैलियां धारां, ठिण्डियां फुहारां ते दयारें दियां रौंसलियां कतारां छड़ी अवसीं अग्गें फिरी गै नई जिन्दियां, मन आत्मा तोड़ी सीतलता सुरकाई जिन्दियां न ।

रामनगर तसीलै दा ए उत्तर पूर्बी लाका कोई चालीं मील लम्मां ते 15-18 मील चौड़ा ऐ। इसो गै अस प्हाड़ आखने आं। इत्थों दा घ्यो, गुच्छियां बनखशाँ, राजमाँह, पिष्पलीं, धूफ आदि नेकां चीजां दूर-दूर जाई विकदियां न।

अज्जै तगर (आजादी दे पंजिएं बरें बाद वी) इस लाके च सिड़कें दी सौख नई होने कारण छड़ा जड़्तें दे जोरें गै औन-जान हुन्दा ऐ। ते ए आखियें छड़ा सुक्का-मुक्का मनें गी सन्तोष देने आली गल्ल जरूर ऐ जे पैदल प्हाड़ें पर उतरदे चढ़दे कसरत बी होई जन्दी ऐ ते नजारे मुफत लब्बो जन्दे न। खैर उन्दियां लिखतां उपै जाने। अस इत्थै इनें प्हाड़ी लोकें दे उनें दौं त्यारें दी चर्चा करने आं।

'चेतर म्हीना' इस लाके च खुशियें दा म्हीना हुन्दा ऐ। ते सारे इसदा स्वागत बड़ी खुशी नै करदे न। खेतरें-खुम्बें चा पाले घली गेदे हुन्दे न। कुक्कड़ियां (मक्कां) राहने दी त्यारी हुन्दो ऐ। सयालै दो मैल पिण्डे उप्परा तुआरने दे दिन हुन्दे न। तबी चा मिन्छ्यां फी थोन लगी पौंदियां न (तबी डुडू ग्रां बिच्चें बगदी ऐ)। भद्रवाही लोक झिक्कै दा अपनियां भिड्डां लेइयें सयोजै रस्तै घर परतोन लगदे न। इयां एह म्हीना खास करी डुडू आस्तै बड़ियां रौनकां लेइयें औंदा ऐ। भद्रवाह गी जाने आले रस्ते उप्पर डुडू इक बड़ा पड़ां ऐ।

इस म्हीने दे त्रै सोंआरे (सोमबारें) दो बण्ड पता नई कटूं कोला चली आवा करदी ऐ। पैहला सोंआर गरैडियें दा (चिडियें दा) दुआ कुडियें कंजकें दा ते त्रिया सोंआर सुहागने दा।

पैहले दे दुए सोआरें गा छड़ा नां गै दित्ता जन्दा ऐ इनें गी तेहारै आङ्गर मनाया नईं जन्दा। पर त्रिया सोंआर पूरे तेहारै आङ्गर मनाया जन्दा ऐ।

गरेड़ियां (चिड़ियां) जिमलै मघेर म्हीने पता नईं कुत्थों दा डुआरं डुआर उठी औंदियां न तां सारै परचील पेई जन्दी ऐ जे गरेड़ियां आइयां तां सयाला बी आया। ते हून पाला आया के आया। ते फी जिसलै पाले दे तमोर लग्गी जन्दे न तां ए गरेडियां कुतै तुष्पी दियां बी नई लबदियां। ब चेतर चढ़दे गै गरेड़ियें दे डुआरें दे डुआर अपने फंग धुष्पै च लिशकांदे-चमकांदे उड़डरन लगी पौंदे न। खबरै , रुत्त बदलने दी इस्सै खुशी च प्हाड़ें दे आदिवासियें पैहला इनें गरेड़ियें दै नौमैं लाए दा ऐ।

दुआ सोंआर कुड़ियें कंजकें दा आखेया गै जन्दा ऐ व मनाया नई जन्दा। छड़ा इसी कंजकें दा सोंआर आखेया जन्दा ऐ। प्रकृति गी सिरोमनी थार देनै मगरा साढ़े देसै च उयां बी हर थार कंजकें दी मानता ते टकोदी ऐ। ते खास करी डुग्गर च कंजकें दी पूजा दा अपना टकोदा थार ऐ म्हातम ऐ।

पैहलें दौंने सोंआरें दे नां गै चलदे न । ब त्रिया सोंआर वाकायदा तेहारै आला लेखा बड़ी शरधा नै मनाया जन्दा ऐ।

ए तेहार भिनकै च मनाए जाने आले करवा चौथी दे तेहारा आंगर ऐ। ए वक्खरी गल्ल ऐ जे करवा चौथ कुसै होर म्हीनै ते कुसै खास तित्थे उप्पर हुन्दी ऐ, ब ए त्रिया सोंआर चेत्र म्हीने दे ठीक त्रिये सोंआर गै हुन्दा ऐ। तित्थ भाएं कोई होये।

इस दी त्यारी कई दिन पैहले शा गै शुरू होई जन्दी ऐ। तै ए त्यारी इस तेहारें दे खास नवेद "पेट" बनाने कन्ने शुरू हुन्दी ऐ। "पेट" साहियें दियें गुलियें दा बनदा ऐ। पैहले साड़ियें दियें गुलियें गी पानिये च सेड़ी रखदे न। जिसले छैल गली जन्दियां न, तां उनेंगी भन्नियें उन्दे मग्गरु तत्ते पानी च बुआलदे न। फी उनेंई ठण्डे पानी च पांदे न। इस चालीं ओ मग्गरू भलेयां मिट्ठे होई जन्दे न। उन्दे सिवकड़ वी उल्ली जन्दे न। फी गुड़ें च साड़ियें दियें गुलियें दे मग्गरू ते खोड़ें दे मग्गरू रलाई लैंदे न। ते हून "पेट" त्यार। खाने च बड़ा स्वादला।

त्रिय सोंआर सुहागन जनानियां बड्डै पैहर न्हाई लैंदियां न। ते फी सारा दिन नखड़क बरत रखिदयां न। नां किछ खाना ते नां पानी पीना। संजा लै ए जनानियां, कुतै किट्ठियां, कुतै इनकिलयां अपने छैल टल्ले बन्दे, मत्थे उप्पर टिक्का, नक्क नत्थ ते ओठें गी दंदासे ने रंगिय कुतै पानियें उप्पर जिन्द्यां न। उत्थें इक निक्का सारा छैल नेआ पत्थर लेइये उसी नुआलिये, उसी अपना पित परमेसर मिथिये, ओदो पूजा करिदयां न। धूफ धखांदियां न, फुल्ल चाढ़ित्यां न। अरघ दिन्दियां न ते 'पेट' दा नवेद लोआंदियां न। ते फी घर परतोइये घरै च सारें गी ते आंड-गुआंड सज्जनें-सरबिन्धयें गी 'पेट' वण्डिदयां न। ते सारें शा पिच्छुआं आपू ए नवेद चखिदयां न।

अोदे बाद रातीं भत्त ते खीर खाने दा रवाज ऐ। इक खास गल्ल ए ऐ जे इस दिन मास नई खादा जन्दा। विना किसै दिखावे दे, बड़ी गै सादगी नै ए तेहार इस लाके च मनाया जन्दा ऐ। हासा-मसखरी जरूर हुन्दी ऐ। गबरू इक दुए गी बड़ी डंगी मुसकांदी अक्खों ते सैंत मारदे न ते त्रिक्खी बानी ने पुच्छ दे न, 'थुआड़ै अज्ज सोंआर होना ऐ' जा 'अज्ज इन्दै सोंआर ऐ। अज्ज ए कुत्थै साढ़े नै बोलदा...'आदि।

इनें लोकें आला लेखा उन्दा ए तेहार वी बड़ा सादा ऐ। कोई दखावा नईं, कोई खून खराबा नईं। हां, मठेयाई दे नां पर पेट जरूर ऐ। पर ओदे उप्पर बी मेहनत ज्यादा ते खर्च बड़ा घट्ट हुन्दा ऐ। चौथा सोंआर की नईं मनाया जन्दा इसदा पता नईं चलेया।

दुआ ध्याड़ा जां तेहार 'नुआला' खुआंदा ऐ। जिस दा मतलब ऐ उन्नी आला। ए तेहार मघेर म्होने कुसे बी दिन मनाया जन्दा ऐ। आम तौरै पर कुसै बसदे-रसदे घर गैं मनाया जन्दा ऐ—जिस घर मितयां भिड्डां होन। इसी मनाने दी मूल प्रेरणा शिवें अग्गै अपनी भिड्डें दी सलामती आस्तै अरदास करने च ऐ।

मघेर म्हीने कोई बसदा आदमी अपनै घर 'नुआला' मनाने दा प्रबन्ध करदा ऐ। सारेंगी पता पुज्जी जन्दा ऐ जे फलाने घर फलाने दिन 'नुआला' ऐ।

इस गित कोई खास त्यारी नई करनी पौन्दी। छड़ा औन आले परौहने आसत मास-भत्त बनाना हुन्दा ऐ। इक बड्डे अन्दर छत्ते कन्ने कत्ती दी उन्नं टंगी ओड़देन। फी इस उन्नु कन्ने होर उन्न लपेटदे-लपेटदे भुज्ञा तोड़ी लमकाई लेई औन्देन। इक पास काँड़े तेल दा दीया सारी रात जगदा रौहन्दा ऐ। धूफ सारी रात धुखदा रौहन्दा ऐ ते इक पास जोगी 'लीनी' (इकतारा) दौने हत्थे बजांदा रौहन्दा ऐ ते बिच्चें-बिच्चें शिवें दा जयकारा

लांदा जन्दा ऐ। संज रम्भदे सार गै क्षासे-पासे दे लोक उस घर औन लगी पौन्दे न। औन्दे गै उस नुआलै अगों मत्था टेकेंद्रे न। घरा आन्दी दी उन्न उत्थें चाढ़दे न ते इक भेठा जान्त होइयै बेई जन्दे न। अन्दर भिड्डु दा मास ते भत्त बने दा हुन्दा ऐ। हर औने आला अन्दर जाइयै खाई औन्दा ऐ ते फी उस्सै थार आइयै वेई जन्दा ऐ। ते इस्सै चाली सारी रात जाग्रना चलदा ऐ। ते इयां गै लो होई जन्दी ऐ। ते सारे लोक खुशी-खुशी अपने-अपने घरें गी परतोई औन्दे न। ते ओ सारी उन्न जोगी अपनी चादरी च बन्नियै अपने घर लेई जन्दा ऐ। होर जोगियै गी विछ बी नई देना पौन्दा। अपने मालै दी रक्षा गितै शिवें गी परसन्न करने आस्तै मती खेचल ते खर्च इक आदमी गी गै करना पौन्दा ऐ। दुए बरें कोई दुआ 'नुआला' मनांदा ऐ। इनें दौं तेहारें दे इलावा जे होर तेहार इनें. प्हाड़ें च मनाया जन्दा होयै तां उसदा मिगी पता नई।

O

(प्रद्युम्नसिंह जिन्द्राहिया)

गीत

सैलड़ियां धारां जित्थें पौंदियां फुहारां। असें पुज्जी जाना उत्थें मारियै डुआरां॥

> दुद्द चिट्टे ठंडे नाड़ू मन भरमांदे । बदली खंदोलू गासो गास मंडलांदे । सुरगी शलैंपे जित्थें लबदे हजारां।।

सत रंगी पींगा जित्थें लेंदियां लुआरे। डुल्ली-डुल्ली पौंदा मन दिविखयें नजारे। भोले भाले मानू परियें दे आंगू नारां॥

ठंडे ठंडे जाड़ जित्थें झौंगरियां छावां ठंडड़ियां नित्त जित्थें भुलदियां व्हावां । पक्खरू पक्षेक जित्थें गांदे नित व्हारां।

असें पुन्नी जाना उत्थें मारिये डुआरां।।

साड़ा सांस्कृतक तेहार— लोहड़ी

र रहे हु और व क्षेत्र मेन्स्वेडाम्स क्षित्रम् हुई हु हु ।

Mante des Ma

हवनें दा गै नतीजा हा जे समें-समें पर वरखा होंदी ही ते खूब (अ)नाज पैदाहोंदा हा।

(ख) लोहड़ी दे दुए दिन मकर संक्रांति गी जिसी उत्तरैन वी गलांदे न, सूरज भगवान दा रथ उत्तर दिशा पासै फिरी जन्दा ऐ। ए उये पिवत्तर दिन दस्से दा ऐ जिस आस्तै 'भीष्मिपितामा' ने अपने प्राण त्रिक्खे तीरें दी संजै उप्पर बी रोकी रखे हे। माघ म्हीने शा हाड़ै तगर सूरज उत्तरैन होंदा ऐ। गलांदे न सूरज दिक्खनै होने दे दिनै च मरने आले दी मुक्ति नई होंदी। तां गै माघ म्हीना सुलक्खना ते पौ चन्दरा मिथेया जन्दा ऐ। स्व० डोगरो किव 'सम्याल, हुन्दे बोल बी हैन—

" चिरै दी पेदो डोगरे गी खो, माघ सुलक्खना चन्दरा पोह।"

(ग) धारमक पृष्ठभूमि च त्री कहावत इयां ऐ जे हरनाकश दी इक लोही नां दी भैन ही। उस ने अग्नि मैंत्र सिद्द हा कीते दा ते ओ अग्नी च नई ही जली सकदी। हरनाकश दा पुत्तर प्रहलाद परमत्मा दा बड़ा भगत हा। उस गी मारने गितै हरनाकृश ने केई जतन कीते पर ओ नई मरेया। इक बारी लोहे दा थम्म भखाइयै उस कन्ने चमकाइयै प्रहलाद गी मरने दो उस ने आजा दित्ती पर भगवान ने अपने भगत गी भखे दे थम्मै उप्पर इक परीऊली दे रूपै च दर्शन दित्ते ते प्रहलाद ने थम्मै गी जफ्फी मारी लेई ते ओदा बाल बो डींगा नई होआ। लोही ने हरनाकश गी आखेया जे प्रहलाद गी ओ मारी सकदी ऐ। इक बड्डी चिख बनाइयै ओदे उप्पर लोही वेई गेई, प्रहलाद गी ओदै मूढ़ै देइयै चिखा गी अग लाई दित्ती गेई। पर भगवान दी बेअन्त माया। प्रहलाद गी कक्ख नई होआ ते लोही जिलयै स्वाह होई गेई। ओदा घमण्ड त्रुट्टी गेआ। खीर परमात्मा ने नर्रासहा अवतार लेइये हरनाकश दा बी अन्त करी दिता। गलांदे न जिस दिन लोही फकोई ही उस्सै दिनै गा ए तेहार हर साल मनोंदा आवा करदा ऐ की जे उस दिन धरमें दी पापै उप्पर जित्त होई हीं। इस्सै गल्ला इस दिन खूब अग्ग बालियै औहतियां देइयै अग्नि पूजा होंदी ऐ ते लोहड़ी फूकी जन्दी ऐ।

मौसमी पृष्ठ भूमि

(घ) लोहड़ी इक मौसमी तेहार ऐ ते मौसम बदलने दी खुशी च मनाया जन्दा ऐ। ज्यादातर ए ठंडे लाके दा गै तेहार ऐ, दक्खनी भारत दी बजाये ज्यादातर उत्तरी भारत च गै मनाया जन्दा ऐ, की जे इत्थें ठण्ड मती हुन्दो ऐ। लोहड़ी दे बाद मौसमैं च गरमी होन लगी पौन्दी ऐ ते दिन बी बदन

साढ़ा सांस्कृतक तेहार—लोहड़ी

भारतवर्ष इक कृषि प्रधान देश ऐ। ए बड़े-बड़े रिखियें-मुनियें दी ते केइयें धरमें दी जन्म भूमि ऐ। सारे संसार थमां न्यारियां छे रित्तूं इत्थें गै हुन्दियां न। आद-कदीमी शा लेइयें केई पर्ब तेहार साढ़े देसे च मनाए जन्दे न, जिन्दे च केई मौसमी ते केई धारमक हुन्दे न। केई महापुक्शों दे जन्म दिनें कन्नै सरवन्ध रखदे न ते केई सुतन्त्रता प्राप्ति दो खुशी च मनाए जन्दे न। जेड़े तेहार मुण्ड कदोमो शा मनोंदे आवा करदे न ओ साढ़ी उच्च संस्कृति दे सुन्दर नमूने न ते साल-बसालो उन्दा मनाना संस्कृति दी राखी करने ते उसदी अमर याद ताजा करने दे वरोबर ऐ। इये जनेह तेहार न—देआली, लोहड़ो, दसैहरा, होली, बसाखी आदि ते हर दे पिच्छें कोई न कोई पृष्ठ-भूमि ऐ भाएं ओ धारमक होयें तां भाएं कोई होर।

लोहड़ी दे बारे च केई परम्परागत कहावता मशहूर न।

धारमक पृष्ठ भूमि

(क) ए तेहार पोह म्होने दो मसांती गी माघै दी संक्रांति कशा इक दिन पैहलें भारत भर च बड़ो धूम-धाम कन्ने मनाया जन्दा ऐ। आर्य पर्व पदित च लोहड़ी दो बड़ी महानता दस्सी दी ऐ। एदे दुए रोज मकर संक्रांति गी जिसी माघी दा तेहार आखदे न, जग्ग-हवन करने दा बड़ा महातम दस्से दा ऐ की जे भारत इक कृषि प्रधान देश ऐ ते छैल फसलें गितै छैल वेले सिर बरखा होनी लोडचदी ते इस लोड़ें गी पूरा करने गितै साड़े रिखि-मुनि इन्दर देवता गी परसिन्न करने गितै जग्ग हवन ते अग्नि पूजा करदे हे। स्याले दी ठण्डू च ओ प्हाड़ें उप्परा खल्ल मदानै च आई जंदे हे जित्थें लोक ज्यादातर खेती बाड़ी गै करदे हे। खबरै उनें जग्ग

40-

हवर्ने दा गै नतीजा हा जे समें-समें पर वरखा होंदी ही ते खूब (अ)नाज पैदाहोंदा हा।

(ख) लोहड़ी दे दुए दिन मकर संक्रांति गी जिसी उत्तरैन बी गलांदे न, सूरज भगवान दा रथ उत्तर दिशा पासै फिरी जन्दा ऐ। ए उयै पिवत्तर दिन दस्से दा ऐ जिस आस्तै 'भीष्मिपतामा' ने अपने प्राण त्रिक्खे तीरें दी सेजै उप्पर बी रोको रखे हे। माघ म्हीने शा हाड़ै तगर सूरज उत्तरैन होंदा ऐ। गलांदे न सूरज दिक्खनै होने दे दिनै च मरने आले दी मुक्ति नई होंदी। तां गै माघ म्हीना सुलक्खना ते पौ चन्दरा मिथेया जन्दा ऐ। स्त्र० डोगरो किंव 'सम्याल, हुन्दे बोल वी हैन—

" चिरै दी पेदो डोगरे गी खो, माघ सुलक्खना चन्दरा पोह।"

(ग) धारमक पृष्ठभूमि च त्री कहावत इयां ऐ जे हरनाकश दी इक लोही नां दी भैन ही। उस ने अग्नि मैंत्र सिद्द हा कीते दा ते ओ अग्नी च नई ही जली सकदी। हरनाकश दा पुत्तर प्रहलाद परमत्मा दा बड़ा भगत हा। उस गी मारने गितै हरनाकश ने केई जतन कीते पर ओ नई मरेया। इक बारी लोहे दा थम्म भलाइयै उस कन्ने चमकाइयै प्रहलाद गी मरने दो उस ने आजा दिली पर भगवान ने अपने भगतै गी भखे दे थम्मै उप्पर इक परीऊली दे रूपै च दर्शन दित्ते ते प्रहलाद ने थम्मै गी जफ्फी मारी लेई ते ओदा बाल बी डींगा नई होआ। लोही ने हरनाकश गी आखेया जे प्रहलाद गी ओ मारी सकदी ऐ। इक वड्डी चिख वनाइयै ओदे उप्पर लोही वेई गेई, प्रहलाद गी ओदै मूढ़ै देइयै चिखा गी अग्ग लाई दित्ती गेई। पर भगवान दी बेअन्त माया। प्रहलाद गी कक्ख नईं होआ ते लोही जलियै स्वाह होई गेई। ओदा घमण्ड त्रुट्टी गेआ। खीर परमात्मा ने नरसिंहा अवतार लेइये हरनाकश दा बी अन्त करी दिता। गलांदे न जिस दिन लोही फकोई ही उस्सै दिनै शा ए तेहार हर साल मनोंदा आवा करदा ऐ की जे उस दिन धरमै दी पापै उप्पर जित्त होई हीं। इस्सै गल्ला इस दिन खूब अग़ग बालियै औहतियां देइयै अग्नि पूजा होंदी ऐ ते लोहड़ी फूकी जन्दी ऐ।

मौसमी पृष्ठ भूमि

(घ) लोहड़ी इक मौसमी तेहार ऐ ते मौसम बदलने दी खुशी च मनाया जन्दा ऐ। ज्यादातर ए ठंडे लाके दा गै तेहार ऐ, दक्खनी भारत दी बजाये ज्यादातर उत्तरी भारत च गै मनाया जन्दा ऐ, की जे इत्थें ठण्ड मती हुन्दी ऐ। लोहड़ी दे बाद मौसमैं च गरमी होन लगी पौन्दी ऐ ते दिन बी बदन

लगी पौन्दा ऐ। इक कहावत बी ऐ जे लोहड़ी गी दिन बकरी जिन्नी शाल मारदा ऐ। सेआला खत्म होई जन्दा ऐ। इक खुआन ए बी ऐ जे —

"दसेरा फूकेआ आया सेयाला, लोहड़ी फूकी गेआ सेयाला।"

लोहड़ी गी घर-घर खूब अग्ग बाली जन्दी ऐ ते पक्रवान, तिलचौली ते होर गरम पदार्थ खाइये सेयाले गी बिदा कीता जन्दा ऐ।

- (ङ) मध्य यूरप दे इटली, हंगरी, स्विटजरलैंड ते आस्ट्रिया जनेह मुल्खें च बी मनाया जन्दा ऐ। उस दिन अग्गी दा बड्डा गेआना वालिये ओदे चबक्खी लोक चक्कर लांदे ते नचदे गांदे न। अग्गी च औहतां दिन्दे ते अग्नि पूजा करदे न। मठेयाई बी बंडोन्दी ऐ जेड़ी रयोड़ियें साई हुन्दी ऐ। मुमकन ऐ उत्थें उस तेहारै दा नां किश होर होयें पर लोहड़ी कन्ने मेल खाने करी साढ़ी लोहड़ी इक मौसमी ते ठंडे लाके दा तेहार सिद्ध होई जन्दी ऐ।
- (च) फसली तेहार:—िकश सयाने गलांदे न जे ए तेहार सौनी दी फसल शैल होने दी कामना च मनाया जन्दा ए। साढ़े लाके च लोहड़ी दे परंत गै रनाह कीते जन्दे न ते सौनी दी फसले गित जमीन तेयार करने दा कम्म पुनाहया जन्दा ऐ। माघ म्हीने दी बुढ़ी दी बांसदी च धान दी फसल बड़ी सरस होंदी ऐ। अग्नि पूजा ते जग्ग हवन दा ए महातम दस्सेया जन्दा ऐ जे इन्दर देवता माघ म्हीने बरखां जरूर बरा। इस म्हीन बरखां जरूर होनियां लोड़चिदयां न, नई तां सौन महीना सुक्का जाने दा डर रौहन्दा ऐ ते सौन भाद्रों सुक्का गेया तां सौनी दी फसल खराब गै समझो। इक खुआन बी ऐ नां—"दौं त्रुट्टे दे बारां जान।" अर्थात् एदा सारे बरे पर असर पौन्दा ऐ।

अज्ज कल जग्ग हवन ते घट्ट गै हुन्दे न पर उत्तरैनी गी लोक खिचड़ी जरूर मनसदे न ते घिए धिआनीं गी जां कुसै ब्राह्मणै गी रुट्टी खलांदे न । गरीबें दा ए बी जग्ग गै हुन्दा ऐ। हां, ग्रांएं च लोहड़ी गी हरण चाढ़ियै जेड़ी जिस पत्तर ते पैसे किट्ठे होंदे न उसदा लोक जग्ग जरूर करदे न ते छंल फसल होने ते सम्मे सीले थोने दी प्रार्थना करदे न ।

सांस्कृतक पृष्ठ भूमि

(छ) इस दिनै कन्ने भीष्म पतामा ते प्रहलाद दा सरबन्ध होना, आर्ये दा बरखा आस्तै जगा हवन ते अग्नि पूजा करने दा महातम होना साढ़ी उच्च संस्कृति दा प्रतीक ऐ। अज्ज बी लोहड़ी दियां तैयारियां महीना भर पैहलें गै होन लगी पौन्दियां न ते जागतें-जवानें दियां टोलियां नच्ची-नच्ची, गाई-गाई, ढोल ते बाजे लेइयै, लोहड़ी रोज घर-घर चवकर लांदियां न । वड़ी मेहनता कन्ने

रंग-बरंगा छज्जा बनेदा हुन्दा ऐ ते हर टोली अपने छज्जे गी दुएं शा सरस बनाने दा जतन करदी ऐ । छज्जे उप्पर पाल्लां पा करदे मोरै दी तस्वीर-जन पाई दो हुन्दी ऐ जां चढ़दे सूरजै दा चित्र दस्सेदा हुन्दा ऐ । छज्जा चुक्कने आला मोरै आंगर पाल्लां पाई पाई नचदा ऐ, उस कन्ने दुए साथी बो नचदे न ते ढोल वसरियें ते घड़े ओलें कन्ने इक समां बज्जी जन्दा ऐ । लोहड़ी दी रातीं ते ग्रां-ग्रां, शैहर-शैहर खास रौनक-मेला लग्गा रौहन्दा ऐ । इस दिनै दे लोक गीत, लोक नाच ते लोक कला साढ़ी संस्कृति दी बरासत न । साढ़े खुगगर च ए तेहार नाच ते गाने दा तेहार बनी गेदा ऐ जेदा लोक बड़ी बेकरारी कन्ने इन्तजार करदे न ते इस दिन मन पतेयाइयै नचदे-गांदे न । केई प्रकार दे गर्म पदार्थ, पकवान, मठेयाई ते तिलचौली खन्दे न ।

सारै नग्गरें ग्राएं च ए जनेह गीत गाए जन्दे न :-

सुन्दर मुन्दिरये...हो, तेरा कुन वनारा...हो, दुल्लो हट्टी आला...हो। हरना भेई हरना, दुआर नइयों करना, हरनै मारी छाल, दे कटोरी दाल। आं कुड़े तरचौलिए, आं गीगां मौलिए, आं गुड़ै दियां रोड़ियां, आं भन्न मरोड़ियां...आदि आदि।

इयां लोहड़ी दा तेहार साढ़ा इक सांस्कृतक तेहार बनी गेदा ऐ ते हर साल मनाया जन्दा ऐ।

ग्राएं च वी किश दिन पैहलें हरण चाढ़ने दी तेयारी होन लगी पौन्दी ऐ हरण खुशी च नचदा ऐ, छाली मारदा ऐ, इयां गै दौं आदमी हरणें साई सिंग लाइयै, उप्परें छैल रंगदार कपड़ा लेइयैं छालीं मारदेन। इक आदमी ए बोल बोलदा ऐ - "हिरणा हिरणा छालीं दे, सुत्तें दे गी बझालो दे।" एदे बाद ढोल बौंसरी दी तालै उप्पर लोक नाच पेश कीता जन्दा ऐ। किश सिख्यां वने दे हुन्दे न ते कोई मरवसे लाइयै साधु, काहन जां होर कोई मजािकया सुआंग रचेदा हुन्दा ऐ। सारै घरैं आले ए टोली औने पर बिज्जी उठदेन ते लोक नाच दा मजा लैंदे न। घरैं आला टोली गी किश पैसे जां

मसाहरे, लैम्प जां गैस लेइयै ए टोलियां सारे ग्रां च रातीं ठण्डू च घर-घर चक्कर लांदियां न ते लो लगाने तगर जिन्नी गुराही होंदी ऐ ओदा ग्रां च इक्क धर्मार्थं जगा कीता जन्दा ऐ जां ओ पैसा कोई धर्मार्थं चीज खरीदने उप्पर खर्च कीता जन्दा ऐ, जियां सगले, कड़ाह, कैहलां, ब्याह कारजें आस्तै दरियां, गलास आदि जेड़े ग्रां च सारे बेले सिर बरती सकदे न।

भयानक द्एड

जहांगीर दी प्रेयसी अनारकली गी मुगल समाट् अकबर ने जींदे जी कन्धा च चिनाई दित्ता हा जां नई' ? इस बारै इतिहासकारें दी वक्खरी-बक्खरी राए ऐ। ते शायद इस्सै करिये मुगल साम्राज्य दी ए प्रसिद्ध घटना विवाद ग्रस्त समझी जन्दी ऐ।

पर मुशिदाबाद – जेड़ा स्वतन्त्र बंगाल दी अन्तिम राजधानी हा, उत्थें अज्ज बी इक खण्डहरैं कोला लंघदे कुसै वी सैलानी दे पैर किज खिनें आस्तै अपने आप थमोई जन्दे न। आखेया जन्दा ऐ जे इस खण्डहरैं च कदें फैजी वेगम रौहन्दी ही, जिसदे सुरीले कण्ठ चा निकलदी वुवाज अज्ज वी सुनोचदी ऐ।

फैजी बेगम कुन ही ओ कुत्थें जम्मी कुत्थें पली ते किस चाली नवाब सिराज उल दौले दे सम्पर्के च आई इस बारे कोई पता नई लगदा ते न गै 'बेगमाते बंगाल' नां दी पुस्तक इच ओदी कुतै चर्चा आई ऐ।

खबरै, इस दा कारण ए होए जे ओ कुसै बी नवावा दी बेगम नई सी। पर ए वी ते सच ऐ, जे नेया कोई मानूं नेई होग, जेड़ा मुशिदाबाद दे उस खण्डहरै कोला लंघै ते बिंद भर गै उत्थें रुकी नई जा।

सुनाने आले सुनांदेन जे ए तदूंदी गल्ल ऐ, जदूंईस्ट इण्डिया कम्पनी दा युगारम्भ हा, ते उनें दिनें लार्ड कलाईव, अंग्रेज सरकार गी मजबूत बनाने लेई षड़यंत्र बनाने दा चक्कर चला करदा हा।

उनें दिने गै अलीवर्दी खां दी कुड़ी दा इकमात्र पुत्र सिराज उल-दौला बंगाल दा नवाब बिनये बैठा दा हा, ते नुआड़ा पिता जैन उल दीन खां दे मरने परेंत उसदी मां आमना बेगम ते हसन कली खां ने हिरखै दियां पींगां बधाई दियां हां। सिराज दी बरेस उनें दिनें चौबी-पंजी होग । नुआड़ा स्वास्थ बड़ा खरा हा, रपे-पैसे दी कोई घाट नई सो, अजादी बी पूरी ही। जिसलै ए सब गल्लां होन तां सुरा ते सुन्दरी दूर नई रौंहदियां। सिराज बी इनें दौनें च दिनो-दिन मस्त हुन्दा गेया।

कई सुन्दरियां ओदे अग्गें पिच्छें घुमदियां रौहदियां। उनें सुन्दिरएं च इक फैजो बेगम बी सी जेड़ी सिराज गो मती गैं चाहदी ही ते सच्च गल्ल बी इयै ऐ जे ओ फैजो बगैर रेई नई हा सकदा।

इस्सै चाली समा हवाऊ दी लैहरें उप्पर मती तेजी कन्ने लंघा करदा हा। इस दे कन्ने गै धंगाल दा इतिहास बी बदलोआ करदा हा सिराज बदलोंदे हालात थमां पूरी चाली वाकिफ हा ते अपनी समझानुसार अपने गो दृढ़ बनाने दा जतन बी करदा हा। पर कच्ची बरेस, सुरा ते सुन्दरी दा हर बेले दा साथ उसी राज-काज अल लोड़चदा ध्यान देन नई सा दिंदा।

ओ दिन सिराज दी बरे-गण्ड आला दिन हा ते बड़ा भारी जशन मनाया जा करवा हा।

सारा मुर्शिदाबाद मती शैल चाली सजाया गेदा हा थार-थार काफूरी कन्दीलां जगा दियां हियां। मैहलें दी सुन्दरता ते शब्दें च ब्यान कीती गैं नई सी जाई सकदी।

रात ख़री घनी होई गेई तां सिराज मैहलें च गेया। इशरत मैहल च दाखिल होइयै उसने अपनी नजर चबक्खी दौड़ाई, ते फी किज बेचैन होइयै उस ने पुच्छेआ—"फैजी कुत्थें ऐ ?"

पर कोल खड़ोते दे दास ते दासिएं उस दी गल्ला दा कोई परता नई दित्ता।

रोएं होइयै उस नै फी पुच्छेया—''के ओ बमार ऐ?'' लौका नेया उत्तर मिलेया —''नईं।''

'उस ने फी पुच्छेया—''उसी पता नई सा जे अन्ज जशन ऐ?"

फी लौका नेया उत्तर मिलेया — "पता हा।"

सिराज ने रोय कन्ने भरोचे दे शब्दें च आखेया—"ओ बमार नई उसी जशन दा पता बी हा, फी ओ ऐ कुत्थें, उत्तर देओ ?"

दास दासियां कम्बी उट्ठे—इक ने हौली नेयी आखेया— ''ओ उमरा दे मैहलें च ऐ—सिर्फ अज्जै दी रातीं आस्तै।'' "उमरा दे मैहलें च १ सिराज बुत्त-जन वनी गेया, ते फी उसने अपने हिन्दू प्रधान मन्त्री गी हुक्म दित्ता जे ओ हुनै इस्सै खिन जाइयै फैजी गी उमरा दे मैहलें चा लेई आवै।

प्रधान मन्त्री चली गेया ते सिराज बड़ी बेचैनी कन्ने इद्दर-उद्दर टैहलन

लगी पेया !

किश चिर मगरा प्रधान मन्त्री ने आइयै आखेया, जे ओ आखा दी ऐ जे में अज्जै दी रात नई आई सकदी, बड्डे बेलै आई जांग।

सिराज ने उस रातीं मती कराब पीती, इन्नी जे ओ बेहोश होई गेया।

बड्डे वेले फैजी आई, उसने आइयै मुजरा कीता पर सिराज ने उसी नशे दे खुमार च पछानेया गै नईं। सिराज ने सवाल कीता—''के गल्ल ऐ?''

फंज़ी बोली — 'तुसें सद्या हा नां ते में बड्डे वेलै औने आस्ते आखेया हा, सो अपने बचनें अनुसार हाजर आं।"

सिराज गी होश आई गेई। ओ वोलेया—''हां में सद्देया हा ते इस करियें सद्देया हा जे तुगी दस्सां जे हून तूं बेगम नई रेई।''

फैजी ने आखेवा—"तुसें जे किश आखेया ठीक ऐ पर के तुस मिगी दस्गेओ जे मेरा के कसूर ऐ ?"

होठ चबदे होई सिराज ने आखेया-- 'तूं बेवफा एं, कंजरी एं!"

"मन्नी लेया नवाव साव", फैजी बड़ी घीनता कन्ने बोली—"पर कंजरी दा खताब मेरे आस्तै गै की अपनी मां आरते बी रौहन देओ, ओ बी ते हुसैन अली खां कन्ने हिरखे दियां पींगां भूटै करदी ऐ। कुन ऐ जिसी इस गल्ला दा पता नई ।"

सिराज सिरे थमां पैरें तक कम्बी पेया — "तुगी पता ऐ तूं कोदे सामने खड़ोती दी एं। ते तुगी के दडं दिता जाई सकदा ऐ ?" फैज़ी उस्सै चाली धीनता कन्ने गै बोली — "पता ऐ नवाब साब।"

"ते फी आ मेरे कन्ने" — सिराज उट्ठी चली पैया ते ओदे पिच्छें फैजी वेगम बी।

इक कमरे अल इशारा करदे होई सिराज ने आखेया—"चल इस कमरे इच वेइये ते गाना शुरु कर, ते उस बेले तोड़ी गांदी जा जदूं तक में गाना बंद करने आस्ते नई आखां। में बाहर तेरा गाना सुनदा रौहंग।

फैजी वेगम कमरे दे अन्दर चली गेई। ओ इस हुनमें दा अर्थ समभदी ही, पर कन्ने गै उसी ए वी घ्यान हा जे उस ने जेड़ा सच्च बोलेया उस दा कोई होर परिणाम निकलो गै नई सकदा। सिराज ने उस कमरे देदरवाजे बाहरा बंद करी ओड़े, ते फी राजड़ें गी सिद्यै हुक्म दित्ता जे हर दरवाजे दे बाहर कंघ चिनो रौशनदान बी बद करी देओ!

शाही फरमान दी तमील कमरे दे अन्दर फंज़ी बेगम करा करदी ही ते बाहर राजड़े।

फैजी बेगम उस बेले तक गांदी रेई जिसले तक उसी किश होश रेई ते बेहोश हुन्दे-हुन्दे बी ओदी खिन-खिन डुयुदी बुआज सिराज गी सनोचदी रेई। जींदे जी, सच्च बोलने दा इन्ना भयानक दडं फैजी बेगम ने भुगतेया।

इस गल्ला गी मुद्दतां होई गेइयां। मुशिदाबाद सारे दा सारा खण्डहर बनी चुके दा ऐ, हुन उस च कोई ऐसी गल्ल नई जेड़ी कुसँगी अपने अल इक खिनै आस्ते वी खिच्चै, पर इनें खण्डहरें च फैजो बेगम दा ओ कमरा जिस बिच उस नै भयानक दंड भुगतेया ते जेड़ा दूएं खण्डहरें लेखा इक खण्डहर बनी चुक्के दा ऐ सैलानिएं ते भारत-यात्रा करन औने आलें आस्तै अज्ज वी खिच्च ते अचरज दोए रखदा ऐ जिस विच्चा फैजी वेगम दी बुआज उन्दे पैर थम्मी लैंदी ऐ।

नियां मिंजवां

दर्शन कौर

गुरु नानक

गुरु नानक देव जी बारे च भाई गुरदास जी ने लिखेया ऐ, ''कल तारन गुरु नानक आया''। गुरु जी हुन्दी एह महानता इस आस्तं ही जे गुरु जो कलयुगी जीवें गी मुक्त करने आस्तं आए हे। साढ़ी धरती मां उप्पर उस बेलें केइयें किस्में दे' अत्याचार होआ दे हे। दुनियां च हाहाकार मची दी ही। भाई गुरदास जो लिखदेन जे धरतो मां ने उस सिरजन हार करतार अगों एह प्रार्थना कीती जे हे ईश्वर में पापें दे भारें कन्ने दवोई जा नी आं, तुस मेरे ऊप्पर कृपा करो ते कुसै बड्डी पाप निवारन करने आली शक्ति गी इस संसारें च भेजो। 'सुनी पुकार दातार प्रभ गुरु नानक जग माहि पठाआ।' उस ईश्वर ने धरतो मां दी प्रार्थना गी सुनेया ते गुरु नानक देव जो गी इस संसारें च भेजेया।

श्री गुरु नानक देव जो लोधी बादशाहें दे समे च इस संपारें च प्रकट होए । उस बेलें राजसी अत्याचार होआ दे हे । भारत वर्ष च राजनीति दे मते सारे झमेले हे । इक पासै मुसलमान हमलावर औंदे हे, दर्श खंबर दे रस्ते दा भारत उप्पर हमला करियें लुटमार करदे हे , लक्खां पदार्थ सुन्ना, चांदी, हीरे, जवाहरात सब किश लुट्टियें लेई जंदे हे । भारत च कोई बी ऐसा महान पुरुष नेहा जेड़ा उन्दे कन्ने मुकाबला करदा । महमूद गजनवी ने भारत उप्पर ठारां हमले कीते, लुटमार कीती हिन्दुएं दे मन्दरें गी तरोड़िया, उन्दिएं जुआन कुड़ियें ते जागतें गी कैंद करियें लेई गें, उनेंगी गजनी दे बजारें च जाइयें दोऊं-दोऊं रपें वेचेया । ते जबरदस्ती उनें गी मजहव बदलने गी मजबूर कीता ।

ओ नेआ समां हा जदूं जोगी ते नाथ भारत वासियें गी संसारै गी छोड़ने दे उपदेश दिन्दे हे। उन्दे उपदेशें पर चिलयै केइयें लोकें घर-बार छोड़ी दित्ते ते जोगी बनी गे। ब्राह्मणें अपना बक्खरा धारिमक समराज कैम कीते दा हा ते केई किस्में दे पखंड करिये (जात-पात, छूत-छान वगैरा) अपना वडप्पन कम कीते दा हा।

भारत देसै च इये ने अत्याचार हुन्दे दिविखये श्री गुरु नानक देव जी ने भारत वासिएं गी मुक्त कराने आस्तै सारे देशें दी यात्रा कीती। कैलाश परवतें पर जोगियें दे कई स्थानें उप्पर बी गे। गुरु जी ने उन्दे कन्ने कई ज्ञान गोष्टियां कीतियां ते उनें गी सच्चा रस्ता दस्सेया। जपुजी साहिब दियां 'मुन्दा सन्तोख सरम पत झोली' आदि अठत्तरी पीड़िएं दे आधारें पर उनेंगी सच्चे योग मारगै दा सिद्धान्त समक्षाया, कन्ने गैं 'मन जीते जग जीत' दा प्राचीन आदर्श फिरी दुनियां दे सामने रक्खेया।

गुरु जो नें एह वी दस्सेया जे जेके हिन्दु देवी देवतें दी पूजा करी-करी अपिनयें जानें गी खपा करदे न जां तीरथें करमें कांडे दे मारगें च लग्गे दे न एह सब किछ निष्फल ऐ। उनेंगी ए सब विछ छोड़ियें उस अकाल पुरुख (ईइवर) दे सिमरन उप्पर ज़ोर देना चाई दा ऐ। गुरु जी ने उस्से इक करतार (ईश्वर) गी गै सारी सृष्टि दा रचनाकार दिस्सिय उस्सें दी भगती करने दी शिक्षा दित्ती।

सोचने आली गल्ल ऐ जे गुरू जो खत्तरियें दे उच्चे कुलैं च पैदा होइयैं बी जनेऊ, तिलक ते होर कई किस्में दे दखावें दा विरोध करदे हे। इया गैं उनें सूतक पातक, छूत-छात, जात-पात गी वी फजूल पखंड समभेया। गुरु जी ने 'आसा दी वार' बिच असें गी दस्सेया, जे:

> मन का सूतक लोभ है जिह्वा सूतक कूड़, अखीं सूतक वेखना पर-त्रिया, पर-धन रूप। कन्नीं सूतक कन्न पै लाए तवारी खाएं। नानक हंसा अ।दमी बद्दे जमपुरी जाएं।

कुसे जीवै दे पैदा होने कन्ने सूतरा नई हुन्दा। हर चाली दा सूतक ते साढ़े इस शरीर कन्ने गै चम्बड़े दा ऐ। लोभ-लालच मनै दा सूतक ऐ जो—मनें गी अपिवत्र करदा ऐ, फूठ जीबा दा सूतक ऐ जेड़ा जीवें गी अपिवत्र करदा ऐ। पराई स्त्री, पराए हुसनै ते पराए धनैं गी ललचाई दो नजरा कन्ने दिक्खना अक्खियें दा सूतक ऐ, इनें कम्में गी करने कन्ने अक्खियां भृष्ट हुन्दियां न। इयां बड्डे सूतक साढ़े जिस्में गी लग्गे देन। जीवें दी हत्या करने आले बंदे जम पुरी गी जांगन।

उन्नें दिनें च स्त्री जाती गी लीग नीच समभदे है। जोगिएं ते इसी वाघन' जां बघआड़ी आखियै भण्डेया। कन्ने ए बी आखेया जे एह मनुनखै दा लऊ पींदी ऐ। स्त्री गी त्यागी ओड़ना चाई दा ऐ। गुरु जी ने इस समाजक भृष्टाचारै दे बिरुद्ध अवाज उठाई ते भुल्ले भटके लोकें गी उपदेश दिता जे:

भण्ड जमीए भण्ड निमीऐ भण्ड मंगन विआओ, भण्डो होवे दोस्ती भण्डो होवे राहो । भण्ड मुआ, भण्ड भालीऐ भण्ड होवे वंघान, सो क्यों मन्दा आखीऐ जिन जमें राजान ।

इनें शब्दें च गुरु जी आखदे न जे इयै स्त्री ऐ जेका सारी सरिष्टी दी रचनहार ऐ, जेकी साढ़ी जनम दाता ऐ, जेदे गरभै चा अस जम्मने आं जिस स्त्री कन्ने कड़माई ते व्याह हुन्दे न जिस स्त्री किरये मित्रता हुन्दी ऐ, सारे कार ब्यार चलदे न, स्त्री मरी जा तां होर स्त्री गी लब्बनेआं, स्त्री कन्ने गै घर बनदा ऐ, जिस स्त्री दी कुक्लें च राजे, बड़े बड़े वीर बहादर, महान विद्वान पैदा हुन्दे न उसी अस को द्युरा आखचै। गुरु जी ने असें गी ए बी दस्सेया जे सारे धरमें कछा बड़डा घरम ग्रहस्त ऐ।

गुरु नानक देव जी ने ससार दे अगों इक महान आदर्श रक्खेया जे "मन्दा मूल न कीचई दे लम्मी नदर निहालीए।" गुरु जी आखदे न जे कोई वी नेया बुरा कम्म नई करो जेदा आखर च नतीजा भैड़ा निकल, हर कम्मै गी घीरजें दी दृष्टि कन्ने चंगी चाली दिक्खी लैना चाई दा ऐ जे आखर इस दा नतीजा के निकलग। जे कर मनुक्ख इस गल्लै गी सोची लं जे इस कम्मै दा आखर च नतीजा के निकलग तां सारे ससार च कोई बी बुरा कम्म नई करे, तां सारा संसार गै सुरग बनी जन्दा ऐ।

गुरु जी सच्चें-मुच्चे गै इक महान आदर्शवादी किव से जिनें अपनी वाणी द्वारा संसार अग्गें केई किस्में दे उच्चे आदर्श रिवखय संसार गी सुखी रखने दा प्रयत्न कीता



वाज आया लेखक बनने कछा

जवानी दे दिनें चहर मानुं दे मनै च इक लम्मो तांग हुन्दी ऐ जे ओ कुसै बी चाली लोकों दो नजरें च उच्चा होयै, खास कर कुड़ियें दी नजरें च। कोई टाईट फैशन पैंट लांदा ते कोई मुद्दियां-मुद्दियां पोथियां हत्थें च फड़ियै बजारें च मटरगश्ती करदा ऐ। कोई कुसै फिल्में दे हीरो देवानन्द जां शिकपूर बनने आस्तै माऊ बब्बे गो परेशान करदा ऐ, ते कोई फिलास्फर आशक बनने आस्तै किखे बाल, बधी दी दाड़ी ते लम्मे-लम्मे गर्म साह छोड़दा ऐ। खैर किछ बी होयै, पर किछ मानुं नेह बी हुन्दे न जेड़े इनें गल्लें चा कुसै बी गल्लें पर अमल नई करियें बरसाती मेंडकें आंगर किवता ते क्हानियें दी टर-टर लाई बौन्दे न। ओ जेड़ा बी ऊटपटांग लिखदे न ओ भामें कुसै गी समभ आवै जां नई, उनेंगी इस गल्लें दी परवाह नई हुन्दी। जे कोई नुक्ताचीनी करै तां ओ आखदे न ए अकविता जां अकहानी ऐ। अज्जें दा मानुं इसी समझने गितै असमर्थ ऐ। खास करी तेरे जनेया।

उंदी नजरें च अस बुद्धू नीरस ते साहित्य कछा परे आं। उंदी नजरें च उट्टने दा इक गैतरीका ऐओ ए जे रचना भामें विल्कुल मनें भी चंगी नई लग्गै फी बी वा – वाते ताड़ियां बजाई-वजाई गै उंदी बुद्धि ते अंदाज दी सराहना करचै।

मेरे इक मित्र। न उनें गी बी किछ लिखने दा शौक ऐ। लिखदे बी कोई मता माड़ा नई पर उंदी रचना सुनी सुनियै आऊं ते सच्चे-मुच्चें इन्नां तंग आई जन्नां जे अपने आपैं पर रोह औंदा जे आऊं अपने भावें दा खून बी करना। भामें उंदी कवता सुनियै मिगी सिर पीड़ गै की नि होन लई पवै पर फी बी मिगी बनावटी खुशी ते मुंऐ उप्पर बनावटी भाव आनने पौंदे न ते क ने गै वाह वाह वी करने पौंदा! जेकर आऊं ए सब गल्लां नई करां तां मेरे मित्र नराज होई जंदे न ते जे उंदी कवता दी सराहना करां तां काफी दा कप ते टोस्ट थोंदा ऐ। मे उनेंगी बड़े बड़े किवयें दा खताव बो देई चुकां पर उनेंगी संतोख नई हुंदा। ओ मिगी बी किश लिखने आस्तै आखदे न पर मिगी ए समक्ष नई औंदी जे आऊं के लिखां।

इक दिन मेरे मनै च इक बड़ा मार्डन आईडिया आया। मिगी इक प्लाट थोआ। प्लाट इक प्रेमी ते प्रेमका दा हा जेड़े इक दुए आस्तैं सच्चे प्यार दा दावा करदे हे, पर उंदी लड़ाई कदें बी नही मुकदी। कदें प्रेमी इस आस्तैं नराज-नराज होई जंदा जे ओ खिड़को कोल किन्ना चिर खड़ोता रेया पर ओदी प्रेंमका बारी पर नई आई। ते कदें प्रेमका इस आस्तैं नराज होई जंदी जे ओदा प्रेमी कुसै होर दे चक्करें च पेई गेदा ऐ ते ओ ओदा ख्याल नई रखदा। ए लड़ाई आमने-सामने नई होइयै कागज-पत्र ते पैन दे जरियै हुंदी ऐ।

इक दिन आऊं प्रेमका दे घरै कच्छा लंगै दा हा ते मिगी इक कागजै दी पुड़ो-जन बटोई दी लब्बी । में उसी चुक्की लैता । ते उसी खोलियें पढ़ेया ते सारी पिछली क्हानी मेरे अगों घुम्मी गेई । में सोचया चली इक प्लाट गै सेई। घर आनिये पैन फड़ेया ते अपनी नोट बुका दे पत्तरे लीकन लगा। क्हानी बनी गेई पर आऊं ए सोचा दा हा जे कसूर कुदै सिर मढ़ेया जा। पानी नींदै थार गै औंदा ऐ । सोचेया की नई सारा कसूर प्रेमका दे सिर गै मढ़ेया जा। जे प्रमी दे बारे किछ लिखया तां ए नई होये जे प्रेमी साब गी पता लग्गी जाने पर कुतै मेरी हड्डी-पसली इक करी ओड़न।

की जे मिगी उंदा राज पता लग्गी गेदा हा। इस्सै आस्तै मेरे दिलै च होर मता किछ जानने दो जिज्ञासा बदी गेई ते आमी रोज अपनी बारी च खड़ोइये उंदे इशारे जेड़े किछ नराजगी कन्ने परोचे दे होंदे हे दिखदा पर कन्नै गै मिगी ए बी डर होंदा जे कुसै ने दिक्खी लेया तां मेरी शामत बी आई जानी ऐ।

कुमारी प्रेमका दा साढ़ बौन-खड़ोन हा। पता नई उनें मेरी नोट बुका च लिखे दे ओ पत्तरे कदूं पढ़ी लेते। जिन्दे च में उदी क्हानी दा रफ खाका खिच्चे दा हा। मेरी बेवकूफी ए ही जे में उदे मैं नां लिखे दे हैं ओ मुआँ दाते किछ नई बोली। पर दिलै च उन्न मिगी खबरें किन्नियां गालियां कड़ियां ते कन्नें गैं मिगो दिक्खिय मूंह मुट्टा करी लैता। इक दिन आऊं यूनिविसिटी दा घर परतोआ ते पिता जी गी रोबै कन्ने बोलदे सुनया। ओ आखा दे हे जे अज्जै-कल्लै दे जागतें दी ए पढ़ाई ऐ। निकम्मे कुसै पासे दे! कुड़ियें दा पीछा करना, ते कालजै चा खिसकना इयै इन्दे शुगल न । औंदा ऐ घर तां आऊं पुच्छनां जे ओ इयै पढ़ाई करदा ऐ। के जरूरत ए भला पिढ़ियें। इन्ना गैं बड़ा ऐ। खाम खा जेड़े चार पैसे जोड़े देन उनेंगी बी फूकै दा ऐ। अज्जै-कल्लै दे जोआनें कछा कमाई दी के आस होई सकदी ऐ। एते सारी उमर अपनी छमक-छल्लो दे सुखने गैं पूरे करदे रौंगन।

आऊं बाहर गै खड़ोता रेया । मेरी दशा सच्चें-मुच्चें उयै नेयी ही जेड़ी विल्लियें गो दिक्खिय कबूतरें दो हुन्दो ऐ। मिगी अपनी निक्की भैनू कोला पता लग्गा जे कुमारी प्रेमका दो मां पिताजी कोल लामा लेइयें आई दो हो जे तुंदा जागत खड़को च खड़ोइयें साढ़ी कुड़ी अल दिखदा रौंहदा ते उसने अपनी नोट बुकै च साढ़ी कुड़ी दे बारे च ऊटपटांग लिखे दा ऐ।

आऊं डरदा-डरदा कमरे च पुज्जा तां दिक्खेया जे पिता जी ने हत्थै च नोट दुक फड़ी दी ऐ। मिगी दिखदे गै बोले—'शाबा जागता इस्सै चालो कुले दा नां रोशन हुंदा ऐ। मे आखेया— 'पिता जी ए ते इक्क कहानी ऐ।'' ओ गर्जियै बोले आऊं मितयां गल्लां नई सुनना चांहदा। अज्जै कोला तेरो दसमीं दी पढ़ाई खत्म ऐ। मिगी कोई जहरत नई तुगी मता पढ़ाइयै।

आऊं किछ बोलना चांहदा हा पर मनै च बचार आया ते गायब होई गेया। आऊं नींदी मुंडी करिये अपराधी दी भांति खड़ोता रेया ते पिताजी नोट वुकं गी छंडिये गुस्से कन्ने कमरे चा बाहर चली गे। मेरियां सारियां तांगां मिट्टी च मिली गेइयां। सोचदा हा जे इमत्यान पास करियें कोई शैल नौकरी थोई जाग ते फिरी आऊं अपनी कल्पना दा संसार बसांग पर पिताजी दा अटल फैसला सुनिये मिगी इयां बजोआ जे आऊं घरती च धसदा जा करनां। अचानक में अपनी नोट बुक चुक्की ते उदे च ओ सारे पत्तरे फाड़ी उड़े जिन्दे उप्पर में अपनी पेहली क्हानी दा खाका बनाए दा हा ते कन्ने गै कन्नें गी हत्थ लाया जे अगों आस्ते कदें बी लेखक बनने दा जतन नई करंग।

कुसै चाली माता जी दियां मिन्नतां छंदे करियै पिता जी गी पढ़ाई जारी करने आस्तै राजी करी लैता। पर आऊं अपने दोस्तें अगों नम्र प्रार्थना करंग जे ओ लेखक बनने दा सुखना नई दिविखयै अपने जीवनै दे मकसदें अल्ल अगड़े बदने दी कोशिश करन। की जे ए नई होयै जे उन्दे पिता जी दे अटल फैसले दे सामने उंदा भविवख न्हेरे च पेई जा।

डोगरी लोकगीतें च रुतां-व्हारां

विद्वान जानदे न जे कुसैं बी भाशा दे लोकगीत उस भाशा-खेतरैं दे बसनीकें दा इतिहास होन्दे न। फर्क छड़ा इन्ना गै जे लोकगीतें च इतिहास आंगर घटनाएं दे घटने दियां तित्थां नई होन्दियां। डोगरी लोकगीतें बी भलोके डुग्गर वासियें दे जीवन दा लेखा-जोखा साम्बी-सम्हाली रक्खे दा ऐ।

बदल दियें हत्तें-ब्हारें दा डुग्गर वासियें दी रोजमर्रा दी जिन्दगी पर कनेआ प्रभाव पौन्दा हा। मौसम वदलने कारण उन्दे खाने-लाने, कम्म-काज करने ते होरनें पैहलुयें च क्या कोई परिवर्तन औन्दा हा जां ओ इक्कै जनेआ जीन जीन्दे है, इस गल्लै दी परख-पड़ताल किश लोकगीतें चा होन्दी ऐ जिन्दे च हत्तें ब्हारें दा वर्णन होए दा ऐ।

डुगगर प्रदेश च चार गै हतां — सोहा, बरसांत, स्याला ते बसैंत प्रधान न । इन्दे कन्ने सरबन्ध रखने आले मते सारे डोगरी लोकगीत न । इन्दे अध्ययन परंत बझोंदा ऐ जे इक दे बाद दूई हत्ते दे औने कारण जित्थे इक पासै प्रकृति दे बाहरले रूपे च नमांपन औन्दा ऐ, उत्थें गै दूए पास्सै डुगगर नर-नारियें च बी केइयें भान्तियें दियां हिरखी-खेडां ते आपसी मेल-मलापें दियां तागां जागी पौन्दिया न । हर हत्त-ब्हार अपनी टकोदी बशेशताएं कन्ने हिरखियें गी कई चालीं दे छुआले देई जन्दी ऐ। काम्में गी नमें कम्म करने दी प्ररेणा दिन्दी ऐ। पनखस्यें गी निमयां बोलियां, गतारें गी नमें गीत ते गीतें दे सुर, कवियें गी निमयां कल्पनां ते चित्रकारें गी नमें रंग बदलदियां हत्तां-ब्हारां भेंट करी जिद्यां न । कुदरतें दा गुआड़ दिखदे गै बनदा ऐ।

सीत मुक्की जन्दा ऐ ते सोहा जां गर्मी दी रुत्त बसाख चढ़दे गै शुरु होई जन्दी ऐ। पक्की दियें कनकें गी दिक्खिय करसान भांगड़ा पाई उड़दे न । अन्दरें सेई-सेई तंग पेदे लोक चाएं-चाएं सत्तें-सबेलें बेहड़ें खट्टां डाई कडदेन। जियां-जियां गर्मी भखन लगदी ऐ, खट्टां-म ञ्जे छिजिएं पर ते कोठें पर डड़न लगी पौन्देन। सारियां-सारियां रातां पिक्खियां भोलदे निकली जिन्दयांन:

> विविखया गर्भी आई, छिजिया मञ्जी डाई। छिजिया मञ्जी डाई, पक्खी भोलना लाई।

हत्थे पैरें गी जाला पौन्दा ऐ तां भट्ट मेंहन्दी लग्गन लगी पौन्दी ऐ, कन्ने गै गर्भी दा लाज ते कन्ने गै शंगार बी होई जन्दा ऐ:—

हत्थ पैर मलूक सस्सो दे मैंहदी नाल शंगारे होए।

सोहे च जली जानी नीन्दर बी मती औंदी ऐ³। इस नीन्दरा दा मुल्ल कुसै नारै गी किन्ना मैंहगा पेआ। ओ गूढ़ी नीन्दरा सुत्ती दी गै रेई ते ओदा घरै आला रोएं होइयै नौकरी गी उठी गेआ। जली-भुज्जी दी बजोगन हुन सोहे दी नोन्दरा गी गै गालीं कड़दी ऐ:

जली जायां सोहे दिये नींदरे, जिसने स्हाड़े ढोल गुअ।ए, जिसने सज्जन गुआए । जेकर होन्दी में जागदी, लैन्दी हट्ठा मनाई ।

डुग्गर प्रदेश च जेठ म्हीनै गर्मी अपनी पूरी जुआन्नी च होन्दी ऐ। छप्पड़ियां, तला सुक्की जन्दे न । कुदरती गल्ल ऐ जे नाजुक मरुए दियां क्यारियां पानी विजन सुक्की-मुक्की जन्दियां न ै।

डुगगर दे कंडी दे इलाके च ते गर्मी होर उग्र रूप धारी लैन्दी ऐ। अञ्जकल ते कंडियें च बी मौज ऐ। ग्राएं-ग्राएं च ट्यूब-वैल लग्गने करी घरें-घरें च नलके लग्गी गेदे न, पर अज्जै थमां पन्द्रह-बीह बरे पैहलें कंडियें च सोहा कट्टना बड़ी बड्डी सजा कट्टने दे बरोबर हा। खूह तला सुक्की जन्दे हे⁵। भखदी दपैहरीं दूरा दा खूएं ते बौलियें दा पानी ढोइयै कंडी निवासी गुजर करदे हे जिसदा वर्णन कुसै लोककिव ने इस चाली कीता दा ऐ:

(क) जली बो जाना कंडिया दा बस्सना, भर दपैहरिया पानिये गी नस्सना। स्हाड़ी ओ कंडी दे पानी तत्तड़े, जली ओ जन्दे ओठ पतले।

इस तत्ते पानियै आस्तै वी पन्यासें पर लड़ाइयां-घामे होई जन्दे न। कदें-कदें खून बी होई जन्दे, जिसदा न्यां ऐन्त च जेला जाइयै होन्दा : सोहे दिया व्हारा बाई पानिया गी जाना, सच्च बन्दिये बाई पानिया गी जाना। बाई दे पानियै घड़ा वो भनाना, सच्च बन्दिये बाई दे पानियै खून बो कराना, सच्च बन्दिये बाई दे पानियै जेन बो भजाना, सच्च बन्दिये बाई दे पानियै जेन बो भजाना, सच्च बन्दिये

स्वाभाविक ऐ जे इनें घोलें ने आंदा दा पानी कंडी इलाकें च सुन्ने सतुल्ल मिथेआ जन्दा हा। इसगो साम्बी-साम्बी रखने ते बरतने दा प्रमाण इक लोक-गीतै दियें सतरें च इस चालीं मिलदा ऐ:

> तुगी भोली भोली रवलां, ओ मेरेया हाड़ै देया पानियां, तुगी खट्टी खट्टी रवलां. तुगी दिक्ली दिवली जियां, तुगी भोली भोली पियां।

पर ए पानी छड़ा तत्ता अगग गै नई सा होन्दा सगुआं मिट्टी आला होन्दा हा, जिसी पुने बगैर पीना मुशकल होई जन्दा हा :

> सोहे दिया रुत्ता शरवत ठण्डे बनानियां, साफे दे लड़ै कन्नै पुनी, पुनी-पनाई लै, अर्ज बन्दी दी सुनी, सुनी-सुनाई लै।

हर चालीं दियां सुविधां देने आला अज्जै दा जम्मू शैहर कुसै जमाने च इक बड़ी बड़डी मारू कण्डी हा। लोक घर-कोठे लिम्बने आस्तै 'रिहाड़ी' थारा दा मिट्टी आनदे हे, ते पीने लेई पानी ढक्को ढिलयै तबी चा। जेकर कुसै नैहरीं इलाके दी धियू भैनूं दा जम्मू ब्याह होई जन्दा तां ओ अपने रवारे गी सिरोसिर पिटदी होई आखदी:

> "तवी दा पानी रिहाड़ी दी मिट्टी, मरे रवारा जिन्न जम्मुआं सुट्टी।"

पर जिसले स्वर्गीय महाराजा हिर्सिह होरें सोहै जम्मू नलके लुआने दा आर्डर कीता तां जम्मू दे लोक नच्ची-नच्ची फुम्मनियां पान लगी पे। उन्दी खुशी दा उल्लेख इक लोकगीतें च इयां होए दा ऐ: रोआरें जम्मुआं पारें बावा, तौह सुहानी वगा ओ, हरिसिह दा लिखेया आया, सोहै नलका लगा ओ।

पानी-विजली बगैर जाना सच्चें गै किन्ना दुश्वार हा। पलै-पलै त्रेहू कन्ने होठ सुकदे तां फौजियें दियां बजोगनां-त्रीमतां उनेंगी लिखी-लिखी भेजदियां नः

> ठण्डे ठण्डे पानी राजा जी पुन्छा तेरिया, राजा जी पुन्छा तेरिया, कियां पीने राजा जी बाभ नसीवा।

गर्भीं ने बेहाल बजोगनें गी कंघी व्हाने ते सिर गुन्दाने दा बी आहर नई रौहन्दा। चीण्डियां गलें च खुल्ली खुल्ली पौन्दियां। बस्स पिनखयें ने गैं सारा मोह बज्झी जन्दा । पर कुदरत दे अग्गे होर पेश बी केह चली सकदी ही। दिन ते बड़ै दे हेठ गुजरदे पर रातां कोठं पर। हर इक खट्टा पर इक-इक चादर उप्परा गो ते हेठ इक-इक दरी बछाई जन्दी जिसदो पुष्टि इनें बोलें कन्ने हुन्दी ऐ:

(क) सोहे दिया धुप्पा छामां बैठी आं, तूं भुल्ल बड्टेया, तुगो सज्जनें स्हाड़े लाया, तूं भुल्ल बड्टेया।

(ख) हाड़ म्हीने धुप्पां डाडियां, कोठे मञ्जियां डिठयां, इक इक उप्पर चादर लैन्दे हेठ विछियां दिरयां।

गर्मी भाएं अति दी पवे पर रौजमरी दी जिन्दगी दे कम्म ते नई हे रुक्दे। बनज-वपार बी होन्दा हा। हाड़ म्हीनै जद अम्ब पकदे तां लोक टोकरे भरी-भरी मण्डियें चाढ़न टुरी पौन्दे न:—

हाड़ म्हीन अम्ब पक्के, होए सूहे घ्ट्ट ओए, दे अम्बें दा टोकरा ते लैं दानें दा बुक्क ओए, सिरै पर टोकरा ते हत्थे च नुक्क ओए।

ब्याह-कारज बी शुभ महूरतें च रचाए जन्दे हे। घरै आले भाएं गर्भी नै नचड़ोई-नचड़ोई जान, पर मराहजै गी सेहरा लगदे गैं भैनां झट्ट पक्खें भोलन लगी पौन्दियां न:—

सेहरा लान्दे लाड़े गी गरमी आई, पक्खा कोलदियां भैनां, सलामां करदे भाई।

आखदे बी हैन जे, 'आया सेयाल ते मोए गरोब, आया सोहा ते मोए गरीब।' पैसे आलें गी गरमी केह आक्खै। डोगरी लोकगीतें च (अ)मीर लोकें दा सोहा कट्टने लेई ठण्डे थाहरें उठी जाने दे जां ठण्डे थाहर लग्गने आले मेलें च जाने दे प्रमाण बी लबदे न;

- (क) ओ आइयां सोहे करी ब्हारां ओ भद्दरवाह जांगे बजारां, ते दोए दिन कट बन्दिये।
- (ख) चल अड़िये ओ मोइये, सुद्धि मेले गी चलचै, आई ऐ हाड़ै दी पुन्नेयां।

सोहा जन्दा ऐ तां सूए-सूए कीड़ें कन्ने चतरोई दी सैली साड़ी च सज्जी-बिजिय बरसान्त सुहानो हुगार धरती दे बेहड़ें आई खड़ोन्दो ऐ। हाड़ें दे खीरें च गै गासा बदल छान लगी पौन्दे न ते सौनें च बरी उठदे न । कोई डिड्ढ म्होना बरसान्त रौहन्दो ऐ। इस वरसान्तें दा डोगरी लोकगीतें च बी टकोदा थाहर ऐ। लोक किवयें इसदा बदी-चिह्यें बखान कीता दा ऐ। सोहै पानी पी-पीयें गै बार नई औन्दी। रुट्टी घट्ट गै खलोग्दी ऐ। पर बरखा दियां बून्दां पेइयां नई ते भुक्खें दे डक्के त्रुट्टे नई। सबनें दियां जीव्हां भान्त सबान्ते पकवान खाने गी लमकोन लगी पौन्दियां न। कुतै बिड्यें आला भत्त रिज्भन लगी पौन्दा ऐ ते कुदरें छोलें दी दाली गी लोंगें दी पड़ताल करने दे मनसूबे बनन लगी पौन्दे न, जियां:—

(क) इन्द्र गरजेया भाबो, बून्दां पौन वो किनयां,

भुक्खां लिगियां भाबो, शमका भत्त ते बड़ियां। (ख) छोलेयां पीली दाल बनाई भला, लौंगें दी पड़ताल

पैसे जेडी-जेडी फुंग बरै भला मोहले जेडी जेडी धार।

साढ़े हुगगर च उयां वी खाने-पीने दे पदार्थ केइयें भान्तियें दे ते सुआदले बनाये जन्दे न। बरखा बरदे गैं रसोई च मिट्ठे लूनके चिल्लें, मालपूड़ें, ध्यूरें, पकौड़ें, परतौड़ें, खीर, म्हेरी, बबरूयें, तड़के दे छोलें, घुंगनियें, चरोलियें, मींयें ते ठीकरमण्डें दी कशबो बाहर आई आइयै सिज्जन लगी पौन्दी ऐ। मास खाने आले मच्छी गी सुआरियै जीबा दा चस्का पूरा करी लैन्दे न ।

सेयाले दे दिनें इक बेले दा वचे दा अन्न दूए बेलें बड़ा शैल खलोई जन्दा ऐपर वरसान्ती न्यौड़ा उब्बलन लगी पौन्दा ऐ। फुलके घम्मी जन्दे न। दूआ गर्मियें च अम्ब चूपी-चूपी अगो गै मेदे च पित्त होए दे होन्दे न, फी वेई रुट्टी खाने कन्ने मान्दे नई पौचै तां होर केह होग। इस बारै इक लोक-कवि दे बोल इयां न: सौन म्हीने दियां बदिलयां, ढिडलुपै पित्त छाए, हट्टी बैठड़ेया मियां, तुगी ताप कियां करी आए? रानी ते गेदी प्योकड़ै, बेह पिण्ड खलाए।

गासै पर बदल छान्दे गैन तां वागें मोर पाहलां पान लगदेन, पैछी बोलन लगदेन । गर्मीं नै भलसोये दे प्राणियें च प्राणें दा संचार होई उठदा ऐ। नग्गरें च छिञ्जें दा ऐन्तजाम होई जन्दा ऐ । निम्यां ब्याहितयां घीयां-भैनां सस्सिरियें दा भला चते इयै प्यौके-घरें सौन कट्टन उठी औन्दियांन। अपनी अक्खीं सामनै अपने कैन्ता गी सिजदे दिवखने दी अभलाशा ते पूरी नई होई सकदी पर ओ बदलै गी बेनती करदियांन जे ओ उन्दे सौहरे-घरें बो खूब बरै तां जे उन्दे सज्जनें दे केस दी सिज्जी-सिज्जी पौन। बोल इस चालींन:

- (क) बरिये वरिये बदिलये, भैनें बदिलये, बरेयां बगाने देस, मेरिये वदिलये, मैं सिज्जी घर मापेयां, भैने बदिलये, ढोल सिज्जे परदेस ।
- (ख) बरेआं बरेआं बदिलिये, फिर बरेआं साहे देस,

मेरियां सिजदियां मींढियां, मेरे कैन्ते दे सिजदे न केस।

मनै दे मैहरमै गी अपनियें अक्खीं सामनै गुट्ट होए दा नईं दिक्खी सकने करी गोरी दे मनै च भांवड़ बली उठदे न, गासै पर चढ़ी दी बदली ओदे कालजे च तीर खोवी जन्दी ऐ। इक लोकगीतै दे बोल न:—

प्हाड़ें अन्धी आ गेई ऐ, अम्बर बदली छा गेई ऐ, छान्दी-छान्दी छा गेई ऐ, तीर कलेजे ला गेई ऐ।

वरला च इक मुसीबत होयै तां बी गल्ल ऐ। इक दिलै दे दरदी बी घर नई ते दूआ कच्चे घर-कोठे त्रिप-त्रिप चौन लगी पौन्दे न । गलियें बजारें च चिक्कड़ गै चिक्कड़ होई जाने कारण बाहर निकलना बी मुहाल होई जन्दा। लौके-बड्डे नाले दरया चढ़ी जन्दे न। कोई सज्जनें गी मिलै बी कियां ? इनें बोलें गी उच्चरे छुट्ट होर करै बी कोई के:—

- (क) निनिकयें बून्दें मींह बरसेन्दा चीन मैहलें दियां छाइयां।
- (ख) सौन म्हीनै पौन फुहारां, गलियें चिक्कड़ छाया। ए जान्ने मेरिये—

- (ग) सौन म्हीनै मींह बरसेन्दा तिवया पींदे हाड़ सज्जनां —
- (घ) सौन म्हीने दी बरखा, नई लंघोन्दी नाली।

इक्क मने दा जाला सै दूआ तने गी बाई रोग लग्गी जन्दे न। गोरी झट्ट घरे आले गी तार पुआई ओड़दी ऐ—

- (क) हाड़ म्हीनै तमशां पौन्दियां, सौन म्हीनै देहियै गी रोग।
- (ख) सौन म्हीने दिये वदलिये, कैत लाइयां नि फुहारां,

सज्जनें बाभुं गूण्ढी लगनीं, जम्मुआं पाइयां तारां,

सज्जनें बाभुं दिल नेहा लगदा, जम्मुआं पाइयां तारां।

बजोगे दे बाद संजोग होई जा तां उसदा दूना मुल्ल बदी जन्दा ऐ। अन्दरो-अन्दर कुड़दी ते सुलकदी कुसै नारै दा कैन्त जिसले अद्धी रातीं घर आई उसगी आला दिन्दा ऐ तां उसदे भाएं चन्न चढ़ी जन्दा ऐ। लोकगीतै दे बोल इस चाली न:—

अद्धी रातीं चन्न घरोन्दे सज्जनें दिता आला।

मुत्ती दी आऊ खड़ीं खड़ोती, चन्न चढ़ेया पुन्नेयां वाला।

बरला हत्ते च डुगगर-करसान राई-बाई दे कम्में च जटोई जन्दे न । बाड़ियें च मक्कें ते खुम्बें च धानें दियां पनीरियां उस्सरी पौन्दियां न । कुतै मक्कें दी गोडी शुरू होई जन्दी । गुड्डनूं दे तालें-तालें गीतें दे बोल आपमुहारे निकली पौन्दे न :—

मनकें दी गोडिया ... से ... ऊ ... आ, दम्मे दी गोडिया ... से ... ऊ ... आ।

बरखा रुत्तै दी गोचरी गै ते करसान दे भाग होन्दे न। जेकर वरखा शैंल होई जा तां करसान लबखें च, नई तां कबखें च। मालिया चुकाने आस्ते बो गैहना-वन्दा वेचना पेई जन्दा ऐ। करसान दी चैन्ता दा अन्दाजा इनें बोलें शा लाया जाई सकदा ऐ:—

उनकी जन्दा बाजरा ते सुनकी जन्दी मनक ओए, कियां देना मालिया वो, कियां देना सट्ठ ओए? नत्य बेची मालिया वो, बरलाक वेची सट्ठ ओए।

बदल बरदे-बरदे खड़ोई जान तां बी करसाने दा मन्दा हाल गै समभो। मनकां, बाजरा सब सुनको जन्दे न, मांह ते मोठें दी फसलै गी बी नुक्सान पुजदा एँ । पर जमींदार लोक फी बी बेहले नई बौहन्दे, किश ना किश करदे गैं रौहन्दे न । घरें दे पचवाड़ें, बाड़ियें-बगीचें च कद्दू, कण्डोलियां, करेले, भिण्डियां, जम्हीरियां ते होर निकियां-मुट्टियां सब्जियां लान्दे रौहन्दे न । क्यांग्यें च चम्बा, मोतिया, गुलाबै दी ब्हार आई जन्दी ऐ।

डुग्गर प्रदेशैं च खड्ड-खडोले, निदयां-नाले बथेरे न। ते जेकर वदल लगातार वरदे गै रौहन तां बी कदें-कदें हाड़ै कारण मता सारा नुक्सान होई जन्दा ऐ। ग्राएं दे ग्रां रुढ़ी जन्दे न। मसां जान बचाइयै लोक कुसैं उच्चे थाहरै दी शरण लैन्दे न जिसदा उल्लेख इक लोक किवये इयां कीता दा ऐ:

सौन म्हीनै बरखा बरीह ऐ, बुत्थ चढ़ी गेया हाड़ै दा। 'विकम' दियां कुड़ियां रुढ़ियां लौढ़े रुढ़े 'संग्याड़े' दे। वालू चक्कै दियां कन्धां ढिठयां, रली गे चिक्कड़ सारा। 'हैलें' बालें रोन्दे जे फिरदे, कुत्थें करचे गुजारा। 'चुड़ालियें' वाले नट्ठी वो जन्दे, बन्न टप्पो गे सारा। उच्ची वो टिब्बी 'कुक्कड़ेंआला', उत्थें करो गुजारा।

इस चाली सुक्की दियें खड्डें-खडोलियें गी बी पानियें ने लबालव करियें धरती गी बसदी-रसदी करिये वरखा रुत्त भाद्रों म्हीने च समाप्त होई जन्दी ऐ¹³।

अस्सूं म्हीन। चढ़दे गै रुत्त सयाले दी आई ढुकदी ऐ। तलाएं च कमलें दे फुल्ल न्हाते-घोते दे सिर कडदे न। ठण्डी-ठण्डी ब्हा डोगरे गवरुएं दे चेंचल चित्तें गी ल्हाई जन्दी ऐ। बजोगनां डोगरियां नारां परदेसें गेदे अपने कैन्तें गी चित्त्रियां-पत्तरियां लखाइयें बजोग दशा दा स्नेहा उन्दे तगर इनें बोलें राहें पुजान्दियां न:

जम्मुआं दी कण्डिया बरखा लग्गी दी, धारें पवे दे पाले, तेरे सो, धारें पवे दे पाले । ओ शौंकिया चम्बे देया । देह सीतै ने डग-डग कम्बदी, ते मनै च पवे दे जाले ।

हुशियार त्रीमत घरै आले गी ओदी बुड्डी माऊ दा वास्ता पाइये सद्दी भेजदी ऐ 14 । पर कुसै कविये सच्च गै गलाए दा ऐ— 'पराधीन सुपने सुख नांहि।' हाकम भेजन गै तां नाजो दे मने दे जाले मट्ठे होई सकदेन। खतें दा जवाब उठी औन्दा ऐ:—

कियां आमां तेरे कोल, ओ छुट्टियां नि दिन्दे राजे, हरेयां बागां दिये कोयलिये— बरसान्ती दे त्रुट्टे भज्जे दे घर-कोठे लिम्बने-पचोने शुरू होई जन्दे न। अस्सू च दुर्गा पूजन दी त्यारी होन लगदी ऐ। दसैहरा, देयालो, टिक्का लोहड़ी बगैरा तेहार बी इस्सै रुत्तै च औन्दे न।

सयाल् बदल बरा करदा ऐ। इक भगतन ठण्डू नै ठण्डोए दे घर आये दे प्रभु जी दे न्हौने लेई पानी तत्ता करिये उनें गी आखदी ऐ:

छोटियें बून्दें मेंहा जे बरसै, बड्डो पौन्दो फुहार, हरिचन्द जी स्हाड़ै आए, पृथीपाल जी स्हाड़ै आए। ठण्डड़ा पानी में गर्म करनियां, आओ प्रभु जी तुस न्हाओ।

कदें-कदें ऐनू कारण उस्सरी दियां कनकां घम्मी जन्दियां न ते फसल नष्ट होई जन्दो ऐ । इक लोकगीतै च जिसदा वर्णन करदे होई कुसै कविये ने आक्षे दा ऐ :

> पा-पा गोले ऐन पौन्दी, छोड़ियां कनकां भन्नी आं। नाड़ सुकाड़ कट्ठा करदे, गे न गरोले घम्मी आं।

ब्हारा सिर गै खान-लान बी होन्दा ऐ। सेयाले च भुक्ख किश मती गै लगदी ऐ। बुड्डे-परसानू बी लप्परै दे थाहर पूरा-पूरा फुलका-ढोडा खाई-पचाई भाएं लैन्दे न पर उन्दे ठल-ठल करदे हड्डें शा कम्म थोड़ा होन्दा ऐ। रुट्टी दियां तैहीं दिन्दे दिक्खियै कोई नूह जली भुज्जियै मुआठ मारी टकान्दी ऐ। चलो सीतै च कम्म नई होन्दा ते नई गै सेई पर खट्टा उप्पर बैठे दे जेकर जवान चलदी रवै, बुड्डा खा ते कन्नै घुरकै ते होयै बो बदचलन ता उस खुड्डे गी कुसै नूहां मारी होनी ऐ मुआठ, जिसदा जिकर इने पिक्तयें च स्पष्ट ऐ:

तेरियां ङोठियां लान्दे धम्मन, बुड्डा सीतें लगेया कम्मन । बुड्डा न्हारी लगेया मंगन, मंगदा खन्नी लैन्दा सारी । नूहैं चुक मुआठै दी मारी, बुड्डे दी सड़ी मुच्छ ते दाढ़ी। बुड्डा ऐ बड़ा बदकारी।

सेयाले दे दिनें साढ़े ग्राएं च कमांद पीड़ने लेई बेलने लग्गी जन्दे न।
रौह दा मिट्ठा भत्त मेथरे पाइये घरें-घरें चढ़ी जन्दा ऐ में । सोहे च जित्थे
हत्थ, नकक, कन्न गूण्डे रक्खने च सुख मिलदा ऐ उत्थै सेयाले च डोगरियां
नारां पशाकियां लाई कडदियां न । हत्थें च शैंगले चूड़े चढ़ी जन्दे न ।
बनजारे बी सेयाले च शैल कमाई करी लैन्दे न । गैहने-टल्ले लाने-पाने
नै जोका सीत बी घट्ट लगदा ऐ ते फिरी चरखा कत्तने च जो मजा
ओन्दा ऐ, ओ इस चाली ऐ:

बिच स्यालै औं सीतें मरी जन्नी आं स्हाड़ी गली बल आ, ओ बनजारेया,

होरने ते लेई ऐ बंगड़ी-बंगूड़ी, मे लेया चूड़ा चढ़ा,—

बेई पसार चरखा में डाहनी आं, कत्तनी आं चूड़े दे चा — ओ जान्ने मेरिये —

सेयाले दी ठार घटन लगदी ऐ तां कोयल पंचम च वसैन्त रुत्ते दे औने दी दुन्द पाई दिन्दी ऐ। नंगे-मुंगें रुक्खें पर हरियाली छाई जन्दी ऐ। सीतै शा डरे दे जीव रुड्डें चा बाहर निकलो औन्दे न। चौनें पास्सें भाग लग्गी जन्दा ऐ। दिन बल्लें-बल्लें मठोन लगदे न ते रातां छुट्टियां होन्दियां न ते समभी लौ जे रुत बसैन्त आई गेई ऐ। हिरिखयें दे हिरखें गी बभालदे होई उसी होर रंगला करी जन्दी ऐ। जिहर दिक्खों हासे, खेड तमाशें नै वातावरण खिड़ो-खिड़ी पौन्दा ऐ। रुक्ख फुल्लें कन्ने, तला कमलें कन्ने, नर-नारी गूढ़े हिरखें कन्ने भौरे, कशबोई कन्ने, सूरज ठण्डू कन्ने, किव भाव छुआलें कन्ने ते दिन खुशी कन्ने उड्डी-उड्डी पौन्दे न। बसैन्त रुत्त बारै इक लोक गीतें दे बोल इस चालीं नः

गेया स्याला भौरे ओ पछान्ती ऐ अपनी ब्हार, ख़ब्डें - खडोलियें कालड़ा भौरा फिरदा, बौहने गी तुपदा थाहर ।

रुवलें दे पराने पत्तर भड़दे जन्दे न ते नमें-नमें पत्तर फुट्टी पौन्दे न¹⁶। दरेंका, दडुनियां जां मरुआ लरजां छण्डन लगदा ऐ तां गोरी गी उस दी गोडी दा ख्याल उठी ओन्दा ऐ ओ भट्ट अपनी माऊ गी आखी उड़दी ऐ—

दे माए मेरा बींगड़ू मैं महआ गुड्डन जाना, भला जी महआ गुड्डन जाना—

फुल्लें दिएं क्यारियें गी गुडदे-गडांदे गै हासे-मखीलें दी पटारी लेइयं हो ली दा तेहार आई जन्दा ऐ। बन्न-सबन्ने रंगें कन्ने कपड़े गुत्थ होई जन्दे न¹⁷। बसेन्त रुत्त सुखियें आस्तै जित्थें सुखकारी ऐ उत्थें गै बजोगियें दे हिरदें गी जाली-जाली जन्दी ऐ। इस्सै करी कुसै लोक कविये बसैन्त रुत्तें गी दुआसी दी रुत्त आखेया ऐ:

चैत्तर म्होनै रित्त दुआसी दी-

इस गी दिक्लो जिन्न कैन्त दे परदेस जाने पर क्या मजाल ऐ जे फुल्लें दे हारै, गन्ने दे रसे ते तूतें गी हत्थें बी छूता होये। इस गी एह सब पदार्थ बिक्ल लगदेन की जे इन्टा खाने आला दूर जे ऐ:

मनै देया मैंहरमा, घरै पायां फेरा, रुत्तां आइयां बांदियां, मन कल्पान्दियां, घरै पायां फेरा -

इस चालीं हर रुत्तै-ब्हारै दी डुग्गर-प्रदेशैं च अपनी रंगत ऐ, अपनी ठाठ ऐ। पर जियां इस नाशवान संसारै च जीव जमदे न, चार दिन इत्ये बसा करदे न ते फी दूए लोकै गी चलदे बनदे न, इस्सै चालीं रुत्तां-ब्हारां औन्दियां न ते उठी जन्दियां न। फर्क छड़ा इन्ना ऐ जे रुत्तां-ब्हारां मुड़ी-मुड़ी औन्दियां न, पर जाने आले मानुं परितयै नई औन्दे।

... सुक्की जन्दे लूह तला, छप्पड़ियां सरनाहियां ।

गेया सेयाला लोको, रित्त सोहे दी आई, पलंग चुिकय कोठे डाहनी आं, औं सौन्नी आं लिम्मिआ नीन्द्रा ।

^{2 (}क) चढ़दे वसाख आई वसाखी, लोकें भांगड़े मारे ओ।

⁽ख) चढ़ेया म्हीना वसाख ओ रणमण कनकां पिक्कयां।

असोहे दिया रुत्ता नींदरां सानूं लिग्गयां।

भर दोपहरी छप्पड़ी सुक्की, सुक्की गेई मरुए क्यारी ।

⁵ कण्डी वो कण्डी देस पानी सुकके,

⁽क) चुक्क गेई गोरी दें घड़ा चुक्के।

⁽ख) हाड़ महीनै धुप्पां डाढियां,

^{6 (}क) हाड़ म्हीनै धुप्प डाढी, जी पौन्द। तंग ओए...

⁽ख) हाड़ म्हीन धुप्पाँ मिखयां, मेरे होठ जे करदे पानी-पानी,

हाड़ म्हीनै ओ पिनख्यां झुल्लियां, मेरियां गलै विच मीण्डियां खुल्हियां, मेरियां गलै विच जुल्फां खुल्हियां।

- 8 हाड़ म्हीनै चढ़ी बदली, सौन बरदे नीर ।
- 9 निक्की निक्की वरखा, बल्लै प्हाइ दी, चन्हां विच आया हाड़, मच्छी आवै हाड़ दी। मच्छी चीरी चारियै मसालै भरी ओ, चाड़ी के घढ़ाटु, मच्छी लेई तली ओ।
- 10 (क) वून्दां पौन्दियां पारली धासा, पैंछी बोलदे खल्हके नाला। (ख) अम्बर बदली छाई गेई ते पाल्लां पान्दे मोर।
- 11 सीन म्हीनें छिज वज्जी, छिज गेई ऐ आई ओ।
- 12 (क) बरदे-वरदे बदल खड़ोई गे, भा घटी गे मक्कें दे। (ख) मक्कां ते वाजरा सव गे सुक्की, बदल गेया वो खड़ोई।
 - 13 भाद्रों म्हीन बदल खड़ोई गे, ओ निम्बल होई गेया कोरा, लोका निम्बल होई गेया कोरा !
- एहाड़ें देसें पीन्दियां बर्फा, पीरें पौन्दे ओ पाले,

 कदूं घर औना मेरे सपाहिया, ओ बुड्डी माऊ देया पुत्तरा।
- 15 प्हाड़ी लोकों मकर बनाया, काठै दा बेलना लाया होए। मुट्ठ भरी-भरी गन्ने लान्नी, रोहै कहरी लग्गें होए।
- 16 झुल्ल बड़ै देया पत्तरा, कैत दिन्ना दूर झुलारा, पराने पत्तर लगे झड़ना, नमें दिन्दे झुलारा।

डाँ० ग्रारविन्द

अपनी बेहन

अपने आपंगी कें ओपरा बक्तोन्ना। ओपरी शकलेंच 'में', मेंगी तुपदे रौहन्ना।।

चाननी रात जेलै हस्सी-हस्सी गांदी ऐ, किश चेते मेरी सोचें पर छाई जन्दे न, फी वल्लें-बल्लें ओ चेते बी मरी जन्दे न, में बाको रात उनें चेतें गी तुपदे रौहनना।

पीड़ें दे बदल जेलै ची-चिहाड़ा पांदे न, खुरक अक्खीं च इक नमीं दा परदा पौंदा ऐ, में उस नमीं दे पर्दे ओहले अपने हिरखें दे, डिगदे-ढौंदे खण्डहरें गी दिखदे रौहंनां। अपने आपै गी ..

मनै दी गल्ल कदें होठ नि लुआंगी सके, मनै दे भावें ताईं लफ्ज गे नि थोए मिगी, वक्त बदलोए पर खड़ोता उस्से थारा में, मरी दी गल्लें ताई लफ्ज घड़दे रौहःनां। अपने आपै गी...

राम लाल शर्मा

मेरा चन्न

दिन हुन्दे चन्नां, दस्स कंसी तूं गोआची जन्नां.
तुगी कियां रास आइयां, मुंढे कोला न्हेरियां ?
केरदियां रौहन ओ, तेलू आंगूं आमले,
तेरै पिच्छें चन्नां, जिनें अक्खियां बतेरियां ॥
हासें दा पटार खोली, तारें कन्ने रास पाई,
छैन्दे - छैन्दे टप्पी जन्नां, किगरे ते केरियां ।
प कमलें नि अक्ख पुट्टी तेरै पास्सै दिक्खेया,
झांजरां सन्हैरी भाएं, पुल्ले हृत्थें फेरियां ॥
मने जेड़ा बस्सी जन्दा, ओदे शा शपैल के,
कंधां कुसै उच्चियां, फी कैदे ते खडेरियां !
मौती आली हद्द टप्पी, हिस्सयां जो इक बारी,
मौती आली हद्द टप्पी, हिस्सयां जो इक बारी,
कुनें नई अज्जै तोड़ी, पूजियां ओ देहरियां !
खेडियां तूं सारें कन्ने, मुंढा छप्पो - लुक्कियां,
खेडियां तूं सारें कन्ने, मुंढा छप्पो - लुक्कियां,
अज्जै तोड़ी खोआं चन्नां भुल्लियां नि तेरियां ।
अज्जै तोड़ी खोआं चन्नां भुल्लियां नि तेरियां ।
जिन्दियां बरेसां अजें, लावियांल-वेरियां ॥

जिन्द्गी ते मौत

जिन्दगी इक रोडकू ऐ, ते ए मौत, ए मौत ऐ इक इलजाम रडकदी अवखें च ! भडकदी बत्तें च! जेड़ियां अन-जानियां ते अन-चाहियां होन्दियां न -जिओ तां दिन्दे जीन नई ! ्पाड़ियै, फरोलदे ते तरुम्वां करान्दे, कालजा दिन्दे सीन नई ! पीड़ै दो चीख, आह-कराले ! दुख-कसाले, ठेडें दे जखम, जखमें दी पाक, पाका दी कैंक-रडकदी अक्खें च ! ए जीन बी जीन ऐ के ? जोने दी चाह नई ! छडियां खरमेखां, , कोई ही खी नई, आह नई। कुसै दा साथ-संग नई ! कोई रूप नई कोई रंग नई ! जीने दा कोई ढंग नई'! कोई मंग नईं, त्रंग नईं! रड़कदी अक्खें च!

ते ए मौत !
ए मौत ऐ इक लानत,
इक इलजाम, इक भण्डी —
जे इस केड़े जीने छा,
कोई मौत तुप्पै —

चल मना बिन्द करी लै जिगरा, सैहकी रौ इस गुष्प न्हेरे च— बिन्द खड़ोइयै खबरै किछ, सुज्क्षन गै लगी पवै—

रड़कदी, भड़कदी,
ते इस रोड़कू-जन जिन्दगी गी,
कोई अक्ख सलक्खनी,
वसां, जां बझोन लगी पवै,
कुसा दी तंग पीड़—

 \Diamond



शीशे गो कैं गोला करना, गोल मना दी मैल।

-- मधुकर

पीलिए दा रोगी

शरीर, कोढ़िकरले साई, पिय्ला-पिय्ला, सुन्हैरी - सुन्हैरी, चन्द सुआसां दी गलल, जां सरगम उन्हां सुआसां दा, जेहड़े, औन्दे जान्दे जान्दे औन्दे, थप - थप करदे, खुल्ले नक्के दे, पियूले परदेयां उप्पर। दो टुरदियां हाक्लीं, भिलमिल करदियां, जियां गासे पर लप-लपान्दे, दो चन्द्रमा होन, जिनां मंझ. ना हिरख ऐ ना प्यार। आस, पिआस, सुख, चैन, लालसा, इच्छा, बासना, शक, वैर, बरोध. दा हाम्मी, इस दा दिल,

इनां पियू लियां हाक्खीं, दे भरोबे रस्ते, दिक्खना चाहन्दा ऐ, अपना बिक्खरेया संसार. संगोया ऐ लटकोया ऐ, जेहड़ा, बिफनियां मं भ. बरसान्ती च भरोये, छपड़े साईं। जां दस्सना चाहन्दा ऐ, ए दिल, अपने बक - मुंहै रस्ते, पर हुन, दमागै दियां लकीरां, पियूलियां बेकार, बिखरी चुकेया ऐ, सब संसार। इस दियां मस्ती भरियां, हास - मनासे, भड़ी चुकियो न, जियां पत भड़ै दे मौसमे च, भड़ी जन्दे न पत्ते, होई जन्दा ऐ रुक्ख, र्हं ड-मुंड। होई चुकेया ऐए, तृष्णा - रहित, मोहमाया दी पिआस, सुक्की चुक्की ऐ इस दी, जियां ढेर तमसा कन्ने, सुक्की जन्दे नः बिलंगा पर, बिक्खरियें पत्ते।

नमां जमाना

घर-घर लग्गी दी ऐ भुदल कन्ने जंग।
हर मानु पेदा जमाने शा तंग।।
कोल्हू दे दांदै आंगर मानु अज्ज बुढ़ै दा,
कम्म करी थक्की जन्दा, मनो-मन कुढ़ै दा,
चैंता आला नाग इसी हर बेलै पुड़ै दा,
सोचें च निम्मोभान लग्गी दी ऐ खंग।
हिट्टयै दी सोच पेदी, होर सोचां भंग।
घर घर लग्गी दी ऐ...

रत्त कुसै दी, चट्टा दा कोई, मेहनत कुसै दी खट्टा दा कोई, मानु गी मानु अज्ज रं आं आंगू पिजा दा, सब किछ लुट्टा दा फिरी बी ओ खिजा दा, घेसली गनाई आंगर मल्ली बैठा थाहर, पानी बी नि मंगै मानु जेल्लै मारै डंग, दूआ मानु दिक्खियै रेई जन्दा दंग। हर मानु पेदा...

लाई-लाई जोर मानु खेतरेंगी बाह दा, विनें रातीं मेहनत करी, फसलां उगा दा, हर गल्लै दी जग्गै बिच पेई दी ऐ थोड़, दिनो-दिन बधै दी ऐ मानुआं दी लोड़,

ट्रैकटर ते मानु आले, हल्ली गेन जोड़, पूंजीवादी लग्गी गेदा देसै गी कोड़, नई सुक्की जमना, नई सुक्की गंग। हर मानु पेदा...

महंगाई नै कीते दा बड़ा बुरा हाल, गरीबें दे घरें बिच विलका दे लाल, चौनें पासें पेदा गरीबी दा जाल, कुसै घर आटा नईं कुसै घर दाल, लुट्टै दा पैसे आला दिनें - रातीं माल, लुट्टने दे तुप्पी लेदे नमें - नमें ढंग। हर मानु पेदा...

थां - थां देसा च जुल्म अज्ज फुल्ला दे, वेबस मानुआं दे लऊ कियां डुल्ला दे, सुहागनें दे सिरें दे पूंजी उड़े सन्दूर, केई लाल मामें कोला होई गेदे दूर, अगड़ा नि देस बधै, जित्थै भुक्ख - नंग, इक दिन लऊ साढ़ां दस्सग अपना रंग। हर मानु पेदा...

उनें के पता जेड़े कंडें प' बस्सन। जे रुड़दें तैं केडे हे कक्खें दे स्हारे॥

-राम लाल



बृजमोहन

गीत

गोरिया ने पाया के जोवन च पैर । दिक्खी लैन्दा जेका भिरी उसदी नि खैर।

वाईं पर पानियं गी जेलं गोरी औन्दी, औन्दे - जन्दे मानुयें दे मन-चित्त भान्दी,

खिड़ी-खिड़ी पौन्दा उसी दिवखी बड्डापैहर। दिवखी लैन्दा जेका भिरी उसदी नि खैर।

पानियं च चन्न - चेहरा दिक्खी मुस्कान्दी, फिरी किज सोचदी ते सोची शरमान्दी,


अमृत पानी चुम्मी - चुम्मी लैन्दा पैर। दिक्खी लैन्दा जेका भिरी उसदी नि खैर।

> सोचदी जे भली चीज कोई ऐ शलैपा, बांवरा जन होई जन्दा इस्सी दिक्खै जेका,

सारे पिण्ड पेई जन्दा जरमें दा बैर । दिक्खी लैन्दा जेका भिरी उसदी नि खैर ।

> डंगे बेई - बेई कोई भाख मिट्ठी लान्दा, बौंसरी च कोई भाख मनै दी सुनान्दा,

जंगलें च करै करदी गोरी लैहर - बैहर। दिक्ली जेका लै भिरी उसदी नि स्वैर।



- अप्ता मण्डी च 27 अप्रैल गी अल्लामा इक्जबाल शताब्दि समारोह दे सिलसिले च इक मुशायरा होआ जेदे च अट्ठें किवयें भाग लेया।
- द्वा स्नोड़ नसीं सोच्न : एनां ऐ उस लैहर दा जेड़ी रयास्ती अदीबें-फनकारें गी अपनी समकालीन स्थितियें दे रू-ब-रू खड़ेरना' चांहदी ऐ। अदीबें दे सोचने ते लिखने पर उस समें दियें समाजी, सयासी ते आर्थक स्थितियें दा बड़ा बड़्डा हत्थ होन्दा ऐ, लेखक दी इन्दे प्रति ईमानदारी गै उसदा सेई बजूद बनांदी ऐ। "नमां मोड़ नमीं सोच"— उनवान दे तहत अकैडमी दे सैकेटरी इस अदबी-भाव दा सरूप विश्लेषण अकैडमी च होए दे इक औपचारक किट्ठें च पैहलें गै करी चुके हे। 30 अप्रैल गी गुलाब-भवन जम्मू च वक्खो-वक्ख भाशाएं दा इक रले मिले दा मुशायरा इस सिरलेखा एठ होआ, जेदे च डोगरी, उदूँ, हिन्दी, पंजाबी कवियें शिरकत कीती। डोगरी कवियें दे नां इस चालीं न : सर्वंशी बसन्त राम 'बसन्त', परमानन्द 'अलमस्त', मोहन लाल सपोलिया, रामनाथ शास्त्री।

हाईकोर्ट दे चीफ जस्टिस राजा जसबन्त सिंह नै अकैंडमी दे इक नमें प्रकाशन दा विभोचन बी कीता।

- इन्जीनियर्स इन्स्टीच्यूट भवन, गान्धी नगर च 2 मई गी इक रंगा-रंग प्रोग्राम पेश कीता गेया, भाग लैंने आले कलाकार हे—कुमारी सुषमा, कुमारी आशा थापा, कुमारी सीमा शर्मा, कुमारी कल्पना केसर, कुमारी रमा चौहान, कुमारी विश्वा मित्र, श्री अमरपाल सिंह ते श्री चन्दू लाल योगी।
- 5 जून गी पौनी च अकंडमी ने इक मुशायरा करवाया जिस च डोगरी, उदूँ, हिन्दी ते पंजाबी दे इनें शायरें हिस्सा लेया : सर्वश्री विजय सुमन, सोमदत्त सुगम, योग राही, ब्रह्म स्वरूप, अब्दुल रशीद जून, ईशर दास चंचल, के. के. अनजान, साधु सिंह, बोधराज खजूरिया, के. एल. ठाकुर, भगवान दास।

मुकामी सुनने आले लोक मती संख्या च आए दे हे।



इक खंखिया मैहल : डोगरी लोक-कत्थें दा नीमां भाग-

इस संग्रेंह च कुल तरेठ कत्थां न। डोगरी लोक साहित्य गी कुसै बी दूई रज्जी-पुज्जी ते मती बोली जाने आली भाशों दे मुकाबले च फखर कल्ने रक्खी सकने आं। लोक-गुण दे अलावा इस च इदी गिनतरी बी इसदा महत्व बधान्दी ऐ। "इक डंडिया महल्ल" च छापी गेदी कत्थें च केई चाली दे कथा-पात्तर नजरी औन्दे न। हालांके कहानियें गी कुसै बिज्ञानक ते मान्य वर्गीकरण दे तहत नई रक्खेया गेदा की बी इन्दे प्रस्तुतिकरण च इक अप्रकट योजना इस कमी गी दूर करदी ऐ। एह संग्रेह इस गल्ला दा टकोदा सबूत ऐ जे डोगरी लोक कत्थें च जोवन दे बेशमार बक्खो-बक्ख रूप चित्रत होए दे न। किज पहले छपी चुकी दी कत्थें दे दूए वर्शन बी इस संकलन च हैन। लोक-साहित्य दे विद्यार्थी, आम जिज्ञासु पाठक जां मनोरंजन ताई पढ़ने आले पाठक गित ए संग्रेंह इक्कै नेया उपयोगी ऐ। सफे 206

डोगरी छोक गील : डोगरी लोकगीतें दा दसमां भाग-

इस भाग च लगभग दो सौ लोक-गीत छपे दे न, जिनेंगी भेटां, बिसनपते, गीत, भाखां, सुहाग, सिठिनयां आदि उप शीर्शकों च बडेया गेदा ऐ, जेदे कन्ने पाठक गी अपनी रुचि दी समग्री तुष्पने च बड़ी सुबधा रौहन्दी ऐ। लोकगीतें प्रति पढ़ने आलें दी किन्नी मती रुचि ऐ इसदा सबूत एदे धर्मा मिलदा ऐ जे लोक-गीतें दे किज भाग इस बेल्ले आऊट आफ प्रिंट न। सफे 206

दौनें कताबें दी प्रकाशक :

जे ० एण्ड के ० अकेंडमी ऑफ आर्ट कल्चर एण्ड लैंग्वेजिज, जम्मू ।



